

TRACTATUS III  
DE  
SCARLATINA

A U T O R E  
MARCO ANTONIO  
PLENCIZ,  
MEDICO VINDOBONE NSI.



---

VIENNÆ AUSTRIÆ,  
TYPIS JOANNIS THOMÆ TRATTNER, CÆSAR. REG.  
APOST. MAJEST. AULÆ TYPOGR. ET BIBLIOP.  
MDCCLXII.

THE UNIVERSITY OF CHICAGO

LIBRARY

5120 S. L. 1000

CHICAGO, ILL.

1900

# PRÆFATIO AUTORIS

A D

## TRACTATUM DE SCARLATINA.



I<sup>n</sup>ter morbos contagiosos, qui humanum genus affligere sæpe consueverunt, princeps est affectus quem scarlatinam nominamus.

Medici enim practici norunt, quanta sævitia in juventutem fure-  
re, quanta celeritate integras, ce-  
lebresque familias delere, & exhau-  
rire soleat; ut unico hoc ex titulo  
pestis juventutis merito vocari de-  
beat.

Quapropter mirabar, quod mor-  
bus tam truculentus, humanoque  
generi tam infensus hucusque tum  
quoad ejus principium, progressum,  
decursum, finem, ejusque consecta-  
ria, cum quoad curationem, tam

parum tam mance descriptus invenitur.

Qua ex ratione a viginti & pluribus jam annis sedulo, serioque omnia, quæ in, & post hunc morbum memorabilia obvenire, quæ prodesse & obesse soleant, mihi annotavi, quæ nunc publici juris facio.

Unde habes hic, benevole Lector, genuinam & ex lecto haustam historiam hujus sæpe funesti morbi, habes ejusdem progressum, decursum, aliaque scarlatinæ conspectaria; denique omnia, quæ tam ejus æthiologiam, quam pathologiam concernunt, tibi candide communicare conabor, quibus frui, & vale.

ELEN.



# ELENCHUS SECTIONUM QUÆ IN TRACTATU DE SCARLATINA CONTINENTUR.

---

## SECTION I

**E**xponit diversas Medicorum de scarlatina relationes, & descriptiones.

## SECTION II

Proponit propriam de scarlatina descriptionem.

## SECTION III

Subjungit scarlatinae differentias, & Diagnosim.

## SECTION IV

Rimatur scarlatinae veras, aut saltem verosimiliores causas.

## SECTION V

Declarat symptomata, uti & sedem scarlatinae.

## SECTION

## SECTION VI

*Subiectum & prognosim scarlatinae exponit.*

## SECTION VII

*Scarlatinae ejusque symptomatum curationem proponit.*

## SECTION VIII

*Scarlatinae stadium, seu periodum secundam una cum curatione explanat.*

## SECTION IX ET ULT.

*Quasdam singulares de scarlatina observationes una cum adjectis annotationibus communicat.*

TRA-



TRACTATUS III.  
DE  
SCARLATINA.

---

SECTIO I.

EXHIBET SCARLATINÆ HISTORIAM,  
ET DESCRIPTIONEM MEIS OBSERVATIONIBUS  
RESPONDENTEM.

I.

**A**n Scarlatina veteribus notā fuerit,  
nec ne, videtur eadem & ejusdem  
farinæ esse quæstio, quam superius §. V.  
de variolis proposueram. Hæc enim ali-  
A 7 quid

quid ad eruditionem, sed ne hilum quidem ad ægrorum commodum facere, & contribuere videtur. Unde etiam familia missa facio, neque his perquirendis diu immorabor; satis enim reor, si meminerim, veteres medicos multa de maculis, papulis & pustulis dixisse, adeoque plures exanthematum species exinde intellexisse; qua vero ratione id fecerint, aliis discutiendum relinquo.

Quo tempore vero grassari cœperit, aut potius quo tempore primo scarlatina observata fuerit, dein patebit, dum Auctores de Scarlatina tractantes adduxero.

## II.

Hic propositi ratio exigit, vt ante omnia historiam, progressum, decursum Scarlatinae, ejusque confectaria, quam accuratissime, & quam brevissime exponam, talemque exhibeam notitiam, qualem non ex libris, aut proprio ex cerebro,

bro, sed ex ægris ad lectum hausi, collegi, & annotavi.

Quare fiet, vt symptomata omnia, aut saltem præcipua, quæ non tantum qualibet morbi die, sed quæ fere qualibet hora observavi, debito ordine afferam, & recenseam; ex quibus spero fore, ut quisque historiæ morborum peritus, facile cognoscat & candide fateatur in scarlatina tum quoad æthiologiam, cum quoad ejusdem curationem ad hæc usque tempora quam plurimum desiderari.

Quapropter satis mirari non valeo, quod morbus, qui multarum illustrium familiarum progeniem funditus sæpe exhaurire consuevit, superficialiter tantum delineatus sit, ut exinde necdum constet quid sit, nec qua salutari methodo tractari debeat; etenim quam plurimi nulum periculum, nullam malignitatem in scarlatina agnoscunt.

Item a quibusdam pro purpura, ab aliis pro petechiis, aut rosalia venditur. Quidam eundem cum morbillis confundunt; sicque una eademque tractant methodo; cum tamen, ut dein patebit, isti morbi toto inter se differant cœlo; adeoque aliam exigant medendi rationem. Ut vero hæc clarius pateant, necesse erit, ut primo scarlatinæ principium, ejus progressum, & decursum; dein vero ejusdem confectaria, & reliqua, quæ ab eadem dependent, exhibeamus.

### III.

Omnis scarlatina, five sit benigna, five maligna orditur cum majore, aut minore lassitudine, viriumque dejectione, quam mox sequitur plerumque horripilatio, calor, febrisque.

Hoc ipso tempore, præsertim in maligna, adest ingens dolor capitis, sopor, quandoque delirium, nifus ad vomitum, tandem ipse vomitus; quibus aliquando  
propter

propter nimis violentam ventriculi constrictionem lypotimiæ accedunt.

Eodem fere tempore conqueruntur ægri de deglutitione difficili, anxietatibus, angustiiis præcordiorum, & inquietudinibus, respiratio videtur parva, laboriosa, & solito frequentior.

Tandem præsertim in scarlatina maligna, jam prima, aut secunda, aliquando tertia die, aut tardius, superveniunt exanthemata, quæ maculas rubras, inæquales, plus minus latas exhibent; istæ maculæ quandoque ita ad invicem conveniunt, ut uniformem per corpus scarlatinum colorem præseferant; ista eruptio fit primo in facie, collo, faucibus, pectore; tandem in dorso, abdomine, & in reliquo corpore.

Si fauces inspiciamus, videbimus omnes earum partes, ut palatum, tonsillas, uvulam, linguam, laryngem, pharyngem aliaque ibidem sita organa, rubere, &  
tu-

tumere ; quod etiam in facie , & reliquo in corpore nunc magis nunc minus observatur. Ex quo evenit , ut ægri nec deglutire , nec respirare , ne quidem loqui valeant ; & nisi præsentaneum afferatur auxilium , brevi suffocentur.

## IV.

Hæc exanthemata , quia primis morbi diebus colorem rubrum cinabarinum repræsentant , scarlatina vocari solent.

Verum ad finem vergente ab eruptione die tertia , aut ineunte quarta , hæc ipsa exanthemata pallidiora fiunt , & tandem successive , nimirum , quæ primo eruperant prius , alia vero tardius evanescent.

Interim hoc observavi , quod exanthemata scarlatina primis etiam morbi diebus facile , & sæpius variare soleant ; nam nunc magis , nunc minus rubent ; nunc plura , nunc pauciora in peripheria corporis conspiciuntur.

## V.



## V.

Ast hic speciale phœnomenon, quod sub finem horum exanthematum sæpe, quamvis non semper observatur, exponendum restat; videlicet die sexta, aut septima post eruptionem scarlatinæ, certæ papulæ, seu pustulæ sat frequentes, præsertim vero in pedibus, & manibus in conspectum veniunt, quæ miliaria alba vtcunque referre videntur, quæ ex ratione multis in hoc morbo minus expertis imponunt, ut tales pro miliaribus venditent; ast si istæ intime explorentur toto cœlo a miliaribus differre observantur; nam sunt meræ vesiculæ vacuæ, quæ a separatione, & elevatione epidermidis dependent; & nil nisi aëra in se continent; unde fit, ut dein latiores factæ, & suo volumine auctæ decorticationi cutis, de qua mox dicemus, fundamenta præbeant. Ego data opera plures & sæpius tales pustu-

stulas, aut dixero potius vesiculas, dis-  
cidi, & semper tales, ut descripsi, inveni.

## VI.

Igitur ex hoc ipso mirabili phœno-  
meno exurgit aliud adhuc majore admira-  
tione, & attentione dignum: nimirum  
cutis decorticatio. Hæc fit, in facie,  
collo, pectore &c. sed præcipue in mani-  
bus & pedibus; ita, ut lamellæ integræ  
sat longæ, latæ, & densæ abscedant, &  
separentur.

Observavi, quod ista decorticatio eo  
major fit, quo magis cutis exanthemate  
scarlatinæ oblita, & occupata erat.

## VII.

Sed neque hic finis malorum, quæ  
a scarlatina dependere solent, nam dum  
æger nonam decimam, aut undecimam at-  
tigerit morbi diem, incipit placide dor-  
mire, cibos appetere, aliisque functioni-  
bus bene, & fere naturaliter fungi, sic-  
que omnia morbi pericula superasse vide-  
tur;

tur; unde fit, ut parentes, adstantes, quinimo sæpe etiam medentes, ægrotum tunc in vado constitutum esse credant. Ast falluntur; superest enim majus jam superato periculum; etenim die decima quarta aut decima quinta aliquando etiam tardius a dissipata scarlatina ægrotus incipit fieri languidus, debilis, morosus; ac tandem toto corpore tumidus; nam non tantum facies, sed & pedes, manus, pectus, abdomen, & scrotum, denique universum corpus, leucophlegmatico turgēt tumore. Urinæ secedunt sat paucæ, & quod admiratione dignum, plerumque cruentæ, aut loturæ carniū similes.

Iste tumor manifestat se primo in facie, & dein in reliquis corporis partibus. Vidi, quod aliquando ita increseat, ut luce capiantur ægri, & nec pedibus insistere, multo minus progredi, valeant.

## VIII.

De hoc hydropico tumore sequentes observationes notari debent: & quidem

Primo, quod iste leucophlegmaticus status superveniat potissimum illis, qui copiosis aut malignis scarlatinæ exanthematibus afficiuntur. Vidi tamen benignissimæ scarlatinæ ingentem totius corporis tumorem advenisse.

Secundo, quod illi, qui majorem cutis decorticationem experiuntur, soleant etiam magis tumere, quam alii. Interim observavi valde magnum tumorem in aliquibus, qui nullam experiebantur decorticationem.

Tertio, quod infantes facilius, & magis tumeant, quam illi, qui sunt ætate provectiores.

Quarto, quod ægri magis tumeant in hyeme, quam in æstate; item illi magis, qui temporius libero se exponunt aëri, quam qui in debita transpiratione degunt.

Tan-

Tandem quinto, quod iste hydropicus status periculofior fit, & plures exinde moriantur, quam ex primo scarlatinæ statu.

## IX.

Ex quibus inferre possumus, quod scarlatina optimo jure in duos possit, & debeat dividi status, seu stadia, aut periodos, aut etiam typos dicendos. Primum scarlatinæ stadium complectitur omnia illa, quæ a principio morbi usque ad illum leucophlegmaticum tumorem eveniunt, quod tempus est viginti & aliquot dierum.

Ad secundum vero stadium referri debent omnia, quæ sub & post prædictum tumorem observari, & contingere solent. Hæc duo tempora debent necessario inter se distingui, quia medentium diversam exigunt attentionem, & curationem.

Interea notari velim, secundum stadium non ita arcte cum primo necti, ut

abesse non possit; multos enim vidi, scarlatina laborantes, si necessariæ cautelæ adhiberentur, a prædicto tumore liberos fuisse. Verum tamen ingenue fateor, quod, quamvis sæpe omnes possibiles cautelas in usum vocarim, nihilominus periculosus ille hydropicus tumor, aliquando secutus fuerit.

## X.

Hæc sunt præcipua, & fere communia symptomata, quæ scarlatinam comitari, aut subsequi solent.

Dantur autem adhuc alia symptomata, quæ anomala, aut adiaphora dici possunt; & quæ cum scarlatina aliquando conjunguntur, aut illam sequuntur. Talia sunt: hæmorrhagia narium, tussis, saliva cruenta, molesta sternutatio, glandularum colli, & parotidum tumor, obauditio, aut surditas; purpura tam alba, quam rubra, quæ quandoque cum scarlatina conjungitur, aut illam excipit. Præterea diversi quandoque solent fieri tam inter-

interne, quam externe, ut in faucibus, in auribus, pectore, aliisque partibus, abscessus.

## XI.

Notabiles sunt quidam scarlatinæ speciales casus: In his enim videntur ægri secundis velis procedere, neque in ægris quidquam apparet, quo quidquam mali ominari valeamus; ast die morbi septima, aut octava, aut etiam tardius ægri fiunt inquieti, mox convelluntur, delirant, tristes clamores sæpe edunt, & continuo e lecto profilire nituntur.

Iste horrendus & lamentabilis status aliquot horis magis, aliis vero minus affligit; & aliquando ad duas, tresve hebdomadas extenditur, ægros viribus exhaurit, & plerumque e medio tollit.

Hic notatu dignum est, quod in similibus ægris nec cutis decorticationem, nec prædictum hydropicum tumorem unquam observaverim. Adeoque suspicari licet,

materiam illam exanthematicam ad cerebrum versam, ibidem sedem fixisse, & hanc tragœdiam luisse. Tales casus habui in filiis perillustrium DD. de Schmidt, de Eckenstorff, & de Stab, qui exinde denati sunt. Erant vero alii in eodem periculoso statu constituti, (inter quos fuit mea filia natu major) qui favore Numinis sanitati restituebantur, ut dein in observationibus clarius patebit.

Hæc sunt, quæ multorum annorum decursu in scarlatina observavi symptomata. Videamus nunc, quid alii illustres, & experti in praxi medica Viri de eadem observarint, nobisque communicarint, & qua ratione illorum observationes cum nostris consentiant, aut dissentiant.



## S E C T I O II.

*Exponit diversas celeberrimorum de scarlatina  
relationes, & observationes, cum annexa  
modesta epicrisi.*

## XII.

Expertissimus & indefessus morborum  
observator, Sydenham, capite secundo  
& alibi sequentia de scarlatina affert.

„ Aestate exeunte infantes præcipue in-  
„ festat. Rigent & horrent sub initium;  
„ nec tamen admodum ægrotant; cu-  
„ tis universa maculis parvis, rubris,  
„ crebrioribus, latioribus, & magis ru-  
„ bentibus, quam in morbillis interstin-  
„ guitur. Ad duos, tresve dies perfi-  
„ stunt, quo quidem tempore evanescunt,  
„ & decedente subjecta cuticula, squa-  
„ mulis furfuraceis ad instar farinæ, cutis  
„ conspergitur.

De Scarlatinæ curatione sequentia  
habet capite secundo.

„ Cum hic morbus nil aliud mihi videatur,  
„ tur, quam mediocris sanguinis effer-  
„ vescentia - - - nihil quidquam mo-  
„ lior - - - fatis habeo, ut æger a car-  
„ nibus in solidum abstineat, & a liquo-  
„ ribus spirituosus quibuscunque, tum ut  
„ neque usquam foras prodeat, neque  
„ se perpetim lecto affigat. - - - Sim-  
„ plici hac & naturali plane methodo  
„ hoc morbi nomen (vix enim altius af-  
„ surgit) sine molestia, aut periculo quo-  
„ vis facillime abigitur.

„ Veruntamen hoc animadvertendum  
„ volo: si convulsiones epilepticæ, aut  
„ etiam coma huic morbo sub initium  
„ eruptionis supervenerint, (quod quan-  
„ doque accidit in pueris ac junioribus  
„ hoc morbo laborantibus) omnino oportet,  
„ ut epispasticum amplum, ac for

„ te

„ te posteriori cervici applicetur , atque  
 „ porro , ut paregoricum e Syrupo de  
 „ meconio statim exhibeatur , repeten-  
 „ dum singulis noctibus , usque dum con-  
 „ valuerit , imperando interim , ut æger  
 „ bibat pro potu ordinario , lac cum tri-  
 „ plo aquæ coctum , & a carnis usu ab-  
 „ stineat.

## XIII.

Brevis & succincta epicrasis eorum ,  
 quæ Clar. Sydenham de scarlatina effa-  
 tus est.

Primo enim intuitu ex data de scar-  
 latina descriptione cuilibet patebit , quod  
 Sydenham scarlatinam in se tantum beni-  
 gnissimam agnoverit , & delineaverit ; nam  
 dicit , quod *leniter agrotent , eadem affecti* ;  
 & quod *tantum nomen morbi babeat* , præ-  
 tereaque nihil , & tandem quod unicum  
 diætæ regimen requiratur , ut abigatur.  
 Quæ omnia , ut candide ego ipse fatear ,  
 scarlatinam benignam tantum attingunt ;

minime vero malignam ; quæ , ut dein patebit , morbus acutissimus & periculossimus esse solet. Unde credendum est a Sydenhamo , nullum aliud notabile symptoma in scarlatina præter convulsiones , aut coma unquam observatum fuisse ; quia alias , sicut alibi in describendis morbis , illorumque symptomatibus perquam sedulum , & accuratissimum se exhibuit ; hic quoque aliorum meminisset , si talia unquam observasset.

## XIV.

Interim satis mirari non valeo , quod Richardus Mortonus , celeberrimus quondam in Anglia Medicus practicus , & Sydenhamo coævus scarlatinam malignam observavit , & descripserit , quæ Sydenhamum latere videtur.

Quinimo magis adhuc miror , quod Daniel Sennertus celeberrimus quondam Practicus sæculo jam præcedente , adeoque

que longe ante Sydenham de scarlatina maligna scripserit, cujus Sydenham non meminit, quod inferius clarius patebit.

Ast quamvis Clarissimus Mortonius de scarlatina maligna mentionem faciat, in alio vero casu, vix alicui modernorum arridere poterit, ubi scarlatinam cum morbillis confundit, & unum eundemque morbum esse judicat. Sic enim capite V. de scarlatina ait;

*Hunc morbum, nimirum scarlatinam, prorsus eundem esse cum morbillis censéo. - -*

*Uterque eadem prorsus prognostica indifferenter ministrat; nec minus eandem plane medendi methodum postulat: & plura similia. Dein vero ostendam, hos duos specie diversos esse morbos; adeoque debere habere aliam prognosim, & aliam curationem. Ego sancte & candide fateri possum, quod ex tot centenis ægris morbillis laborantibus, qui meæ curæ se commiserant,*

neminem amiserim; quinimo ex aliis eodem morbo affectis, & aliorum medicorum curæ commissis, rarissime quempiam exinde denatum legerim aut viderim. Contrarium autem obtinere in scarlatina maligna omnes hujates medici practici norunt. Adeoque exinde jam elucescit, scarlatinam, & morbillos specie diversos esse morbos.

Accedit, quod ordinaria contagii lege a scarlatina scarlatina; a morbillis vero morbilli contrahantur, & ultro propagentur.

Ex his ultro constat, quantum Sydenhamii & Mortonii de scarlatina judicium, & observationes a nostris superius expositis differant; neque enim reor necessarium esse, ut per partes ostendam, quæ cuilibet hæc legenti patent.

### XV.

Videamus ultro, quid Eruditissimus & in republica litteraria Meritissimus D.  
Joann.

Joann. de Gorter, Professor in Hollandia Celeberr. de scarlatina sentiat. In suo systemate praxeos medicæ Tom. II. pag. 196. de scarlatina sic effatur.

„ Macularum Scarlatinus color, quæ  
 „ in levi febre oboriuntur; huic morbo  
 „ dedit nomen, incipiunt plerumque in  
 „ tenella ætate, tertio, vel quarto die  
 „ febris levioris, non diu persistunt, in-  
 „ sensibiliter evanescunt, relictis in cute  
 „ quibusdam furfuribus; in facie incho-  
 „ are solent sensim latiores factæ maculæ,  
 „ reliquum etiam interdum tegunt cor-  
 „ pus. Levis videtur biliosa corruptio  
 „ calore antecedentis æstatis in tenella  
 „ ætate, motu febrili ad cutim pulsa,  
 „ ubi exarescens materia corpus relinquit  
 „ sanum. (a)

„ Hæc materia ante eruptionem ober-  
 „ rans generat febrem, calorem, dolo-  
 „ rem, anxietatem, tussim, sine pericu-  
 „ lo. (b).

## LVI.

Si hæc cum illis, quæ Clarissimus Sydenham de scarlatina nobis communicavit, combinentur, videntur quoad omnia ad invicem convenire, adeoque scarlatinam benignam, minime vero malignam, multo minus illa funesta confectaria, quæ in secunda ejus periodo evenire solent, attingere. Hoc patet ex illis, (a) ubi dicit, quod *exarescens materia corpus sanum relinquat*. Item (b) quod *generet febrem, calorem, dolorem, anxietatem, tussim sine periculo*.

Interim si tempora combinare licet, quibus Eruditissimus, Magnificentissimus D. Archiater de Haen in sua ratione medendi asserit scarlatinam, per quam malignam 1748. in Hollandia grassatam fuisse, mirari fatis non valeo, quod Clar. D. de Gorter, qui 1750, adeoque bien-

ga-



gavit, nullam de prædictæ scarlatinæ malignitate mentionem faciat.

Hic essent alii plures celebres medici practici, ut Nenterus, Junckerus, Dover, alique plures adducendi, qui, sicut Sydenham, scarlatinam vix aliquam curam, aut attentionem mereri fatentur; quapropter etiam omittuntur. Interim ultimi tantum Autoris in idioma gallicum versi (*legs d'un ancien Medecin à sa patrie*) aliquot vocabulorum meminisse oportet, ut coram constet, quod scarlatinam, alias sæpe funestissimum morbum, flocci faciat; postquam enim de morbillis egerat, sic effatur:

„ Cette fièvre est d'un genre encore  
 „ plus doux, & plus traitable, que ce-  
 „ lui de la Rugeole, & n'a pas besoin  
 „ de l'assistance du Medecin.

## XVII.

Superfunt tamen alii, graves autores, qui quamvis non exquisite, debito-  
 que

que ordine, nihilominus tamen melius & magis apposite scarlatinæ decursum explanarunt. Sic in *Ephemerid. nat. cur. ann. 6. & 7. observ. 145. pag. 206.* sub specie purpuræ scarlatinam descriptam invenio a D. Simone Schulzio, ubi agit de purpura maligna infantum hoc modo:

„ Cum 1664 hiems mollis; & pluvio-  
 „ sa esset, grassabatur apud nos vere pri-  
 „ mo insequente purpura epidemica ma-  
 „ ligna, quæ per totam æstatem, & au-  
 „ tumnum usque in hiemem sæviebat,  
 „ plurimosque infantes utriusque sexus,  
 „ & duodecimum annum attingentes (nam  
 „ ultra hanc ætatem vix ascendebat,)   
 „ perimebat. Plerique secunda die mor-  
 „ bi, nonnulli etiam prima moriebantur;  
 „ illi solummodo evadebant, qui nulla  
 „ faucium inflammatione vel tumore æde-  
 „ matofo (variabant enim ista pro diver-  
 „ sitate naturarum) infestabantur. Tum  
 „ omnibus ab isto morbo liberatis post

„ piosum sudorem ( nonnullis etiam di-  
 „ arrhæa , sed tantum unius , vel alte-  
 „ rius diei critica profuit ) squamæ deci-  
 „ debant , rubore cutis evanescente. Tan-  
 „ dem , præsertim natu majoribus tumor  
 „ totius corporis instar leucophlegmatæ,  
 „ & infimi ventris sequebatur , qui per  
 „ aliquot septimanas miseris molestus erat;  
 „ sudoreque etiam solvebatur , interdum  
 „ etiam largius profluente in curatione  
 „ admiscebantur sudorificis bezoardica.

Hic videmus sub nomine purpuræ de-  
 pictam scarlatinam epidemicam perquam  
 malignam, quæ aliquando prima, aliquan-  
 do secunda morbi die ægros trucidare so-  
 lebat. Hic annotantur periculosissima ejus  
 symptomata , nimirum , faucium inflam-  
 matio , & tumor leucophlegmaticus. Sa-  
 ne dein patebit , quod plurimi scarlatina  
 laborantes ex his duobus funestissimis sym-  
 ptomatibus e medio tollantur. Quod ve-  
 ro curationem scarlatinæ concernit , dici-  
 tur

tur illa in bezoardicis & fudoriferis ad invicem mixtas confistere ; verum dein patebit , quod , si talia remedia volatilia sint , plus detrimenti , quam emolumenti in hoc morbo afferant ; si vero sint insipida , terrestria , & fixa , inania sint medicamenta , & quæ , si in primis viis nullum adsit acidum , una cum excrementis per alvum deturbari soleant.

## XVIII.

Sequentia etiam de scarlatina legimus in Actis. Med. Berol. Decad. prima Volum. 2<sup>do</sup> pag. 20. & sequentibus. „ In-  
 „ vasit febris scarlatina patientes cum ri-  
 „ goribus , cephalalgia , & cardiaca nau-  
 „ sea , quam excipiunt , communiter  
 „ vomitus ; efflorescit quarto , vel quin-  
 „ to die sensim , atque sensim post præ-  
 „ cedaneam asperam papillarum cuta-  
 „ nearum elevationem rubedine per uni-  
 „ versum corpus a capite usque ad cal-  
 „ cem

„ cem cum cutis aliquali intumescencia ,  
„ ita, ut patientum externus aspectus re-  
„ ferat ideam cocti cancri. Ista rubedo  
„ interiora narium, limbosque & angu-  
„ los oculorum obducit, - - versus se-  
„ ptimum diem sine sudoribus rubor iste  
„ fit remissior, cuticulaque inchoat de-  
„ squamari, & tunc maxime, dum mor-  
„ bus declinare videtur; fauces aphtho-  
„ deo-inflammatoria congestione (a) pe-  
„ riclitantur.

Reliqua vero, quæ ibidem paginis  
sequentibus habentur, ad nostrum sco-  
pum vix pertinent; dicitur nimirum scar-  
latina a Belgis *Rood-bont* appellari; unde  
etiam factum esse Christ. Joannes Langi-  
us asserit, ut scarlatina in Saxonia *der*  
*rothe Hund* vocetur. Lindanus vero  
illud exanthema, quod Belgæ *Rood-bont*  
appellant, ait, esse pustulas rubicundissi-  
mas instar flammæ urentes; quæ potius  
ad rosalia, aut urticatam referri debent,

quam ad scarlatinam , quæ non in pustulis , sed maculis rubicundis consistit.

Eadem fere de scarlatina legi possunt ibidem Vol. VI. pag. 21.

## XIX.

Quantumvis itaque hic videatur scarlatina maligna secundum quid exposita esse , ejusdem tamen curatio non alia, quam supra dicta Sydenhamiana adducitur; quæ, quamvis omni scarlatinæ conveniat, est tamen impar hæc sola illis , quæ scarlatinam malignam concomitari , aut sequi solent , tollendis diris symptomatibus.

(a) Hic dicuntur fauces inflammatoria congestione affici dum morbus declinare videtur, quod circa octavam, aut nonam morbi diem contingere deberet.

Ego ingenue fateor, quod primis tribus aut quatuor morbi diebus plerumque talem anginam inflammatoriam observaverim, rarissime tardius; ut dein ex observationibus patebit.

## XX.

## XX.

Duo adhuc supersunt celebres de scarlatina Scriptores. Unus est Daniel Sennertus, Archiater Saxonicus, & celeberrimus quondam Medicus practicus, qui jam sub initium sæculi præcedentis, adeoque fere primus scarlatinam quamvis anonymæ, interim sat apte ad rem descripsit; quæ enim Forestus lib. 6. observ. 41. & 59. affert, potius ad purpuram, quam ad scarlatinam referri debent.

Alter vero recentissimus & eruditissimus autor, & scriptor est D. de Navier Academiæ scientiarum Parisinæ socius, qui idiomate gallico dissertationem epistolarem de diversis morbis epidemicis 1753 edidit, publicique juris fecit.

Clarissimus Daniel Sennertus libr. IV. de febribus cap. XII. de variolis & morbillis scarlatinam sub specie morbi anonymi sic descripsit:

„ Præter has differentias adhuc alia  
„ est, sed rarior quidem, quam aliquo-  
„ ties observavi; quo nomine autem ab  
„ aliis discernerem, hætenus dubius fui;  
„ etsi enim instar erysipelatis totum fere  
„ corpusprehendat, tamen non vidi, quod  
„ adultos (a) quod in erysipelate fere  
„ fieri solet, sed infantes solum corripiat.  
„ Mælo ergo ad morbillos referre; &  
„ forsân malum est, quod Forestus lib. 6.  
„ observ. 59. Purpuram & rubores appel-  
„ lat. Joann. Philipp. Ingrassias rosariam  
„ a Neapolitanis nominari scribit. (b)  
„ Maculæ rubræ & quasi ignitæ cum  
„ vix effatu digno tumore per universum  
„ corpus, quasi parva erysipelata erum-  
„ punt in principio, seu morbi die quar-  
„ to, vel quinto (c) In statu vero univer-  
„ sum corpus rubrum, & quasi ignitum ap-  
„ paret, ac si universali erysipelate labora-  
„ ret. (d) In declinatione rubor ille immi-  
„ nui, & maculæ rubræ latæ, ut in principio  
„ ite-



„ iterum apparent, quæ tandem septimo  
 „ vel nono die evanescunt, epidermide  
 „ squamarum instar decedente.

„ Malum hoc grave, periculosum, &  
 „ sæpe lethale est; nam calor est ferventif-  
 „ simus, fitis inextinguibilis & plerumque  
 „ pulmonum (unde tusses excitantur) fau-  
 „ cium, & aliorum viscerum inflammatio-  
 „ nes, deliria, & alia mala urgent (e)

„ In declinatione tandem materia ad  
 „ articulos extremorum transfertur, ac  
 „ dolorem, & ruborem, ut in arthriticis  
 „ excitat, cutis squamarum instar deci-  
 „ dit; mox pedes ad talos, & furas us-  
 „ que intumescunt; hypochondria læ-  
 „ duntur, respiratio difficilior redditur,  
 „ tandemque abdomen intumescit, (f)  
 „ ægrique non sine magno labore, & post  
 „ longum tempus pristinae sanitati resti-  
 „ tuuntur, sæpe etiam moriuntur. - -

Et reliqua, quæ quilibet, si lubet,  
 ibidem legere potest. Eruditissimus hic as-

ferit, quod Scarlatinam in adultis nec dum observaverit (a) unde judicat, esse morbum infantum; fane hoc modernis & repetitis observationibus videtur esse conforme; quia, ut dein videbimus, rarissime adultorum aliquis eadem affligitur.

Neque mirum cuiquam videbitur, si clarissimus Sennertus dubius hæreat, an ad morbillos, ad purpuram, aut rosali-  
am, talem morbum referre debeat, ut (b) cum nostro adhuc tempore multi illustres viri easdem erroneas soleant imbibe-  
re opiniones, sed dein ostendam, scarla-  
tinam esse morbum ab omnibus his diver-  
sum. Præterea unicuique hæc attente le-  
genti, & consideranti patebit, quod fa-  
mosissimus quondam Practicus Sennertus  
videatur hic vix non omnia, aut saltem  
præcipua scarlatinæ malignæ recensere  
symptomata, ut (c) (d) (e) & (f)  
clare demonstrant, exceptis tantum qui-  
bus-

busdam ; quæ partim ex jam dictis , partim ex dein dicendis patere possunt.

Quapropter fatis mirari non possum, quod tot, & tam illustres autores, qui post illum de morbis, in specie vero de scarlatina scripserunt, tam mance & defectuose eandem explanarint, & cum Sydenhamio scarlatinam benignam, nullo modo malignam descripserint, & exscripserint.

## XXI.

Clarissimus autem & recentissimus de scarlatina, aliisque morbis epidemicis scriptor D. de Navier sequentia de scarlatina nobis communicavit:

„ Variolis tandem a mediocri orto frigore fere penitus extinctis, tempestate dein paulo mitius facta alius apparuit epidemicus morbus variolis longe magis inflammatorius, febris nimirum rubra, scarlatina dicta. Hic morbus per febrem admodum vehementem se manifestavit, quæ animi deliquiis, lassitu-

„ dinibus spontaneis, capitis fauciumque  
„ doloribus, deglutitionem impredientibus  
„ comitata erat.

„ Secundo die & sæpe post viginti qua-  
„ tuor vel triginta horas in toto corpo-  
„ re maculæ rubræ, vivido scarlatino  
„ colore, largæ, manus magnitudinem  
„ sæpe excedentes, figuræ irregularis,  
„ & dorsum, pectus, femora & nates  
„ sæpe ita tegentes, ut unica tantum esse  
„ videretur, apparuerunt. Hæ maculæ  
„ quovis fere momento disparentes, se in  
„ alia loca erysipelatis more conferre vi-  
„ debantur, in quibus antea non fuerant.  
„ Manus easdem tangens, calorem vivi-  
„ dum & ardentem præcipue in adultis,  
„ sentiebat, & cutis ruberrima digito  
„ compressa albescens remoto digito sta-  
„ tim rursus rufescebat.

„ Pulsus parvus & frequens erat, &  
„ respiratio difficilis & intercepta & sin-  
„ gultuosa in plurimis esse videbatur. Ha-  
lituo-

„ lituosus vapor e pulmonibus egrediens  
„ adeo calidus & urens deprehendebatur,  
„ ut unusquisque hunc percipiens faciem  
„ ab ægro statim avertere cogeretur. Hæc  
„ febris etiam interdum cum manuum &  
„ brachiorum inflatione conjuncta fuit,  
„ integrasque familias, aut infimul, aut  
„ successive invasit. Vidit Cl. auctor in-  
„ fantes hoc morbo laborantes, quibus  
„ prodigiosa leucophlegmatia supervenit.  
„ Quidam hac febre laborans, & usque  
„ ad palpebras leucophlegmaticus, par-  
„ tissimam brunam urinam reddens, qua-  
„ lem in hac febre sæpissime, imo in-  
„ terdum sanguinolentam fecedere asserit.  
„ Cl. auctor, præmissis præmittendis,  
„ ab omnibus symptomatibus vesicato-  
„ riorum applicatione, liberatus fuit.  
„ Quidam ventrem flatibus distentum  
„ ( dans un état de météorisme ) & lin-  
„ guam valde siccam plurimi vero humi-  
„ dam habent.

„ Iis, qui emergunt, epidermis, quin-  
„ to vel sexto die per squamas decidit,  
„ quinimo adolescenti tredecim vel qua-  
„ tuordecim annorum tota manus pedis-  
„ que cuticula exceptis unguibus decidit,  
„ quarum unam Cl. Auctor adhuc asservat.  
„ Nisi ægro statim in primo morbi im-  
„ petu succurratur, escharæ gangrænosæ  
„ in fundo faucium versus arcus & velum  
„ palati superveniunt, & hisce ortis pau-  
„ ci emergunt; hæc gangræna æsopha-  
„ gum asperamque arteriam sæpe ante  
„ occupat, quam illam percipere, illi-  
„ que mederi queamus: Progressum vero  
„ hujus internæ gangrænæ quam certissi-  
„ me impedit gangarisma ex oxymelle cum  
„ adjecto spiritu vini camphorato, qui  
„ vero Hoffmanni methodo sale alcali  
„ præparatus esse debet, ne aquosis mix-  
„ tus lactescat. Quidam hac febre rubra  
„ affecti quarto, vel quinto die eodem  
„ modo pereunt, ac si per inflammatio-  
„ nem

„ nem gangrænosam pulmonum suffoca-  
„ ti essent; alii post vehemens delirium  
„ morientis magnam saniei quantitatem  
„ per os & nares reddunt, & rubræ an-  
„ tea maculæ post mortem in quibusdam  
„ prorsus violaceæ conspiciuntur. Hæc  
„ symptomata vero in infantibus longe  
„ minus violentia sunt, remediisque fa-  
„ cile cedunt.

„ Causam hujus morbi non solum cum  
„ illa, quæ sudorem anglicum, aphtham  
„ gangrænosam, dysenteriam &c. ex-  
„ citavit, eandem esse dicit, sed in mi-  
„ asmate, quod cum morbilloso compa-  
„ rat, acri, caustico & putrefaciente  
„ consistere, ipsumque morbum analo-  
„ giam alere perhibet cum morbo epide-  
„ mico pecorum. His enim convalescen-  
„ tibus pili & epidermis eodem modo de-  
„ ciderunt, ac hominibus cuticula, &  
„ in cadaveribus pecorum apertis sem-  
„ per viscera quædam gangrænosa inve-

„ nit

„ nit Cl. Auctor. Ex pecorum igitur  
„ morbo hanc febrim per contagium or-  
„ tam esse arbitratur, eandemque cum  
„ variolis ideo quoque convenire asserit,  
„ quia magnus infantum numerus eandem  
„ brevi ante vel post variolas habuerit.  
„ Virgo quædam post hanc febrem va-  
„ riolis discretis benignissimis laboravit.

„ Venæsectio interdum ob vehemen-  
„ tiam inflammationis summe necessaria  
„ est. Præfert vero venæsectionem in  
„ brachio, illam enim in pede institutam,  
„ varia sæpius exceperunt incommoda,  
„ in primis si viscera, quod sæpissime  
„ fieri asserit, inflammatione quadam af-  
„ fecta fuerunt. In delirio vero vel co-  
„ mate jugularem quoque secare curavit.  
„ Serum lactis tamarindinum plantis-  
„ que nitrosis sociatum pro potu largo &  
„ clysmate injiciendum, post institutam  
„ venæsectionem maxime commendat.  
„ Si purgantia propter symptomatum

„ vio-



„ violentiam exhiberi non possunt, vesi-  
„ catoria inter scapulas vel in furis opti-  
„ mi effectus esse deprehenduntur. Ad  
„ refrænandum statum solidorum spasma-  
„ dicum paregorica parva dosi post pur-  
„ gationes vero majori exhibuit. Infan-  
„ tes, hac febre scarlatina decumbentes  
„ ordinarie ante febrem tussi ferina labo-  
„ rarunt, quæ vero cum febre sese im-  
„ minuit & cum illa quoque evanuit.,,  
Vide Commentar. de rebus in scientia na-  
turali & medicina gestis, Part. I. Vol.  
IV. pag. 338.

## XXII.

Quemadmodum D. Daniel Senner-  
tus omni cum fundamento primus dici de-  
bet, qui morbum, quem nunc scarlati-  
nam vocamus, sat congrue descripserat;  
ita nostro tempore non invenio scriptorem,  
qui in explanatione scarlatinæ magis, &  
melius responderet meis, quas superius jam  
adduxi, observationibus, quam sit præ-  
fatus

expertissimus D. de Navier. Hic enim præcipua scarlatinæ præsertim malignæ recenset, explanat & enumerat symptomata; periculumque, quod illis imminet, declarat, atque methodum, qua illis obviam eundum sit, egregiam exponit. In hoc vero mihi satisfacere non videtur, eo quod tempus, debitumque prædictorum symptomatum ordinem non determinet; sic exinde constare non potest, quando illa angina inflammatoria scarlatinæ advenire soleat, neque quando ille tumor leucophlegmaticus scarlatinam sequatur; ut nihil dicam de decorticatio-  
ne, aliisque symptomatis, quæ scarlatinæ junguntur, & quæ ego jam recensui.

Item asserit, quod leucophlegmaticus ille tumor in infantibus tantum observetur; ego vero talem etiam in illis, qui non tantum ex infantia, sed & ex ephebis excefferant, observavi, ut dein patebit.

Præ-

Præterea in meis de scarlatina captis experimentis dixi, quod die circiter ab eruptione sexta aut septima plerumque observari soleant, præsertim in manibus & pedibus, certæ pustulæ, albæ, aut albo flavescentes, & purpuram albam referentes; quæ si rite explorentur, nil nisi aëra in se continent; & ideo ut superius dixi, potius vesicæ dicendæ, propter quod etiam a purpura alba distingui debent. Tales pustulas neque a nostro recentissimo scriptore, neque ab alio annotatas legi; quamvis nullus dubitem, quin tales, ut descripsi, sæpius etiam ab aliis observatæ fuerint.

## XXIII.

Tandem aliqua adhuc hic offendo de causis, & curatione scarlatinæ, quæ meis de contagio principiis contrariantur. Quare spero fore, ut Cl. Autor innata sua humanitate patiatur, quædam scholia, serva-

fervatis pariter debitis humanitatis legibus , sibi opponi.

Sic enim causam materiale scarlatinæ cum illa , quæ morbillorum , sudoris Anglici , & aphtharum est , comparat & eandem esse judicat.

Item asserit , scarlatinam esse morbum analogum morbo epidemico pecorum ; rationem asserit , quia in tali morbo epidemico pili & epidermis , sicut in scarlatina , decidere solent. Unde credit , quod ex tali pecorum morbo per contagium scarlatina ortum & originem duxerit.

#### XXIV.

Quod autem causa materialis scarlatinæ specie distincta sit a causa materiali morbillorum , sudoris Anglici , aphtharum , aliorumque morborum , constat exinde , quia ordinaria contagii lege videmus , a scarlatina scarlatinam , non vero morbillos , aphthas , aliosque morbos ultro propagari & multiplicari. Item  
aph-

Aphthæ solent occupare tantum os internum, fauces, aliasque partes adjacentes, non vero totum habitum corporis externum, ut scarlatina. Tandem in Aphthis sunt pustulæ, in scarlatina vero sunt maculæ, quæ nullam præferunt ultra cutem elevationem aut eminentiam.

Quapropter per se corrui illa scarlatinæ analogia cum morbo contagioso & epidemico pecorum; multo magis vero ortus scarlatinæ a tali pecorum morbo; quæ sententia fere coincidit cum illa Clarissimi Listeri & Mead de ortu variolarum a morfu bestiolæ venenatæ, de qua jam superius in tractatu de variolis diximus.

Præterea huic sententiæ officit, quia deberemus sæpius observare, quod hoc tempore non tantum scarlatinæ contagium a pecoribus ad homines, sed quod etiam ab hominibus ad pecora propagetur, quod certe nullus adhuc observavit; quin hoc ipsum primis de contagio principiis adver-

fatur; diximus enim in tractatu de contagio; aliam esse luem bovinam, aliam ovina, aliam caninam, & aliam humanam.

## XXV.

Quod vero curationem scarlatinæ concernit ( unico excepto gargarismate cum spiritu vini confecto ) judico perquam apposite talem institutam fuisse. Cum enim scarlatina in methodo medendi tanquam morbus inflammatorius ab expertissimo Viro consideretur, sic debet necessario sanguis mitti, item debent omnia diluentia & emollientia antiphlogistica in usum vocari.

Quare optime factum esse censeo, quod venæsectio fuerit instituta, serum lactis tamarindinum, diversis plantis nitrosis sociatum fuerit ægris in magna quantitate exhibitum; similia pariter clysmata injecta, & tandem pro rerum exigentiâ verificantia apposita fuerint. De quibus omnibus dein, dum nostram de eodem morbo

curationem proponemus, prolixior erit sermo.

Interim cum hæc propter statum inflammatorium fiant, ex eodem fundamento ego sane non auderem, illud gargarisma ex oxymelle & spiritu vini camphorato in usum vocare; quia quamvis cum sale alcali methodo Hoffmanniana præparetur, gaudet tamen semper particulis acris irritantibus & volatilibus, a quibus metuendum est, ne faucium inflammatio potius augeatur, quam minuatur. Si vero illa deglutitio difficilis sit sine inflammatione, ut in scarlatina benigna aliisque rheumaticis defluxionibus contingere solet, tunc nullus abhorrerem, quinimo simile gargarisma ad impediendum ulteriorem ad partem affectam affluxum lubens suaderem.

## XXVI.

Ex his, quas ego superius adduxi, & aliis, quas alii illustres practici annotarunt, observationibus, quisque cognos-

cet, & ut spero lubens fatebitur, scarlatinæ præcipue malignæ historiam, æthiologiam, præsertim vero curationem ad hæc usque tempora fat mancā, incongruam & inadæquatam fuisse; adeoque in his multa adhuc desiderari; quibus ego pro modulo & tenuitate mea saltem quoad quid satisfacere conabor; reliqua vero aliis perficienda relinquam. Interim si quis ex his, quæ jam dicta sunt, scarlatinæ definitionem seu descriptionem expostulet, sequens ex his erui poterit: nimirum, quod scarlatina sit morbus exanthematicus contagiosus & infantibus familiaris, in quo maculæ rubræ, plus minus latæ primo faciem, collum, pectus, dein universum corpus obsident; intra triduum aut quadriduum, aliquando tardius evanescentes; nunc majorem, nunc minorem, aliquando etiam nullam comitem habentes febrem, ac tandem diversis aliis, prout benignæ aut malignæ sunt, stipatæ symptomatibus.

Hæc



Hæc scarlatinæ generica descriptio determinat non tantum, quid sit, sed etiam quotuplex sit scarlatina, & quomodo ab aliis morbis exanthematicis differat. Quare fit

### SECTION III.

*De divisione & differentiis scarlatinæ.*

#### XXVII.

Princeps & necessaria divisio scarlatinæ est in benignam & malignam; benignam illam vocamus, quæ levissimis & vix molestis stipata est symptomatibus; qualis jam superius a Clariss. Sydenhamio descripta fuit. Maligna vero periculosa & atrocia secum fert symptomata. Hæc est quidem generica scarlatinæ benignæ & malignæ descriptio, interim necesse erit, ut indicemus, quæ sint illa symptomata,

quæ scarlatinam benignam & malignam comitari solent, ut differentia unius ab altero eo magis & clarius unicuique pateat; quod eo magis necessarium esse iudico, quo plus ex observationibus constat, a scarlatina benigna nihil, a maligna vero plurimum metuendum esse. Scarlatina itaque benigna solet alias sanos, aliquando cum levissima aliquando etiam sine aliqua sensibili febre inopinato invadere, aliquando prima, aliquando secunda die, quandoque etiam tardius maculæ rubræ primo in facie, collo, & dein in reliquo corpore in conspectum veniunt; sicque tridui, aut quatruidui, raro diutius, & sine magna molestia perdurant, & tandem sæpe sine omni desquamatione terminantur, quamvis Sydenham dicat, illas cum desquamatione terminari. Infantes tali scarlatina laborantes bene appetunt, & placide dormiunt, reliquasque functiones sine labore peragunt.

Hic

Hic tamen probe notandum esse iudico, quod quandoquidem scarlatinæ etiam benignæ post quindecim aut sexdecim a scarlatina elapsos dies supervenire soleat leucophlegmaticus ille tumor, qui multo plus negotii, & ægro & medenti, quam ipsa scarlatina faceffere consuevit.

## XXVIII.

Aliter vero se habent symptomata in scarlatina maligna; nam ingens prostratio virium uti & appetitus, inopinato accidere solet, tandem sequitur vomitus; aliquando, sed raro diarrhæa; adsunt dolores capitis, febris & fitis magna; inquietudines, anxietates, vigiliæ, sopor, aliquando delirium; tandem aliquando prima, aliquando secunda, aut tertia die in conspectum venit scarlatina; hoc tempore fauces dolent, tument, rubent; ut non tantum deglutitio, sed & loquela difficilis reddatur.

Hæc scarlatina maligna diutius solet habitum corporis occupare, quam benigna; nimirum aliquando ad sextam, aut septimam protrahitur diem. Ulla vero alterave die, antequam evanescat, exurgunt in cute, ut superius jam exposueram, illa phymata seu quædam vesiculæ, purpuram albam referentes, quæ majores & ampliores spatio bidui factæ flaccescunt & collabuntur; sicque illi mirabili decorticationi, quam superius descripsi, fundamenta præbent.

Hic pariter probe notandum est, quod prædictæ vesiculæ, præsertim, dum ampliores fiunt, videantur externa facie esse similes variolis spuriiis lymphaticis dictis.

Ast magna est inter ipsas differentia, quia, si tales variolæ lymphaticæ aperiuntur, serum aliquod in se continent, in nostro vero casu semper observavi tales vesiculas esse vacuas.

Tan-

Tandem scarlatinam malignam sequitur plerumque superius jam descriptus tumor leucophlegmaticus, qui in benigna raro observatur.

Unde ex his, quæ hætenus dicta sunt, facile patet differentia scarlatinæ benignæ a maligna, quam quisque in praxi medica expertus non tantum in statu, sed jam ab initio morbi facile cognoscet.

### XXIX.

Exanthemata scarlatina multis imposuerunt, & etiamnum imponere solent, ut illa aut pro petechiis, aut pro morbillis, aut pro purpura venditari soleant; quare nunc ostendam, quæ sit differentia scarlatinæ a petechiis, morbillis, purpura, urticata, rosalia, aliisque exanthematibus.

Petechiæ enim raro ante quartam diem morbi erumpunt; scarlatina vero aliquando secunda aut tertia die in conspectum venit. Secundo scarlatina faciem & totum corpus occupat; petechiæ vero collum,

pectus, dorsum & lumbos obsident. Tandem petechiæ sunt distinctæ maculæ, scarlatina vero habet unam continuam cutis rubedinem.

Scarlatina differt a purpura per id, quod purpura habeat papulas ultra cutis superficiem prominentes, scarlatina vero habeat maculas, quæ cutis superficiem non excedunt. Item purpura nunquam statim sub initium morbi in conspectum venit, sicut scarlatina.

Eadem ratione differt etiam scarlatina a morbillis, quod videlicet morbilli sint exanthemata supra cutem aliquantum prominentia, nec tam lata, ut in scarlatina præterea cum morbillis jungitur molesta tussis, coryza, & oculorum stillicidium, quæ in scarlatina non observantur.

Ex iisdem pariter rationibus differentia scarlatinæ facile eruitur ab aliis exanthematibus, ut rosalia, urticata, erysipelate, & maculis scorbuticis; quia priora prominentia habent exanthemata; erysi-

si pelias vero unam tantum corporis partem occupat, scarlatina autem totum corpus; & tandem maculæ scorbuticæ non rubent, ut scarlatina, sed livent, item sunt sine febre, diuque corpus defœdant.

Hæc, quæ nunc de divisione & differentiis scarlatinæ dicta sunt, inserviunt pariter pro faciendâ scarlatinæ diagnosi; unde superfluum fore judico, diagnosin separatim tractare, ejusque signa distinctiva adducere, quia ex his jam facile cognosci potest, quæ benigna & quæ maligna dici debeat; item ex iisdem scarlatina facile a morbillis, purpura, aliisque supra dictis exanthematibus distingui potest.

---

## SECTION IV.

*De scarlatinæ causis.*

XXX.

Quemadmodum aliorum morborum tam internas, quam externas, tam pro-

ximas, quam procatarcticas quisque medicus debet indagare causas, ita pariter nostra interest, scarlatinæ inquirere & assignare causas, quæ scarlatinam ab aliis exanthematibus distinguant, quod, ut eo facilius assequamur, sequentes observationes notandæ & præmittendæ erunt, ut

Primo, quod scarlatina plerumque epidemice grassari soleat, etenim uno alterove anno plures, alio vero neminem affligere solet.

Secundo, quod talis scarlatinæ epidemia, quamvis Sydenhamius illam ad autumnum tantum referat, quolibet anni tempore grassari soleat; interim viginti & aliquot annorum spatio ego hic Viennæ illam sæpius circa æquinoctium vernale, quam alio tempore observavi; quo tempore etiam observarunt D.D. Schulzius, Navier, aliique.

Tertio, quod scarlatina sit affectus, qui ut plurimum infantes, illosve, qui  
non



nondum ex ephebis exceſſerunt, invadere ſoleat; quamvis ego aliquos triginta, & ultro annos natos noverim, qui ſcarlatina correpti erant. Idem legimus in Actis med. Berolin. Dec. 1. vol. VI. pag. 21. ubi legitur ſcœmina adulta ſcarlatina laboraſſe. Idem etiam obſervavit & annotavit Eruditifs. Magnific. D. Haën in ſcarlatina maligna, quæ 1748. in Hollandia graſſabatur, & infantes adultosque corripiebat.

Quarto quod ſcarlatina præcipue maligna ſit morbus ſumme contagioſus, & periculofus, qui integras familias quandoque delere ſolet, & ideo peſtis infantum vocari conſuevit. Si enim in communitate decem infantum unus eadem corripia-  
tur, vix aliquis præſentium ab ea immunis erit. Unde videtur ejus contagium facilius propagabile & multiplicabile, quam in variolis & morbillis ipſis.

Verumtamen adest hic observatio admiratione digna, quod aliquando sanguine juncti, quamvis longo locorum intervallo inter se diffiti, eodem scarlatinæ contagio afflari & fere eodem tempore laborare observati fuerint. Tales funesti casus attigerant quondam nimirum antetriginta circiter annos Nobilissimam familiam Austriacam, Comitum de Curland, cujus quinque proles diversa prædia inhabitantes, ubi nulla scarlatina grafabatur, scarlatina vix non eodem tempore corripiebantur, & summo cum nobilissimæ familiæ luctu enecabantur.

Tandem quinto, quod causa materialis scarlatinæ tam benignæ quam malignæ videatur, esse una eademque specie; ratio asserti est, quia repetitis vicibus observavi, quod contagii lege scarlatina benigna communicata fuerit aliis, in quibus malignæ notas præseferibat, & vicissim; sic in communitate aliquot infantum

tum non videntur omnes laborare maligna, neque omnes benigna. Hoc ipsum videmus in contagio variolarum, quod nimirum aliquis variolis discretis laborans easdem communicet alteri, in quo malignæ indolis notas exhibent. Verum hoc dein magis dilucidabitur, dum causa materialis scarlatinæ in aprico erit.

## XXXI.

Cum itaque ex mox antea dictis constet, causam materiale scarlatinæ esse contagiosam & multiplicabilem, debemus primo determinare in quo proprie talis causa consistat; item cum ex observationibus constet, quod talis causa materialis non semper agat, seu non semper ultro communicetur, & multiplicetur, unde debent assignari tales causæ procataceticæ, occasionales & disponentes, quæ illam causam materiale in actum deducant, ut hoc modo multiplicetur, id est, ut epidemice grassetur.

Quare

Quare, si confidero generalia contagii principia, quæ superius in tractatu de contagio adduxi, nullus dubitabo, quin statuam, quod causa materialis scarlatinæ consistat in certis feminiis animatis multiplicabilibus; eodem fere modo, uti scimus, & videmus, alia femina animalium & vegetabilium ultro propagari & multiplicari; qua ratione propter analogismum facile concipitur & explanatur, quidquid in hoc genere discutiendum occurrit.

Etenim pro certo habeo, quod si cum miasmate scarlatinæ fieret insitio, aut inoculatio, uti talis cum variolis fieri consuevit, quod scilicet scarlatina exinde exurgeret, & non alius morbus, in qua opinione eo magis confirmor, ex aliis experimentis non pridem institutis. Sic novimus, hoc modo morbillos, quin imo morbos contagiosos armentorum propagari, & multiplicari posse. Vid. Tractat. de contagio, & de variolis. Si igitur scar-

la.

latinæ variolarum , aliorumque morborum contagiosorum eadem est ratio , & modus propagandi & multiplicandi , uti in vegetabilibus , tunc sicut admittere debemus , quod in vegetabilibus fiat propagatio & multiplicatio per propria semina , idem a posteriori dicendum erit de scarlatina , aliisque contagiosis affectibus.

Quare huc quam optime quadrat , illud eruditissimi Marcelli Malpighii sapientissimum effatum : *Rerum enim natura tenebris obvoluta , cum solo analogismo pateat , tota percurrenda venit. &c.*

### XXXII.

Postquam igitur pro causa materiali scarlatinæ certa & propria semina constituissemus , superest , ut procatarcticas & occasionales seu prædisponentes assignemus causas , a quibus prædictum miasma , seu semina in actum deducantur.

Quare judico , tales procatarcticas causas a certis tempestatum mutationibus

plerumque dependere; quæ vero illæ tempestatum mutationes sint, difficile est determinatu, quia quascunque sensibiles assignavero, semper verum erit, quod sub iisdem mutationibus etiam alii morbi contagiosi, ut variolæ, morbilli, petechiæ, purpura, alique aliquando grassari soleant.

Quapropter necesse erit, ut recurramus, aut ad certos ventos talium feminiorum vectores; aut ad talium feminum certum, & debitum maturitatis terminum, ad hoc, ut dicere possimus, quod hæc feminia scilicet scarlatinæ potius, quam alia in actum deducantur.

Unde tales causas prædisponentes deduco a tempestatibus humidis præsentibus, vel prægressis, & diu durantibus, aut a certis tunc temporis flantibus ventis, Euronothis, aliisque Australibus, feminum vectoribus, illorumque evolutiones foventibus & promoventibus. Talia enim femina vel a prædictis causis affe-

fe-

afferuntur , vel inertia jam dudum latentia, in actum deducuntur, hoc est massæ humorum communicantur, ibidem evolvuntur, & multiplicantur, humores inficiunt, & conspurcant, uti superius in tractatu I. de aqua nuceriana putrida §. 74. dictum fuit; ista materia putrida exanthematica in massa humorum aucta, aliquando occupat pulmones, hepar, ventriculum, aliaque interna viscera, . alia vero subsistit, & hæret maximam partem in membrana cellulosa, ejusque vasis; unde etiam fit, ut non tantum totus corporis habitus rubicundus, sed etiam plus aut minus tumidus appareat; quin imo dein ostendam, quod subsequens ille leucophlegmaticus tumor exinde dependeat.

## XXXIII.

Iste, de quo nunc dixi, est communis & ordinarius contagia propagandi, & multiplicandi modus. Interim debemus admittere, quod causa materialis conta-

gii, five scarlatinæ, five cujusque alterius, aliquando interne in corpore lateat, diuque hæreat iners ibidem, donec a certis causis in actum deducatur, ut evolva-  
tur, efflorescat & multiplicetur. Ratio vero & necessitas, talia feminia in corpore latentia admittendi est:

Primo, quia ex observationibus habemus, quod scarlatina, uti jam diximus, de variolis & purpura (§. 21.) aliquando sporadice, & dum nulla adest epidemia, efflorescat.

Secundo, quia experientia nos docet, quod profunda, fortis imaginatio, horror, aut terror tales excitare possint morbos exanthematicos. Vid. Tractat. de contagio, & alium de variolis.

Tandem tertio, quia in prædicto casu DD. Comitum de Curland aliquot miliaribus ab invicem distantium, & scarlatina fere eodem tempore laborantium, leges ordinariæ contagii locum habere non  
pos-



possunt; quis enim admittere poterit scarlatinæ contagium ad aliquot milliarium distantiam propagatum, aliisque fratribus & sororibus communicatum fuisse?

Quapropter admittere debemus, quod talia scarlatinæ feminia in illorum corporibus præextiterint; hæc vero illis quondam communicata fuerint vel titulo hæreditario a parentibus vel ab aëre, esculentis potulantisque. Talia vero in nostris corporibus aliquando contingere, legere possumus Tractatum de contagio.

#### XXXIV.

Sed major videtur difficultas in eo, quod talia feminia brevi temporis intervallo in locis ab invicem diffitis, & ubi nulla scarlatinæ epidemia observabatur, omnes fratres & sorores prehenderit & affligerit. Hæc mira phænomena procul dubio deducere debemus, vel exinde, quod prædicta scarlatinæ feminia in corpore hospitantia sibi præfixum maturationis

& evolutionis terminum eodem fere tempore attigerint; vel quod ab illorum forti imaginatione prædicta femina fere eodem tempore, ut efflorescerent & evolverentur, in actum deducta fuerint; nam frater, qui primus scarlatina maligna laborabat intra triduum, quatrimumve exinde denatus erat; quo tristi nuncio ab aliis fratribus & sororibus accepto, debuerit necessario in iisdem non tantum tritis & mœsta idea, sed simul horror & pavor de hoc funesto morbo exoriri; ut exinde idem etiam morbus ortus fuerit. Vide Clar. Fieni elegantiss. tractatum de viribus imaginationis. Plura similia videri possunt in tractatu de contagio.

Huc enim referri potest obvia & nostris assertis analogâ observatio, quæ ex vegetabilium efflorescentia & fructificatione deduci potest; sic constat, vegetabilium semina terræ mandata aliqua citius, alia tardius efflorescere; aliqua primo anno,

no, alia secundo aut tertio, alia vero longe tardius fructificare.

Hoc ipsum videmus etiam in animalibus; quædam enim, ut insecta, & alia animalcula minima, armato tantum oculo visibilia vix nascuntur, jam multiplicant, & multiplicantur. Vide Læwenhœck de arcanis naturæ; alia vero intra unum, alterumve annum, aliqua, ut homo intra quindecim, & plures annos multiplicant: si itaque in aliis feminibus certos & diversos pro sui evolutione, & multiplicatione debemus admittere terminos, cur idipsum etiam in feminiis morborum contagiosorum non admittamus non video.

Verum si hæc pro tenuitate mea allata alicui ut facile prævideo, non arrideant, ut meliora proferre studeat, rogo, quibus ut assentiar, non laborabo.

### XXXV.

Supereſt adhuc alius, quamvis fortitan valde rarus modus, quo scarlatina,

aliaque exanthemata externæ corporis superficiei communicari solent; contingit nimirum quandoque, ut animalcula & seminia v. g. scarlatinæ in aëre volitantia ipsi cuti adhæreant, ibique sedem figant, aliquando etiam ultro penetrent, atque resorbeantur, sicque in cute prædicta exanthemata exhibeant. Hac de re duas singulares, & valde curiosas adducam observationes, quarum primam invenio apud Clar. Lancisium in eruditiss. ejus tractatu de noxiis paludum effluviis lib. I. Part. I. cap. XVIII. Dum de minimis animalculis in locis humidis, & paludosis genitis, atque per aëra volitantibus, ratiocinatur, sic effatur.

„ Nam cum ejusmodi animalcula ab  
„ ambiente aëre in omnia foramina,  
„ quæ habent ostiola paulo latiora, quam  
„ sint illorum moles, soleant irrumpe-  
„ re; ubi tamen angustiora invenerint,  
„ fieri potest, ut cunei more diffindendo,

„ vul-

„ vulnerandoque ampliora reddant, ido-  
 „ nea nimirum excipiendis illorum ovu-  
 „ lis. Probabilem vero ejusmodi conje-  
 „ cturam faciunt ea, quæ nos ipsi con-  
 „ tingere videmus, apud illos palustrium  
 „ locorum incolas, qui statim atque no-  
 „ cens illud hospitium experiuntur, fa-  
 „ ciei colorem in deterius mutare, va-  
 „ riisque pustulis, atque exanthemati-  
 „ bus fœdari solent,

## XXXVI.

Altera vero majoris indaginis, & ma-  
 gis curiosa legitur hac de re historia apud  
 Paulum Sorbait celeberrimum quondam  
 Practicum Vindobonensem in illius med.  
 Pract. Tract. III. cap. XVI. de febre  
 petechiali hoc modo.

Exanthemata petechiis similia totam  
 „ propemodum aulam cæsaream, & utrum-  
 „ que Gynæceum nuper 1674. in sylvula  
 „ ad pulchrum fontem dicta, cum sub  
 „ dio inter abscissas arbores, comoedia

„ exhiberetur, sub crepusculum noctur-  
„ num, corripuerunt; ita, ut ad gy-  
„ næceum derepente vocatus tantam ex-  
„ anthematum copiam nobilissimarum do-  
„ micellarum corpuscula descœdantium,  
„ obstupuerim; nullus aderat calor, non  
„ conquerebatur de quadam cordis op-  
„ pressione. Susplicabar primo fuffitum  
„ aliquem arsenicalem venenatum, ad  
„ venti favorem a ficariis factum fuisse;  
„ sed postquam intellexi, locum illum  
„ plenum fuisse serpentibus, stellionibus  
„ & lacertis, plurimas arbores putridas  
„ vermibus plenas, & infectis putridis  
„ & venenatis infectas adesse, nec lo-  
„ cum adeo perflatum fuisse, conjeci, ad-  
„ fuisse miasma quoddam, quo aër in-  
„ fectus fuit, & consequenter homines,  
„ qui tamen ab imbecillitate veneni omnes  
„ perfanati fuerunt; nec fuerunt pete-  
„ chiæ, ut sibi quædam finistre per-  
„ suadebant.

Ex

Ex hac fingulari , & notabili hiftoria plura medicis practicis neceffaria edocemur , & quidem primum , quod hic ab eruditiffimo Sorbait annotatus exanthematicus affectus ad fcarlatinam benigniffimam reduci debeat.

Secundum , quod morbi exanthematici a miasmate animato , feu ab animalculis , illorumque feminiis per aëra volitantibus , & externæ superficiei corporis adhærentibus , aut per alias vias eisdem communicatis dependere poffint. Tandem

Tertium , quod fimilis morbus exanthematicus , & benignus a petechiis , aliisque malignis diftingui debeat.

Si quis vero plura de exanthematibus prædicta ratione communicabilibus , videre velit , legat & relegat elegantiffima , omnique eruditione plena Illuftrifs. & Eruditifs. D. L. B. van Swieten commentaria in Tom. II. §. 723-4-5.

## S E C T I O V.

*Exponit symptomata, & sedem  
scarlatinæ.*

## XXXVII.

Statum morbi in scarlatina esse inflammatorium demonstrant rubor, ardor, dolor, & tumor, quare evidens est, sanguinem in minimis vasis restagnare, unde prædicta dependent.

Ista stasis videtur fieri præcipue in illis vasis, quæ membranam cellulosa perreptant, aut in eam terminantur; unde dein non tantum ille tumor, qui præsentem scarlatina, adest, sed vel maxime alter tumor leucophlegmaticus, qui tardius scarlatinam subsequitur derivari debet.

Si consideremus experimenta, quæ Clariss. Ruifchius de membrana cellulosa instituit, videbimus, quod illa non tantum omnia vasa sanguifera, illorumque  
mini-



minimas ramificationes; sed omnes etiam nervos, illorumque minimas divisiones obvolvatur & comitetur; item quod hæc membrana in diversam molem tendi, & elevari possit; quod diversi tumores, præcipue vero emphysemata nos docent; si itaque hæc, aliaque similia perpendamus; facile concipiemus, quomodo prædictus tumor in scarlatina fieri possit.

Major quidem videtur difficultas, de illo tumore leucophlegmatico, qui scarlatinam sequitur; sed facilius concipietur, si intimius illa, quæ sub ipsa scarlatina, aut statim post illam, obveniunt, perpendantur; dixi enim quod tempore exanthematum scarlatinæ humores in vasis ipsis, quæ cutem membranamque cellulosa perreptant, restagnent, adeoque hæc nimium tendantur, lacerenturque; unde dein tollitur illa cohæsiō epidermidis cum cute, quam deinde sequitur illa desquamatio & decorticatio.

Quo

Quo facto alia vasa peripheriæ corporis privantur illo sibi necessario tegumento, & sustentaculo; unde mirum non est, quod ipsa membrana cellulosa, irruentibus majore quantitate in illam humoribus, tendatur, & in tumorem leucophlegmaticum elevetur.

## XXXVIII.

Ex quibus etiam patet ratio illorum, quæ §. VIII. dixi; quare nimirum illi majorem desquamationem, & decorticationem experiantur, qui pluribus scarlatinæ maculis obfidebantur. Item quare illos major, & periculofior leucophlegmaticus tumor vexare soleat, qui majorem decorticationem experti erant?

Huc debet etiam referri singularis quædam observatio de cute sive boum sive ovium morbo aliquo contagioso de-  
natorum; corium enim ex tali cute præparatum nullius usus esse solet, quia tan-  
tam

tam possidet teneritudinem, ut facillime laxetur, & dilaceretur.

Ratio hujus phœnomeni in eo consistit, quod in tali morbo fiat stasis humorum in minimis vasis cutem perreptantibus unde hæc vasa partim nimium distenduntur, partimque rumpuntur; ex quo dein exurgit minor partium, fibrarumque cutis ad invicem cohæsiō, minorque firmitas. Hæc vero adhuc magis patent, quod ex similibus morbis pili in brutis, capilli in hominibus suo nutrimento destituti, sponte decidere soleant.

### XXXIX.

Dixi superius §. III. IV. & reliquis quod in scarlatina præsertim maligna adsit tam vehemens faucium tumor, rubor, & ardor, ut ægri quandoque nec deglutire, nec loqui, nec respirare valeant; ex quibus spero fore, ut quilibet judicet in tali casu summam adesse inflammationem, quæ non tantum laryngem, pharyngem,  
lin.

linguam, tonsillas, aliasque partes in faucibus fitas occupet, sed sæpe etiam se ad æsophagum, ventriculum, arteriam asperam, pulmonesque extendat; in quo casu affligit nausea, vomitus, aut perpetuus nifus ad vomendum cum continuis deliquiis & lypotemiis. A stasi inflammatoria arteriam asperam, pulmonesque obsidente fit continua tussicula, respiratio perquam difficilis, parva & frequens summisque anxietatibus juncta.

## XL.

Dum itaque prædicta mox recensita ita fiunt, exurgunt exinde necessario alia his similia, & lethalia mala; nimirum venæ jugulares, & vertebrales exinde compressæ se in subclaviam, & cavam exonerare non possunt; adeoque fit stasis inflammatoria in cerebro, ejusque sinubus, unde dein sopor, delirium, convulsiones, gangræna, & mors expectanda sunt.

## XLI.

## XLI.

Dixi superius §. XXXI, quod causa materialis scarlatinæ tam benignæ quam malignæ videatur esse una eademque specie. Quia vero hæc propositio alicui paradoxa videri posset, rationem dedi, quia nimirum experientia constat, quod a scarlatina benigna maligna, & vicissim a maligna benigna contrahatur; uti hoc ipsum in variolis benignis & malignis videmus.

Verum quia hæc ad convincendum quemquam ratio quandoque non sufficeret, sequentia spero omnibus satisficient: sic hoc ipsum videmus in omnibus aliis seminibus vegetabilium, quod si eadem materialia semina in diversis locis, aut diversis terræ plagis, aut etiam diverso tempore terræ mandentur, quod nimirum fructus quoad aliquas circumstantias diversi exinde oriantur; quin imo videmus ex eadem v. g. arbore fructus quoad quædam

accidentia, ut magnitudinem, colorem, maturitatem, diversos provenire. Quare ergo non etiam idem posset esse in feminis scarlatinæ, & variolarum non video?

Sic legimus in Bonet. medicin. septentrionali parte altera pag. 222. quod variolæ & morbilli in insulis orientalibus, & occident. sint semper maligni: Cujus rei causa non sunt femina variolarum aut morbillorum, sed loca ipsa, aut aer, aut corpora incolarum ita disposita.

#### XLII.

Ast superest hic difficilior quæstio, de esu mytuli solvenda. Experientia enim constat, quod quamdiu hoc venenum in ventriculo latet, exanthemata in circumferentia corporis oriantur; quamprimum vero illud evomitur, talia exanthemata dispareant. Vide eruditissima comment. van Swieten Tom. II. §. 399. Igitur evidentissime exinde deducere possumus, quod

ex-

anthemata scarlatina, aut quæcunque alia a prædictis feminiis verminosis non dependeant.

Hoc argumentum videtur in fronte habere aliquam vim, qua etiam illis, qui nostrarum essent partium, imponere posset; si vero in recessu consideretur, apparebit, quod nostram de contagio sententiam potius corroboret, quam infirmet. Nam duplicis generis debent admitti exanthemata; nimirum illa, quæ contagiosa, seu ultro multiplicabilia esse solent; qualia sunt: scarlatina, morbilli, variolæ, petechiæ, & similia. Item alia, quæ non sunt contagiosa, ut lentigines, ephe- lides, sudamina, maculæ hepaticæ, & scorbuticæ; huc etiam spectant illa, quæ a pulicum morsibus cuti infliguntur, & petechias quandoque mentiuntur. Quapropter ad ultimam hanc classem debent pariter reduci illa exanthemata, quæ a comestis mytulis dependent. Quia nimi-

rum a mytulo in primis viis hærente, & internos spasmos excitante humores magna vi ad peripheriam corporis premuntur, qui ibidem subsistentes talia exanthemata exhibent. Dum vero mytulum evomitur, spasmi sedantur, & liber humorum circulus per vasa cutis conciliatur, ficque exanthemata evanescent.

Hujus asserti clarissimum exemplum habemus in illis præcipue foeminis, quibus annis intra quadragesimum & quinquagesimum menstrua valedicere solent; istæ enim a spasmis internis, sæpiusque recurrentibus vexantur, phlogosisque afficiuntur, ex quibus facies ad instar scarlatinæ rubere, moxque pallescere solet.

Hæc sunt præcipua scarlatinæ symptomata, quorum non tantum decursum, sed & causas, rationesque pro possibili explanavi; supersunt plura alia exponenda, quorum quia ratio facile patet, aut,  
quia



quia jam superius §. XXI. data est, talia hic tacitus præterire volo.

## SECTIO VI.

*Exhibet prognosim scarlatinae.*

### XLIII.

Scarlatinam benignam, si nullus in fex rebus non naturalibus committatur error, esse omni periculo expertem omnes norunt practici. Altioris vero indaginis, & majoris periculi scarlatina maligna esse solet.

Scarlatina maligna habet suos malignitatis gradus, nam aliquando prima, aliquando secunda, tertia, aut quarta die, aliquando tardius interficere solet.

Gradus malignitatis desumitur a symptomatibus affligentibus; si enim summa adsit prostratio virium, ingens in degluti-

F 3

tione,

tione, & respiratione difficultas, sopor, delirium, intra unam alteramve diem jugulare potest.

Si stantibus his diris symptomatibus pulsus sit parvus, & celer, videtur jam gangræna subesse.

A contrario multum sperare possumus, si ægri libere respirent, si exigua cum difficultate deglutiant, & si pulsus, non obstante ejus celeritate, sit fortis.

In infantibus cæteris paribus minus est periculum quam in adultioribus, quia illorum corpora magis sunt transpirabilia faciliusque sine dilaceratione fibrillarum tendi possunt.

Quo tardior & rarior fit scarlatinæ eruptio, eo benignior plerumque esse solet; quo autem citior, & copiosior corpus obsidet, eo periculosior esse consuevit. Interim vidi sæpe statim prima die scarlatinam benignissimam in conspectum venisse. Item observavi, quod, quamvis

vis exanthemata scarlatinæ sint rara, si tamen febris, & anxietates perseverent, semper mali moris dicenda sit scarlatina.

Quando scarlatina sedem mutat; hoc est quando nunc una, nunc altera pars corporis magis rubere videtur; aut quando universaliter in ambitu corporis nunc major nunc minor apparet rubedo; metuendum est, ne in aliqua interna corporis parte sedem figat, sicque periculum augeat.

Si in frequente, & copiosa scarlatina externus corporis habitus tumeat, facilius toleratur morbus, secus enim adest intolerabilis ardor.

Si corpus in peripheria tumeat, subsequitur certius decorticatio, quam si non tumeat.

#### XLIV.

Si dissipata jam scarlatina ægri adhuc febricitent, inquieti, & infomnes sint;

F 4

signum

signum est crîsim necdum perfectam adesse, adeoque multa adhuc metuenda superesse.

Quibus scarlatina ad decorticationem disponitur, videtur quasi critice hac ratione evacuari; observavi enim, quod tales ægri non tam ex scarlatina quam ex subsequo tumore leucophlegmatico metuumdum habeant.

Si post superatam jam scarlatinam præcipue malignam ægri ab omni febre immunes sint; & tamen non appetant, languidique maneant, signum est prædictum tumorem leucophlegmaticum in propatulo esse.

Si tumor iste leucophlegmaticus cum pulsu febrili conjunctus sit majus portendit periculum, quam si sit sine febre.

Si adhibitis exquisitissimis, quæ ars dictat, remediis, tumor ille leucophlegmaticus nihilominus cedere nolit, tunc vel fit raptus illius feri ad cerebrum, ex quo ægri fiunt comatosi; sicque aut convulsi,

vulsi, aut apoplectici pereunt. Vel fit decubitus ad cavitatem thoracis, unde dein sequitur suffocatio.

---

## S E C T I O VII.

*Scarlatinae, ejusque graviorum symptomatum curationem proponit.*

### XLV.

In methodo scarlatinae benignae medendi exponenda non detinebor; etenim ex illis, quæ jam superius adduxi abunde constat, medici satagentis opera opus non esse, sed sufficere, si tales ægri regimine, quoad sex res non naturales temperato utantur.

Unicum tamen in similibus casibus observandum tam ægris, quam medentibus injungo, ne scilicet evanescentibus jam exanthematibus ægri nimis cito aëri frigi-

do se exponant, nam superius jam innuavi, quod scarlatinæ etiam benignæ aliquando supervenire soleat, tumor ille molestus, & sæpe periculosus leucophlegmaticus dictus.

## XLVI.

Si vero scarlatina maligna adsit, quæ cognoscitur ex signis §. XXVIII. & XXIX. tunc funestissimo huic malo exquisitis, & energiticis remediis quantocius obviam eundum est; quia hic ipse morbus, ut alii inflammatorii vel discutitur vel transit in gangrænam, aut abscessum, aut alium §. III. & IV. descriptum affectum. Quapropter indicationes curativæ ex datis de scarlatina causis §. XXX. formandæ erunt.

Pro prima causa assignavimus miasma aliquod verminosum septicum multiplicabile.

Pro secunda vero, & quasi præcedentis effectu diximus esse dispositionem inflam-

inflammatoriam, quasdam partes plus, alias minus occupantem, & diversa symptomata, sæpeque lethalia inducentem.

Unde indicationes exinde exurgunt. Primo: ut prædicta materia septica verminosa per appropriata antiseptica enervetur, destruat, illiusque multiplicatio impediatur. Secundo: ut humores stagnantes in liberum circulum redigantur. Et tandem tertio: ut symptomatibus urgentioribus obviam eamus.

De prima indicatione deinde erit sermo, quia stasis inflammatoria in hoc morbo quandoque ita urget, ut nisi statim sub initium morbi hanc præ omnibus aliis respiciamus, omnibus aliis conatibus oleum, & operam perdamus. Cum enim stasis inflammatoria cerebrum, fauces, aliasque nobiles partes occupet, debemus esse solliciti, ut liber humorum per has partes circulus procuretur, quod fit primo demendo quantitatem eorum. Secundo, impetum ipso-  
rum

rum ad partes affectas minuendo, quod fit revellendo, & derivando. Et tandem tertio humores meabiles, & fluxiles reddendo.

Præterea una eademque fidelia debemus prædictam acrimoniam septicam respicere, & pro possibili mitigare, atque præsentia, urgentiora symptomata lenire, futuraque impedire.

#### XLVI.

Primis indicationibus fatisfit, si illico sanguis ex pede, & in debita quantitate mittatur. Hoc modo enim fatisfacimus & generalibus inflammationum, & nostris de scarlatina indicationibus; nam hac ratione demitur exuberans humorum quantitas, minuiturque impetus eorum ad partes affectas.

Ex quo dein evenit, ut alia liquida diluentia & antiphlogistica facilius nostris misceantur humoribus, illosque meabiles, & fluxiles reddant.

Scio quidem multos celebres practicos abhorrere a venæsectione præsentibus

ex-



exanthematibus instituenda, quia erroneis præjudiciis capti exanthematum retrocessum, aut retropulsus mutuant.

Verum superius in tractatu de variolis §. CXXXI. diversis observationibus, multisque gravibus autoritatibus ostendi tales vanos inanesque esse metus; quibus sequentia accedunt.

Nam in nostro casu exigit venæsectio- nem status morbi inflammatorius, & præceps ex neglecta, & omissa sanguinis missione vitæ periculum; quia brevissimo tempore inflammatione affectæ partes in gangrænam mortemque terminantur, quibus venæsectio in debita quantitate instituta moras injicit; ut dein ex aliis appropriatis remediis multum sperandum restet.

Sanguis venæsectione extractus præditus est crassa tenaci, lardacea eodem modo, ut in pleuritide, & peripneumonia; adeoque sicut in his casibus, adhibitis quibuscunque diluentibus, & anti-  
phlo-

phlogisticis sine venæsectione nihil effici-  
mus, idem dicendum erit in scarlatina.

Præterea non tantum meis, sed etiam  
aliorum observationibus edoctus edicere  
possum, quod nisi in scarlatina valde ma-  
ligna quantocius sufficiens quantitas san-  
guinis detrahatur ægri brevissime aut suf-  
focentur, aut gangræna afficiantur. Quod  
jam aliunde ex præcedente sectione II. &  
§. XXI. constat.

Hoc ipsum confirmat, & corroborat  
sua autoritate Clariss. Freind. Hist. med.  
hoc modo.

„ In variolis, morbillis, erysipelate,  
„ & scarlatina, si symptomata vehemen-  
„ tiora fuerint, si caput, aut pulmones  
„ vehementius urgeant, aliæque partes  
„ ingenti dolore supra modum affician-  
„ tur; ratio postulat, ut vena incida-  
„ tur ac tuto fieri licet. Et teste expe-  
„ rientia (nihil enim frequentius exper-  
„ tus sum) audacter affirmo, me nun-  
„ quam

„ quam observasse potuisse , eruptiones  
 „ istiusmodi ex venæsectione retroire.

Ejusdem opinionis & observationis  
 sunt plures alii, quos prætereo , practici.

#### XLVII.

Sed dices, certæ & evidentes celeberrimum practicum observationes nos docent, quod sæpe in morbis malignis, ut in scarlatina maligna humores nostri corporis non sint tenaces, viscosi, & crusta lardacea donati; sed potius dissoluti, diffusi, omnique consistentia carentes; ut in peste Bredana, aliisque vide commentar.

D. L. B. van Swieten Tom. II. p. 421.

In simili vero casu venæsectio debet exulare, alia vero remedia, ut incrassantia, austera, & acida mineralia præstitui debent.

Ad hanc difficultatem respondeo, quod in simili casu deberemus abstinere a venæsectione; & prædicta remedia, nostris dein dicendis, contraria, ordinare.

Ast

Ast hoc monitum volo, quod tales casus in nostris regionibus oppido rari esse soleant, quia ad talem humorum dissolutionem illi potissimum proclives sunt, qui endemio, & hæreditario titulo crasi humorum scorbutica præditi sunt, quod in nostris regionibus oppido rarum est.

Ad hanc objectionem referri potest alia in scarlatina maligna observatio; nimirum ego ipse aliquoties summa cum admiratione observaveram, quod vegeti & alias sanissimi infantes, aut juvenes, scarlatina maligna correpti brevissimo tempore cum pulsu debili, frequenti, & inæquali perquam debiles languerent; qua ex ratione hæsit mihi aqua, an in simili casu sanguis mittendus esset nec ne.

Sed experientia me a posteriori docuit, quod ex celebrata venæsectione similes ægri potius refocillarentur, quam opprimerentur; nam pulsus exinde fiebat æqualior, fortior, & mollior; quod denotat

in similibus casibus vires oppressas non vero exhaustas dici debere. Ast, ut clarius, & evidentius hæc pateant, quæ communibus, & apud medicos usitatis effero terminis, opus erit, ut quædam, medicis hoc tempore nota experimenta, consideremus.

Sic experimenta nos docent, quod si nervi a pari vago, & intercostali oriundi, & ad cor tendentes ligentur, aut quacunque ratione comprimantur, motus cordis, arteriarumque langueat, & palpitet, pulsus fiat exinde necessario debilis, celer & inæqualis. Item constat, quod nervi cingantur multis, & minimis vasis, eorum partim lubricitati, partimque nutritioni inservientibus, atque nervorum ganglia constituentibus.

Si itaque in vasis nervos ad cortendentes ambientibus fiat talis humorum stasis, tunc fibrillæ nerveæ premuntur, & comprimuntur eadem ratione, ac si ab

aliqua violentia externa premerentur. Igitur fiunt exinde omnia illa impedimenta in motu cordis, arteriarumque, quæ jam dixi, taliaque perdurant, donec prædicta stasis solvatur.

Ad hanc vero, uti ad omnes alias similes resolvendas stagnationes, quod venæsectio plurimum conducatur, jam probatum fuit. Unde mirum non est, quod in similibus casibus pulsus, qui parvus, celer, & inæqualis erat post celebratam venæsectionem fiat fortior, & æqualior.

Interim in talibus casibus semper bene perpendendum esse judico, an non stantibus his, subsit jam gangræna; in quo casu mortem, aliunde inevitabilem, venæsectio potius acceleraret, quam præcaveret; quapropter satius est in tali casu ab omni sanguinis missione abstinere; ne medicus videatur occidisse illum, quem iniqua fors ipsa interemit.

Hæc

Hac vero occasione quamvis extra omnem meæ materiæ scopum, & ordinem, admonere possum, & debeo, quod plures, quam vulgo creduntur, momentosi, & imperscrutabiles nervorum affectus, ut præcipue diversi spasmi hypochondriaci, & hysterici, a tali stasi humorum in vasis nervos ambientibus, eorumque ganglia constituentibus, dependant; qui dein flagellum ægrorum, medicorumque dici solent.

Quod vero quantitatem sanguinis detrahendi, aut locum, ex quo mitti debeat, concernit, in tractatu de variolis maximam partem jam insinuavi.

#### XLVIII.

Præmissa ut jam dixi venæsectione debent alia, quæ pariter revellendo & derivando agunt, in usum vocari, talia sunt epispastica, vesicantia, quæ partibus inferioribus, aut etiam ad nucham applicari debent. Debet tamen,

ut superius dixi in tractatu de variolis, præmitti sufficiens sanguinis detractio, secus plus damni, quam commodi ex vesicantibus expectandum erit.

Ad eundem scopum spectant enemata emollientia sæpius injecta, five illa sint ex diversis speciebus emollientibus, five ex decocto hordei, ex lacte, aut ejus fero perinde est, dum modo non sint acria irritantia.

#### XLIX.

Aliis vero supra dictis indicationibus, quæ acrimoniam & tenacitatem humorum respiciunt, satisfacimus per diluentia, temperantia, antiphlogistica, quæ fluxiles & meabiles humores reddunt, acrimoniamque septicam temperant.

Talia defumuntur ex aquosis, nitrosis, farinosis, fructibus horreis, oleribus, acescentibus, acidis, diluentibus, humectantibus, solventibus, & saponaceis.

Qua-



Quapropter huc spectant radices graminis, acetosæ acetosellæ, scorzonæræ. Herbæ: ut acetosa malva, althæa, veronica.

Farinosa sunt semina frigida. Huc etiam spectant: Hordeum, avena, amygdalæ, fagopyrum, milium, oryza, semina papaveris.

Fructus horæi sunt: Poma citria, aurantia, poma acido dulcia, pruna dulcia, rybesia, rubi idæi, mora, fraga & similia.

Huc spectat lac dulce, ebutiratum, serum lactis. Tandem acida mineralia, ut spiritus nitri, vitrioli, sulphuris per campanam, & acida vegetabilia, ut specialiter acetum vini.

Ex his possunt componi multifariæ remediorum formulæ; nimirum: Decocta, infusa, extracta, emulsa, hydrogala, fyrupi, julapia, rob, balnea, vapores, fomenta, clysmata, & similia.

Qui vero plura in eodem genere remedia desiderat, legat materiam medicam, & remediorum formulas venerandi Hermani Boerhavii, & Clariss. D. Davidis de Gorter.

## L.

Superius in indicationibus formandis dixi, quod primo illud miasma contagiosum septicum deberet destrui, ejusque multiplicatio impediri. Verum quia ad hæc usque tempora ignoramus, talia specifica, quæ miasmata contagiosa scarlatinæ directe opposita essent, sic hæc fuit una ex rationibus, quod nunc primo huic indicationi satisfaciam, cui primo satisfacere debuissim.

Quantum autem ex repetitis eruditissimorum practicorum observationibus nobis constat, habemus universale antisepticum in cortice peruviano, qui in omnibus morbis contagiosis malignis præ omnibus aliis remediis hucusque inventis,

tis, efficacissimus deprehensus est, in quantum acrimoniam illam septicam temperat, illiusque ulteriorem multiplicationem impedit.

Ast in illis morbis malignis, qui cum aliqua inflammatoria dispositione conjuncti sunt, ut variolæ, & scarlatina, observationes docent, quod non conveniat, nisi prius inflammationi per missionem sanguinis perspectum sit; atque hæc & quidem princeps fuit ratio, quare in scarlatina primo de inflammatione, dein vero de ejus acrimonia septica sollicitus fuerim.

## LI.

Quod vero cortex peruvianus in scarlatina maligna sit speciale remedium, optimumque antisepticum habemus ex observationibus celeberrimorum medicorum. Hoc videre possumus apud Mortonium capite V. de febre scarlatina in historiis IV. V. VII. VIII. IX. & X.

Idem sentit Eruditissimus, & Magnificentissimus D. Archiater Cæsareus de Haen.

Qui plura hac de re legere cupit, inveniet in nostro tractatu de variolis, & in nostris sequentibus observationibus.

Ast hic objici posset: quod effectus aliquis a cortice vix sperari possit, nisi hic in debita, & sat magna quantitate assumatur, quod in scarlatina fieri non potest, quia in deglutitione difficultas quandoque tanta est, ut vix liquida deglutiri possint; adeoque talia proposita remedia sunt de subiecto non supponente.

Ad hoc respondeo, quod in simili difficili casu alia ratione procedendum sit. Nimirum debet corticis extractum, aut ejus sal methodo Gareana præparatum in aqua appropriata solutum, sicque in parva dosi, & sæpius exhiberi; qua ratione non tantum facilius assumi poterit, sed

fed & remedii major efficacia, non obftante minore quantitate, compenfabit illam magnam quantitatem corticis in fubftantia affumendi.

Præterea poterit ex cortice, & aliis fpeciebus emollientibus faturatum decoctum confici, & exinde clyfma fæpius injici; fic enim fiet, ut magna fimilis decoctionis virtus per vafa abforbentia bibula ad maffam humorum feratur, & eundem ac fi per os affumpta fuiffet, exerat effectum.

Hoc confirmant alia experimenta, quibus conftat ex enematibus nutritivis corpus diu nutriri poffe. Item experimenta nos docent, quod per faturatas chinæ chinæ decoctiones fæpius injectas, febres eodem modo curari poffint, ac fi hoc remedium per os affumatur.

## LII.

Tandem poffet quisquam contra noftras fuperius de fcarlatina factas indica-

tiones opponere dicendo , quod in morbis præcipue malignis exanthematibus prima & princeps indicatio debeat esse , ut materia maligna exanthematica pellatur a centro ad peripheriam corporis ; de qua apud nos altum semper fuit silentium.

Ad hanc objectionem respondeo , esse quidem in morbis præcipue acutis vulgarem opinionem , & indicationes , ut miafmata maligna a centro pellantur ad peripheriam ; in quem finem solent etiam præstitui remedia vulgo dicta expellentia alexipharmaca , camphorata , aliaque salibus volatilibus prædita , sed prohi dolor ! quanto cum ægrotantium detrimento ? quia sic motus febriles augentur , fit exinde materiæ morbificæ , quam ad peripheriam pellere intendimus , raptus ad cerebrum , aut ad alia nobiliora viscera depositio ; unde dein sopor , delirium , phrenesis , convulsiones ; quin-  
imo

imo exanthemata ipsa adipiscuntur exinde naturam, indolemque perniciosiorem; verbo: morbus de indole sua benignus fit hac ratione malignus. Quod ipse Expertissimus Sydenham de scarlatina benignissima asserit: *Si plus negotii ægris faceßamus, vel lectulis continenter incarcerando, vel cardiacis, aliisque remediis supervacaneis, nimis doctæ, & ut vulgo dicitur, secundum artem, supra modum ingestis; morbus statim intenditur, & æger non raro nulla alia de causa, quam nimia medici diligentia ad plures migrat.*

Ista perversa materiam exanthematicam a centro ad peripheriam pellendi methodus, videtur præcipue in eo fundari, quod credantur talia exanthemata, quasi critice hoc modo ad habitum corporis tendere; quia videntur quandoque ægri exinde quasi alleviari. Sic enim videmus, quod facta variolarum eruptione anxietates, inquietudines, convulsiones, alia-

aliaque turbulenta symptomata sedentur , aut saltem mitigentur , idem observamus in pleuritide , & peripneumonia laborantibus ; quales morbi , si debito tempore non discutiantur , humores ita corrumpunt , ut dein exanthemata illis superveniant , antequam vero hæc superveniant adest summa inquietudo , anxietas , quandoque etiam delirium , quæ omnia dein mitigantur , ægerque resipiscere videtur , dum exanthemata superveniunt ; cum itaque observationibus constet , ægros in morbis acutis ex eruptione exanthematum alleviari , indicationes fieri debent , ut talia a centro ad peripheriam pellantur.

Ad hoc respondeo , quod terminos artis debeamus in sensu proprio , & stricto assumere , adeoque , quid proprie sit crisis in morbis acutis , ex iisdem fundamentis explanare ; ex quo dein clarè videbimus ; quod tales objectiones multis imponere possint. Crisis enim in morbis acutis

stri-



strictè sumpta juxta omnes medicos est ille status morbi, qui facta causæ morbificæ per unam alteramve viam evacuatione, morbum solvit, unde dein sequitur notabilis, & permanens ægri alleviatio; denique ut æger exinde in vado constitutus dici possit.

His tanquam evidentibus artis principiis præsuppositis, omnes præsertim vero celebres practicos in testimonium peto, an illi ægrum, qui expulsis ad peripheriam variolis melius habere videtur, extra periculum constituere possint? Item an ille v. g. pleuriticus, cui die morbi nona aut undecima exanthemata superveniunt, in vado constituendus sit? tristis enim, & fere quotidiana experientia nos contrarium docet. Adeoque signum evidentissimum est, quod talia exanthemata nunquam ad crism perfectam, raro ad imperfectam, melius vero ad acrisiam reduci debeant.

## LIII.

Hæc est, quam hucusque explanavimus generalis scarlatinæ malignæ medendi ratio, superest, ut quædam in particulari de urgentioribus scarlatinæ symptomatibus brevissime attingamus, qua nimirum salutari methodo illis obviam eundum sit.

Princeps & urgentissimum symptoma dixi in scarlatina maligna esse inflammationem faucium, quandoque etiam cerebri. Quare in similibus casibus præter generalia, superius jam recensita remedia debent ordinari gargarismata & injectiones ex emollientibus, & demulcentibus in Tractatu de variolis §. CVIII. jam recensitis; quibus statim a principio morbi addi poterunt illa, quæ virtute sua tonica, & demulcenti (absint tamen omnia acria, & calefacientia) majorem ad prædictas partes affluxum impediunt, qualia sunt Rad. tormentillæ, biffortæ, semi-

femina psylii cydoniorum, aliaque similia.

## LIV.

Præterea, quia experientia nos docet, quod si inflammatio faucium anginosa ad extra vergat, minus affligat, minusque periculum portendat, debemus fomentationes, cataplasmata ex iisdem emollientibus in lacte coctis tepide circa collum applicare, ad hoc ut prædictus inflammatorius tumor ad externas potius partes avocetur. Hanc fuisse Divi Hippocratis regulam legere possumus in Aphor. 37. sect. VI. & Aphor. 49. sect. VII. ubi sic ait: *ab angina detento, tumorem fieri in collo, bonum: foras enim morbus vertitur.*

Idem quoque videre est apud Corn. Celsum Lib. IV.

Item ex eodem fundamento judicat vetustissimus medicus Aretæus, quod in

*angina cucurbitula* externe applicata in pectus, ut asserit, *malum detrabat.*

## LV.

Huc etiam spectat ille status inflammatorius, qui infantibus non tantum scarlatina, sed etiam dentitione laborantibus communis est, & in quo, inflammatis gingivis, faucibusque, regressus sanguinis per jugulares ex cerebro, ejusque finibus impeditur, unde similes infantes phrenesi, & convulsionibusprehenduntur. In quo conclamato fere casu, nisi sanguiifugæ post aures applicentur, ex aliis remediis vix aliquid sperandum restat, hoc vero in tractatu de variolis §. CXVII. fusius explanavi, quare nunc hujus nihil ultro meminerim.

## LVI.

In scarlatina præsertim maligna affligunt sæpe inquietudines, & vigiliæ continuæ, in quo casu paregoricis, anodynis,

nis, emulsisque quies & somnus conciliandus erit.

Eadem remedia conveniunt etiam ad attemperandum illum ardorem §. VII. qui quandoque in habitu corporis valde molestus esse solet.

Sed omnibus diluentibus, emollientibus, demulcentibus, & emulsis præferri debet hydrogala, de qua in tract. de variolis fusius tractavi.

Hoc enim remedio, non tantum humores fluidi, & meabiles redduntur, acrimonia, & ardor temperantur, sed vel maxime dolor faucium demulcetur, & corpus lenissime nutritur. Si vero ferum lactis magis arrideret, poterit hydrogalæ substitui.



## S E C T I O V I I I.

*Periodum, seu stadium scarlatinæ secundum  
nimirum illum tumorem leuco-phlegmaticum  
una cum ejusdem curatione sistit.*

## LVII.

Iste leucophlegmaticus tumor, qui scarlatinam ut §. VII. dixi, sæpe sequitur, est majoris quandoque momenti, quam scarlatina ipsa. Etenim non tantum facies, manus, pedesque, sed & abdomen, scrotumque, immensum tument; urina secedit pauca, & plerumque cruenta, aut loturæ carniū similis, fœces alvinæ sunt albæ, & pultaceæ, tussis adest sicca, quandoque fat violenta & respiratio laboriosa; corpus est languidum, ponderosum, vixque mobile. Vasa serosa, & lymphatica mirum in modum tument, & tenduntur; unde si appropriatis remediis quantocius opem  
non

non féramus , hæc dilacerantur , & fit humorum five ad cerebrum , five ad cavitatem thoracis , aut abdominis , extravasatio ; sicque malum immedicabile redditur.

Quare medentes duplex in hoc morbo officium tenet. Primum est, ut quantum ars valet , studeant , hunc funestum tumorem hydropicum præcavere. Alterum vero in eo consistit, ut præsentem tumorem tollant, & aliis inde pendentibus, molestisque medeantur symptomatibus.

### LVIII.

Superius §. XXXVII. dixi , quod miasmata scarlatinæ soleant petere , & obsidere præcipue partes corporis molles, & glandulosas ; ut membranam cellulosam , os internum , aliquando parotides , glandulas axillares , inguinales ; quæ tument , & inflammantur. Ex quo dein fit , ut dissipata jam scarlatina , & discusso prædicto tumore inflammatorio

prædictæ partes laxæ, & debiles fiant; unde dein exurgit, ut si tales ægri non rite transpirent, humores in illis colligantur partibus, sicque tumori illi leucophlegmatico viam sternant; qui dein facilius contingit, cum ex peracta jam decorticatione prædictæ partes eo facilius tendantur & in tumorem eleventur.

Adeoque præprimis solliciti esse debemus, ut tales ægri, quamvis superata jam scarlatina, in vado esse videantur, in debita transpiratione maneant; quod fit liberum vitando aëra; superficiem corporis linteis, pannisve laneis ficcis, & fumo aliquo aromatico imbutis, sæpius & leniter fricando; decocta, aut infusa ex veronica, betonica, rad. graminis, petroselini, aliisve, calide hauriendo; tandem partes solidas roborando; unde fiet ut humores ferofi non tantum per transpirationem exhalent, sed etiam per urinam copiosiore evacuentur.



tur. Observavi, quod infusum baccarum juniperi huic intentioni præ omnibus aliis satisfaciat.

Scio quidem, & prævideo, quod mea consilia de vitando aëre libero, aut de ægris in lecto detinendis, multis inexpertis paradoxa videbuntur; interim sufficiat dicere, quod experientia edoctus hæc scribam, hæc sentiam.

Præterea, quamvis superata scarlatina, appetitus sæpe jam vigeat, curandum tamen est, ut certas diætæ regulas observent ægri, ut nimirum talia ingerant, quæ facile egerere possint.

Ultimæ vero indicationi, quæ est, ut partes solidæ roborentur, satisfacimus optime per lenia martialia, & rhabarbarina v. g. per tincturam rhei aquosam cum tinctura mortis pomat: Quæ si rite observentur, sperandum est, fore, ut status ille hydropicus præcaveatur.

## LIX.

Verum quandoque contingit, ut omnibus adhibitis cautelis, nihilominus solito alias tempore tumor ille leucophlegmaticus superveniat, novumque vitæ periculum, quo jam liberi credebamur, afferat.

In simili igitur casu indicationes esse debent primo, ut humores serosi plus aut minus viscosi incidantur, attenuentur.

Secundo, ut per convenientes vias evacuentur.

Tertio, ut partes solidæ roborentur, ac tandem ut symptomata urgentiora mitigentur.

Primæ & secundæ indicationi satisfacit per omnia salia fixa, tam alcalina, quam neutra, aut etiam acida; qualia sunt: sal absynthii, cardui benedicti, liquor terræ foliatæ tartari, tartarus vitriolatus, arcanum duplicatum, nitrum antimoniatum, sal polychrestum, tartarus so-

lubilis, chryſtalli tartari, & multa alia ejusdem generis, quæ, vel in forma pulveris, vel aliquo ſoluta liquore propinari poſſunt: his enim non tantum illud, quod viſcidum eſt, inciditur, attenuatur, ſed ſimul etiam partim per alvum, partim per urinam evacuat.

Porro huc ſpectant alia aperitiva, ut radices graminis, petroſelini, ononidis, eryngii, ſcœniculi, aſparagi, & alia ejusdem generis remedia, quæ cum ſupradictis ſalibus decocta, clarificata, & cum oxymelle ſcillitico, aut ſyrupo de duabus radicibus, edulcerata, calide ſæpius ad unam alteramve unciam pro diverſa ratione ætatis exhiberi poſſunt.

Propter ſpecialem vero virtutem ſolventem, & diureticam huc referri debent: ſcilla, & aſelli, ſeu millepedes.

Scilla exhiberi poteſt in ſubſtantia ſed melius in infuſione, aut in extracto, aut ejus oxymel ſcilliticum.

Millepedæ vero summam habent vim, si vivæ contendantur; earumque succus expressus in usum vocetur. In quem finem sequens aut aliqua fere similis, mixtura mihi in similibus morbis familiaris esse solet.

℞. Aquæ still. petroselini unc. V. spirit. falis coagulat. succi asellorum aa. dr. III. Oxymell. scillit.

Syrupi de duabus rad. aa. unc. I. Misce.

De hac mixtura debet æger sæpius unum, alterumve cochlear assumere, & unam, alteramve scutellam infusi baccharum juniperi, aut alicujus decoctionis ex supradictis radicibus aperitivis factæ, calide superbibere.

Ex usu hujus remedii non tantum urina copiosior redditur, sed & levis diarrhæa excitatur, quæ si non succedat, debet alvus clysmate emolliente, & salino sollicitari.

In

In eundem ufum inferviunt, & conducunt illa apochylismata, feu Rohob, ut ebuli, juniperi, sambuci, & de spina cervina, quæ cum fupradictis remediis mifceri, iisdemque addi poffunt.

### LX.

Tandem, dum omnia prædicta, aut alia fimilia remedia imparia funt pertinaciffimo huic tollendo malo, quærendum eft aliud in mercurio, & auro quod in his, aliisque fimilibus extremis morbis inventum eft, præfentaneam ferre opem.

Tale remedium, quod in pilularum aut alia forma præftitui poteft, eft fequens: v. g.

R. Rhei electi

Spirit. falis coagulati aa. dr. II.

mercurii dulcis

Auri fulminantis

Extract. Scillæ aa dr.

H 5

M. fiant

M. fiant pilul. c. Rob juniperi pondere unius alteriusve grani, quæ foliis auri aut argenti obvolvi & obduci possunt.

Quod vero usum hujus remedii concernit, sequentia notanda sunt.

Primo, quod una alterave harum pilularum omni bihorio, aut trihorio pro diversa ætatis, aliarumque circumstantiarum, ratione exhiberi debeat, quam dosim tres quatuorve sedes quotidie sequi debent, quæ, si non succedant, tunc vel earum dosis debet augeri, vel prædictis pilulis Magisterium mecoacanæ, aut diagridium sulphuratum, aut pilulæ cochix addi possunt. Qua ratione dein salivatio impediatur. Quare

Secundo, ut eo certius salivatio impediatur debet æger post assumptas pilulas bibere calide aliquot uncias infusi baccarum juniperi aut decocti radicum graminis. Item

Ter-

Tertio, postquam bidui aut tridui his pilulis usus fuerit, debet ab earum usu una, alterave die abstinere.

Quarto si ab usu hujus remedii nimiae turbæ in corpore concitari videantur, poterunt tales sopiri remediis pargoricis.

Tandem si in his, aliisque similibus affectibus notabilis febris adsit, debemus ab usu hujus remedii abstinere; quia timendum est, ne exinde febris augeatur; in quo casu alia superius recensita remedia, ut succus asellorum cum sale polychresto, aut nitro antimoniato in usum vocanda erunt.

Ab usu prædicti remedii intra unam alteramve diem ingens copia feri, tam per urinas quam per alvum evacuari solet; ex quo abdomen prius tensum, & tumidum, una cum aliis corporis partibus collabescet, & flaccescet, brevissime; quod ut eo facilius obtineamus,

&

& , ut partes laxæ & flaccidæ roborentur, debent sæpius pannis laneis fumo aromatico imbutis perfricari.

Hoc remedium fuit a secretis Magnifico , mihiq̃ue æterna memoria colendo Domino Doct̃ori Weber de Fürnberg , quo in diversis pertinacissimis & rebellibus morbis chronicis summo cum levamine utebatur. Adeoque non tantum in cachexia , leucophlegmatia , & hydrope sed & in contumacissima alvi & urinæ obstructione , si inflammatio aberat , illud in usum vocabatur.

Item in catarrho suffocativo , in asthma humoroso , ubi chermes minerale , sulphur antimonii tartarizatum , scilla , gummi ammoniacum , aliaque , alias efficacissima remedia , inertia erant , aurum fulminans cum uno alterove grano mercurii dulcis , præsentaneum erat remedium.



Qua de re, ut alios præteream me-  
mini memorabilis casus, qui 18. circiter  
ante annos Illustrissimam Aulicam Do-  
micellam L. B. de Kleng Augustissimæ  
piæ memoriæ Imperatricis Amaliæ per-  
quam familiarem concernebat.

Hæc corripiebatur asthmate humoro-  
so, orthopnæa dicto; nam nec in lecto  
jacere, nec respirare, nec loqui potue-  
rat; facie totoque corpore mirum in mo-  
dum intumuerat; denique ex omnibus  
quæ aderant signis morti proxima vide-  
batur. Clysmata stimulantia, & deri-  
vantia, vesicatoria, scilla, sulphur an-  
timonii tartarifatum, sal volatile oleosum  
sylvii, aliaque valentissima remedia,  
inanes erant medentium conatus. Tandem  
ex consilio præfati Magnifici D. Weber de  
Fürnberg præstituebantur pulvisculi ex  
auri fulminantis gr. VIII. mercurii dulcis  
gr. III. sacchari finiss. gr. XII. sæpius,  
vide.

videlicet, prout necessitas urgeret, omni bihorio, aut trihorio propinandi.

Hora vix elapsa post assumptam primam dosim, exhibebatur secunda, quam paulo post ingens copia excrementorum, maximam partem, ut ab auro fulminante fieri solet, nigrorum, notabili cum ægro-  
tæ levamine sequebatur; ex cujus remedii dein, quamvis parciore manu, continuato usu perfecte convaluit. Hæc ego tanquam testis ocularis, & ægrotanti diu noctuque assistens attuli & exposui.

Hujusmodi, ut superius dixi, casus multos habuimus, in quibus ex prudenti hujus remedii usu secundos experti fuimus effectus. Scio, aurum fulminans a quibusdam, sed theoreticis, pro drastico haberi; verum in similibus casibus consulendi sunt practici; ut Frid. Hoffman, Stalius, Necterus, Ettmüllerus, alii-  
que quam plurimi.

Ast

Ast manum de tabula; & illa, quæ nostri scopi sunt, prosequamur.

## LXI.

Multi practicum considerantes, habitum corporis esse tumidum, credunt satius, & convenientius agi, si serum illud per breviorē viam, nimirum per auctam transpirationem, & per promotos sudores evacuetur.

Ad hoc respondeo, quod talis tumor suam sedem, & radicem non tantum in cute, sed in visceribus, aliisque membranosis, & musculosis partibus habeat; qua ex ratione, & confirmante id experientia affirmo, quod ægri ex hac methodo non melius, sed pejus habeant; subtiliora discutuntur, crassiora vero visceribus magis impacta hærent, eaque corrumpunt.

Quapropter in simili casu melius, & securius agimus, si prædicta aperiti-  
va,

va, attenuantia, diuretica, aliaque superius recensita, in usum vocemus.

Interim superius jam insinuavi, quod etiam illa, quæ feri stagnantis discussionem, & distensionem per cutem augent, convenient, & curationem coadjuvent, cujusmodi sunt frictiones. Item nec absolum erit, quandoque prædictis decoctis aperitivis, & diureticis addere aliquid specier. decocti lignorum, sic enim fiet, ut una eademque fidelia humores stagnantes per diversa emunctoria evacuemus.

## LXII.

Quando prædictus tumor leucophlegmaticus discuti, & subfidere incipit, partes corporis, præsertim abdomen, quæ prius tumidæ, & tensæ erant collabescunt, & relaxantur. Quapropter in hoc statu solliciti esse debemus, ut alteri satisfaciamus indicationi, nimirum ut robaremus, naturalemque partibus

bus tonum conciliemus; quod obtinemus per supradictas frictiones, per remedia tonica, rhabarina, amaricantia & infusa vinosa cum marte.

### LXIII.

Hucusque studium nostrum erat, ut indicationibus, quæ totius corporis tumorem respiciunt, generaliter satisfaceremus; superest, ut pariter medelam illorum symptomatum, quæ præsentē tali tumore plurimum affligunt.

Duo sunt inter cætera, quæ hoc tempore magna medici cura, & attentione digna sunt. Primum, est sopor, seu comatosus affectus, qui denotat, ferocem colluviem, sive intra, sive jam extra vasa in cerebro hæreere & restagnare. In quo casu præter superius jam recensita remedia, vesicantia, præsertim nuchæ applicanda ordinari debent. Quinimo, si morbus, & coma exigit, capiti raso apponi debent.

Contingit tamen quandoque, ut cum tali comatoso affectu notabilis febris, & delirium conjungantur, quod denotat meningis, cerebrumque inflammata, convulsiones, gangrænamque metuendam esse.

In tali extremo casu præter jam dicta, sanguis in debita quantitate, sed præcipue sanguisugis post aures appositis, extrahendus est.

## LXIV.

Aliud molestissimum malum, quod tali tempore affligit, est ingens scroti tumor hydrocele, seu hydrops scroti appellatus, quem sæpe talem vidi, ut caput magnitudine, & amplitudine excederet; in simili casu fit, ut gravitate & pondere scroti vasa spermatica, nervique ex osse sacro oriundi tendantur, & doleant, præcipue dum æger situm rectum obtinet; quod incommodi genus sustentaculo, quo scroti pondus sustineatur, leniri potest.

Tumor iste sedem habet, non tantum in duplicatura membranæ musculosæ dartos dictæ, sed occupat etiam tunicas, testiculos ambientes; quin imo penis ipse, præsertim sub initium hujus affectus, una cum præputio intumescit, sicque exitum urinæ intercipit.

Quando vero scroti tumor augetur, tunc penis ipse retrahitur, & intra hunc tumorem absconditur; in quo casu uretra comprimitur, & exitus urinæ impeditur.

### LXV.

Quapropter in simili molestissimo statu omnem operam impendere debemus, ut humores hic stagnantes revolvamus, discutiamus, & evacuemus. Ac tandem his peractis prædictas partes laxas & flaccidas roboremus.

Primo scopo inservire possunt herbæ: Ruta, calamith. mont. hyssopus, chærefol. Flor. sambuci, meliloti, verbasci, chamæm. aliaque similia, quæ, prout

plus aut minus resolvere volumus, in lacte aut in aqua aut vino coqui, calidiuscule per modum fomenti scroto applicari, & sæpius renovari debent.

Prædictorum virtus resolvens augeri potest, si in illis quidquam de sapone, aut de sale armoniaco, aliove simili, dissolvatur.

Verum quæcunque etiam valentissima remedia externe adhibeas, nihil proficies, nisi quoque per interna superius recensita radicem mali tollas; quod, si feceris, efficies, ut externa internis remedia, & vicissim opitulentur.

Quapropter, dum tumor scroti, aliarumque partium subfederit, debemus laxitati, & atoniæ membranarum scroti mederi, quod fiet per fomenta sicca, five ex suprædictis herbis, & floribus, five etiam ex aliis cephalicis, confecta, & scroto apposita.

Huc



Huc etiam referri debent fumi aromatici, item aqua calcis, quæ cum sufficiente quantitate spiritus vini camphorati, aut spiritus Burrhi, aut nostræ aquæ anodynæ, misceri & duplicatis linteis calidiusculè applicari poterit.

Hæc sunt, quæ mihi ratio dictavit, experientia vero repetitis vicibus confirmavit, tam in primo, quam in secundo scarlatinæ stadio esse proficua remedia. Meliora necdum vidi, necdum legi; meliora vero in posterum ab aliis expecto.

## SECTIO IX. ET ULT.

*Adjunguntur particulares quædam  
de Scarlatina observationes, & annexæ  
sunt de eisdem annotationes.*

### LXVI.

#### Ægrotus I.

Puer hujatis civis filius, nonum circiter agens annum; 1753. primis diebus

Aprilis videbatur aliquantum languere, neque solita aviditate cibos exposcere, & edere.

Interim tamen noctu sat placide dormiebat, interdiu circumambulabat, cum aliis sibi paribus ludebat quidem, sed non ea, ut solebat, facilitate & alacritate.

Die circiter tertia maculæ rubræ in facie apparebant; verum quia puerulus de speciali aliquo incommodo non conquebatur, parentes flocci faciebant hæc exanthemata, credentes talia brevi dissipatum iri.

Die vero insequente, seu die circiter quarta morbi, eadem non tantum in facie, & collo frequentiora, sed & per reliquam corporis superficiem jam dispersa erant. Unde ego advocatus, postquam omnia rite explorarem, renunciavi, hanc esse scarlatinam benignam; nam pulsus videbatur esse naturali similis, æger post eruptionem exanthematum magis appetebat  
pla-

placidius dormiebat , magisque hilaris videbatur.

Die ab eruptione tertia , & a morbo , quinta , mane dum ægrum inviserem , vidi faciem reliquumque corpus intense rubere , palpebras , angulosque paululum tumere.

Die morbi sexta maculæ in facie pallescebant , & tandem die septima fere omnes evanuerant ; sicque morbus terminabatur sine omni desquamatione , & sine omni molesto symptomate ; neque tardius aliquod malum confectarium observaveram.

Æger toto morbi tempore non utebatur alio remedio , quam infuso ex scabiosa , cui addebatur aliqua portio lactis vaccini , & debita quantitas sacchari.

Præterea , cum tempestas frigida , & humida eo tempore urgeret , curavi , ut non tantum tempore exanthematum , sed etiam aliquot diebus tardius in lecto sedens , aut cubans , stragulis , quibus sa-

nus asuetus erat, coopertus, conservaretur æger.

Hujusmodi casus quam plurimos habui, a quorum recensione abstineo, cum hicce fervire possit pro omnibus aliis; in quibus fere eadem ratio medendi semper fuit.

## LXVII.

## ANNOTATIONES

## ad Ægrotum I.

Hicce casus explanat, & demonstrat communem, & ordinarium scarlatinæ benignæ decursum, progressumque.

Interim ex hoc casu possunt duo, quæ forsan non omnibus arridebunt, corollaria deduci; & quidem,

Primum, quod non semper, ut alii scribunt, scarlatina, sicut morbilli, cum desquamatione, terminetur. Ex quo alterum fundamentum contra Clar. Mortonium

nium scarlatinam a morbillis distinguendi defumi potest.

Secundum, quod quandoque, quamvis raro, eruptio exanthematum critica dici possit; hoc enim de scarlatina benigna, & quidem illa, intelligendum esse judico, quæ a motibus lentis, naturæ conformibus, non violentis, dependet; quia hoc modo illud, quod heterogeneum in corpore latet, facilius, aptiusque subigitur, separatur, & ad convenientia emunctoria deducitur; quod a motibus violentis, quacunque ex causa in corpore nostro excitatis, sperandum non est; quinimo, uti jam superius §. LII. & ex observatione Sydenham dixi, morbus de natura sua benignus hac ratione malignus evadit.

## LXVIII.

## Ægrotus II.

Infans quinque fere annos natus belle edens, & dormiens mane dum evigilaret, tota vix non facie rubebat; parentes exinde attoniti me advocarunt, & quid isthæc efflorescentia significaret, ex me postularant.

Ego inveni pulsum bonum, infantem hilarem, uti & alia, statum sanum referentia. Ad tactum tamen cutis præsertim in facie, calebat, & videbatur ardor quidam externus ægro molestus esse.

Unde sine hæsitazione declaravi, hæc exanthemata referenda esse ad scarlatinam benignam.

Eventus dein respondit promissis; nam morbi hujus sequens erat decursus.

Die sequente, seu secunda scarlatinæ rubebat intense non tantum facies, cillum, sed & aliæ corporis partes; facies  
sub-

subtumida apparebat ; æger de quodam sed præcipue oculorum ardore conquerebatur, neque lucem sine incommodo ferre poterat. Cætera somnus, & appetitus aderant, ut die præcedente.

Die tertia videbantur omnia esse vix non in eodem statu, ut die præcedente; nisi quod ad finem vergente eadem die exanthemata in facie, quæ prius intense rubebant, pallidiora apparerent.

Die quarta palleſcebant quoque alia, reliquum corpus occupantia exanthemata.

Die quinta in facie vix quidquam scarlatinæ apparebat.

Die sexta, & septima totum corpus erat ab exanthematibus liberum, quibus ſucceſſit deſquamatio illi, quæ in morbillis eſſe ſolet, ſimilis. Hoc tempore videbatur æger pariter quoad omnes functiones, tam animales, quam vitales, & naturales bene valere, in quo ſtatu etiam in poſterum permanſerat.

Toto

Toto morbi tempore non utebatur alio remedio quam sequente mixtura:

R. Aquæ sambuci unc. V.

Rob sambuci.

Syrupi de althæa aa unc. I.

misc. de qua omni hora, aut omni bihorio, unum alterumve cochlear sumpserat; & infusum ex scabiosa, superbiberat.

Præterea æger in debita transpiratione, & moderato calore conservabatur, & detinebatur.

## LIX.

### ANNOTATIONES

#### ad Ægrotum II.

Hoc singulare hicce casus docet, quod una cum morbo, & sine præcedente aliqua sensibili exacerbatione exanthemata scarlatina in conspectum venerint; quod aliquoties, quamvis raro, in scarlatina vidi.



Verum nemo mirabitur, qui experientia noverit, quod idem etiam in variolis evenire quandoque soleat. Plura vide Sect. IV. §. XXXVI. ubi leges illam particularem observationem, qua plures cætera sanissimi quasi momentanee obruebantur exanthematibus scarlatinis, aut saltem scarlatinam referentibus.

Item ex hoc, & præcedente casu eruere possumus, quod exanthemata scarlatina quædam citius, alia tardius dissipari, & evanescere soleant; nam quædam citissime, nimirum tertia ab eruptione die, ut plurimum vero quarta, quinta, aut sexta, raro tardius, dissipantur.

## LXX.

## Ægrotus III.

Alius puer octo circiter annos natus  
1756. primis diebus Junii corripiebatur  
pariter scarlatina benigna, quæ quinta  
cir-

circiter ab eruptione die cum subsequente aliquali desquamatione dissipabatur.

Cum eo tempore tempestas calida vigeret, sic æger iste, tam tempore efflorescentiæ quam vel maxime post illam interdiu a lecto abstinebat, & liberiori auræ se exponebat. Quo non obstante nihilominus bene valere videbatur.

Verum elapsis vix duabus a dissipata scarlatina hebdomadis inceperat toto corpore tumere; nimirum primo in facie, dein in manibus, & pedibus; item abdomen, & scrotum in sat magnam molem excreverant. Urina secesserat pauca, & crassa cum sedimento albo; alvus erat adstricta, appetitus, qui prius semper vigeat, inceperat deficere.

Quamprimum ad hunc affectum leucophlegmaticum advocatus eram prima cura mihi fuit, ut superius §. LIX. recensitis remediis incidentibus, attenuantibus, aliisque aperitivis, diuretis, &  
per

epicrasim evacuantibus uteretur æger: unde ordinaveram primo mixturam ex aquæ stillat. Petroselini unc. IV. spirit. salis coagulat. drag. III. syrup. de cihor. c. rheo unc. I. de qua omni bihorio, duo aut tria cochlearia fumeret æger, & quam nychthemeri spatio confumeret.

Hoc remedio utebatur sex diebus, sed sine notabili commodo; nam tumor præsertim in facie videbatur potius augeri, quam minui, neque urina majore, quam alias quantitate evacuabatur, neque alvus nisi clysmate sollicitaretur, respondebat.

Quare mirabar; quod hoc remedium quotidie tali dosi sumptum, in hoc casu, illo, quem tamen in aliis secundum expertus sum, effectu, frustraretur. Interim non abs ratione judicabam, quod, quamvis hoc remedio materiam peccantem non evacuaverim, tamen digesserim, & præpararim, ut dein eo facilius aliis valentioribus cedere possit remediis.

Qua-

Quapropter ordinabam infusionem rad. scillæ cum rad. asparagi, petroselini, & tartaro vitriolato, factam, & cum syrupo mannato aut flor. persicorum edulcoratam, de qua sæpius de die aliquot cochlearia sumpserat ægrotus.

Ex usu hujus remedii prima die factum est, ut ternis vicibus magnam materiæ viscosæ quantitatem evomuerit; & hunc effectum sequeretur alter, nimirum, aliquot de die sedes, copiosiorque urina.

In usu hujus remedii persistebat æger, ita tamen moderando, ut bis terve nycthemeri spatium alvus aperiretur; qua ratione magna feri copia non tantum per urinas, sed etiam per alvum evacuabatur.

Hoc ipso tempore curabam scrotum valde tumens sustentaculo fulciri, & fomentationes calidas ex superius §. LXV. descriptis carminativis, in vino coctis eidem applicari, sæpiusque renovari.

Qui-

Quibus dein effectum est, ut non tantum facies, artus, sed etiam abdomen, & scrotum, successive detumescerent, & spatio quindecim circiter dierum statum naturalem adipiscerentur, ægerque appetitum, somnum, vires, denique sanitatem perfectam consequeretur.

Tandem ad tonum naturalem tam generi vasculoso, quam nervoso, & membranoso conciliandum utebatur æger per decem circiter dies tinctura rhabarb. Rolfincii.

## LXXI.

### Ægrotus IV.

Eadem sinistra fors attigerat 1760. filiolum Illustriss. L. Baronis de Wenfer, sex circiter annos natum; hic enim in Augusto scarlatina benignissima laborabat; hæc sine omni desquamatione terminabatur.

Cum integerrima sanitate videretur gaudere filius, & tempestas ipsa calida quam optime faveret, sic non tantum domi libero se exponebat aëri, sed etiam

domo exhibat, atque hujus urbis pomœria auræ liberioris captandæ causa adibat.

Die circiter decima nona a morbo videbatur lassus, languidus & pallidus, dein sequebatur tumor in facie, manibus, pedibus, abdomine, scroto ac in universo corpore; qui de die in diem magis augebatur, ut huic similem haud quaquam viderim.

Quare in simili inexpectato & periculoso statu ordinabam primo prædicta salia aperitiva, diuretica, & per epicrasim evacuantia.

Alvus sollicitabatur sæpius clysmate ex decoctione specier. Dec. aperitivi cum melle mercuriali, & nitro, aut sale gemmæ. Scroto applicabantur fomenta primo ficca, ut sacculi ex furfuribus torrefactis, aut ex lignorum cineribus; dein vero ex superius recensitis speciebus carminativis in vino decoctis.

Verum ex omnibus his tam interne, quam extérne adhibitis nec alvus movebatur, nec urina majore quantitate prodidi-

dibat, nec tumor minuebatur, quinimo potius de die in diem augebatur.

Qua ex ratione valentiora remedia ordinaveram; inter quæ primum erat succus asellorum, quo cum prædictis salibus aperitivis, & diureticis per octiduum utebatur.

Cum vero neque ex hujus medicamenti usu æger proficeret, ad infusum scillæ confugi.

Ast ex omnium horum usu tumor totius corporis hydropicus, anxietates, respiratio difficilis, augebantur potius quam minuebantur, ut actum de salute ægri videretur.

Quo in extremo casu sequens prescripsi remedium:

R. Auri fulminantis scrup. I.

Magister mecoacon. gran. XXV.

Spirit. salis coagulati drag. I.

misce f. pilul. c. mucilag. tragac. pond. gr. I. quæ foliis auri, aut argenti obvol-

vi possunt. De his pilulis sumpsit æger omni bihorio unam alteramve: vix sumpserat talium novem, videbatur jam sæpius ad emittendam urinam, & ad deponendum alvum stimulari.

Ex quo factum est, ut die sequente tres habuerit sedes; & urinæ libras tres circiter emisit. Die vero tertia quinques aperiebatur alvus, & urinæ libræ ad minimum quatuor secesserant.

Qua ex ratione jussi, nychthemeri spatio quatuor tantum pilulas assumi. Ex quorum continuato usu magna feri copia tam per alvum, quam per urinas quotidie evacuabatur; sicque tumor faciei, abdominis, scroti, aliarumque corporis partium quotidie magis minuebatur, pristinusque corporis vigor successive restituebatur; & æger intra viginti aliquot dies integra sanitate fruebatur.

Interea, dum his pilulis utebatur æger, prædicta fomenta calida ex specie-



ciebus carminativis in vino applicabantur scroto.

## LXXII.

Postquam vero scrotum in totum detumuisset, applicabantur quandoque linthea fumo aliquo aromatico, & carminativo imbuta, quandoque vero eadem intingebantur in aqua calcis, & aliqua portione spiritus vini camphorati, & calidiuscule scroto applicabantur.

Ex eadem ratione, nimirum ad genus nervosum, & vasculosum roborandum, utebatur dein æger tinctura rhei aquosa cum tertia parte tincturæ martis cum succo pomorum, item infuso ex bacis juniperi.

## LXXIII.

Hoc singulare tamen in hoc casu observabatur, quod dum exanthemata scarlatina aderant, aliquoties saliva sanguinea, & loturæ carnum similis extiterit.

Item, quod, dum tumor leucophlegmaticus, in suo vigore constitutus erat, urinæ crassæ, & quandoque sanguineæ fuerint; dein vero, dum tumor jam notabiliter subsederat, urinæ fuerint clæræ, aqueæ, & aliquando etiam sanguineæ.

## LXXIV.

## Ægrotus V.

Alius octennis puer post superatam scarlatinam benignam inciderat in eundem tumorem leucophlegmaticum; Medicus ejusdem ordinabat diversa remedia aperitiva, incidentia, diuretica, adeoque salina, scillitica, quinimo rhabarbarina, roob ebuli, sambuci, de spina cervina & similia, sed omnia sine aliquo effectû; nam nec alvus exinde movebatur, nec urina in majore quantitate evacuabatur; unde tumor & anxietates potius exinde augebantur, quam minue-

nuebantur. Quapropter ordinabat pulvisculos ex jalappa, trochiscis, alhandali, aut diagridio sulphurato, cum rheo; item emulsa cum refina jalappæ. Ex usu quorum vehementer quidem purgabatur æger; sed dolorem in latere dextro circa regionem renis perſentiebat, ut preſſionem manus ferre non potuerit. Aderat præterea niſus ad vomitum, ingens fitis, febris magna, vigiliæ, ſumma virium proſtratio; his dein acceſſerat delirium, oculorum convulſiones, & tandem mors.

## LXXV.

## A N N O T A T I O N E S

ad Ægrotos III. IV. & V.

Hosce tres ægrotos, eorumque curationes atque alia huc ſpectantia una eademque fidelia examinanda fiſto. Unde ſequentia corollaria deduci poſſunt: videlicet.

Primo, quod tam scarlatina benigna quam maligna opus habeat debito & moderato lecti tepore, similique transpiratione: quibus neglectis ut plurimum status ille hydropicus supervenire solet.

Ego ipse mirabar, & adhuc miror, quod ista regula non tantum tempore hierno sed & æstivo tam necessaria esse videatur.

Sed suadent, & exigunt id repetitæ observationes; ratiocinia vero hic filere debent. Sic id ipsum in aliis casibus, ut erysipellate, vulneribus, ferme quotidie observamus; in quibus nisi partes læsæ debite tegantur, quantocius in pejus ruere solent tam hiemali, quam æstivo tempore.

### LXXVI.

Secundo, quod in alvi, & urinæ obstructionibus remedii dosis, quamvis quadruplicata assumatur, non exerat effectum, quem simplex ejusdem reme-

dii dofis in ftatu fano producere solebat. Unde neceffitas elucefcit in fimilibus cafibus non tantum talium remediorum dofim augendi, fed etiam ad medicamina valentiora, & magis activa confuglendi. Hoc ipfum confirmat ægrotus tertius, fed præfertim quartus.

## LXXVII.

Tertio, quod in hoc tumore leucophlegmatico purgantia draftica ut plurimum finiftrum foleant fortiri effectum, quod inter alios, quos ego vidi, ægrotus quintus confirmat.

Aft poffet aliquis hic oggerere, quod aurum fulminans, refina, aut magifterium mecoacanæ videantur pariter ad remedia draftica referenda effe; quo tamen non obftante, talia ego approbavi.

Refpondeo, ingentem effe differentiam inter remedia, quæ ab aloe, fcamonio, jalappa, aliisque, refina acri,

& tenaci prædictis, petuntur; & inter alia remedia, quæ ex auro fulminante, mercurio dulci, aut etiam magisterio mecoacanæ, defumuntur: quia illa constant particulis acribus, resina tenacissima obvolutis; unde fit, ut non tantum illa similibus remediorum portio, quæ in primis viis hæret, verum etiam illa, quæ ad sanguinem resorbetur, tenaciter adhæreat corpori; ficque constanter, & pertinaciter irritet tam genus vasculosum, quam nervosum & membranosum. Unde dein febris accenditur, inflammationi, putredini, & gangrænæ via sternitur.

Verum omnia hæc funesta symptomata a nostris remediis tam facile metuenda non sunt; quia aurum fulminans nec inhæret nec adhæret alicui corporis parti; neque ad massam humorum resorbetur; sed speciali suo pondere successive pertranseundo intestinorum tractum,

suc-

ſucceſſive pariter modo unam, modo alteram illorum irritat partem; ſibiſque una cum aliis in eodem canali, aut in vicinia hærentibus, ſtagnantibusque viam parat, & aperit.

Item aliter eſt de refina v. g. jalappæ & de refina mecoacanæ ſentiendum, nam refina jalappæ quacunſque ratione ſubigatur, aut corrigatur, ſua tenacitate, ita adhæret fibris, easque ſua acrimonia irritat; ut fere ſemper aut vomitus, aut tormina, tenefmus, aut febris, fitisque ejus uſum ſequatur; quapropter etiam ab ejus præſcriptione quantum poſſum abhorreo, & abſtineo.

Aliud vero de magiſterio, ſeu refina mecoacanæ fere quotidie edoceor; nam hæc nulla opus habet correctione, aut cum oleis ſubactione; a naturalibus motibus viribusque vitæ facile ſubigitur, & ſolvitur. Neque unquam ſpeciale aliquod incommodum, nimirum, dolorem, tormina, tenefmum aut febrem in-

inflammatoriam inde exortam vidi: Interim præfente febre, ab ejus ufu mihi tempero. Doleo tantum, quod hoc magni pretii remedium divitibus folummodo præstitui poffit.

### LXXVIII.

Siniftra fors, quam nofter ægrotus quintus a fupradictis drafticis expertus erat, confiftebat in febre illa inflammatoria, quæ principaliter renem dextrum, cerebrumque occupaffe, & dein in gangrænam degeneraffe videtur.

Tandem quarto illud mirabile fymptoma confiderandum reftat, quod aliquando tempore obfervantiæ, aliquando tempore tumoris leucophlegmatici obfervatur. Contingit nimirum, ut fub efflorefcentia fcarlatinæ faliva fanguinea, aut loturæ carniū fimilis appareat.

Item contingit quandoque, ut tempore tumoris leucophlegmatici urina fanguis



guinea, aut loturæ carniū fimilis fecedat; uti in nostro casu evenisse asserui.

Hoc symptoma ratione prognoseos alicui, minus in his rebus experto, imponere posset; verum coram testari possum hoc esse plane indifferens, adeoque nec mali, nec boni quidquam portendere.

Judico enim hoc symptoma eodem modo tam quoad causas, quam quoad prognosim, sicut mucum narium sanguinolentum in coryza, considerandum esse. Videntur enim vasa in [similibus casibus ita relaxata esse, ut sanguis facile vasa aliena intrare, eorumque oscula aperire, & exitum sibi quærere valeat.

Hoc tamen in nostro casu mihi mirum videbatur, quod urina ista sanguinea ab adhibitis quibuscunque diureticis, non exacerbetur, & exasperetur, quin  
imo

imo procedentibus copiosis urinis successive minuatur, & tandem abigatur.

## LXXIX.

## Ægrotus VI.

Infans bimulus laborabat scarlatina benigna, qui usque ad diem ab eruptione sextam videbatur quoad omnes functiones bene valere. Eadem die ad vespertas fere inopinato convellebatur; istæ convulsiones nunc magis nunc minus urgebant, quibus tussicula accesserat.

Die sequente continuabat idem calamitosus status; præterea facies rubebat, & aliquantum tumebat, gingivæ præcipue ubi dentes canini erumpere solent, rubebant, & dolebant, labia oris erant ficca, aderat febris, & fitis. Cum exanthemata scarlatina debito tempore evanescerent, neque de illorum retro-pulsu suspicio esse posset; sic tota hujus  
esse-

effectus tragoedia a dentitione merito repetenda erat.

Quapropter clysmata emollientia omni trihorio, aut quadrihorio injiciebantur.

Infanti nunc ferum lactis, nunc emulsa ex decocto v. g. hordei cum oxymelle simplici, nitro aut stibio nitrato, propinabantur.

Item, tam ratione tuss eos, quam ratione convulsionum, linctus ex oleo amygdalarum dulcium, & diacodio ordinabatur. Omnia hæc in remissione convulsionum, nullo modo, præsentibus convulsionibus, propinari, & deglutiri poterant.

Præterea gingivæ ungebantur sæpius cremore lactis, aut hordei.

Verum omnia hæc remedia non respondebant votis nostris; status enim morbi triduo integro fere idem erat.

Ab adstantibus, & putantibus hæc a retropulsis exanthematibus dependere, proponebantur vesicantia applicanda, ad materiam exanthematicam centro ad peripheriam evocandam.

Quibus ut secundum quid satisfacere viderer, fermentum panis cum acetorutaceo plantis pedum applicandum substitueram.

Cum vero prædicta symptomata a dentitione, adeoque ab inflammatione & sanguinis in cerebro, ejusque sinibus stagnatione dependere judicasset, curavi applicari sanguisugas post aures: quaratione quatuor, aut quinque sanguinis unciae extractæ fuere.

Aliquot post hirudines applicatas horis sat quietus pacatus, somnoque obrutus videbatur æger, neque dein evigilantem convulsiones prehendebant amplius, sicque lento gressu sanitati restituebatur.

## LXXX.

## ANNOTATIONES

## ad Ægrotum VI.

Similes casus sæpe contingere solent, ut nimirum infantes, tam in scarlatina, quam post illam dentitione afficiantur, quæ nunc plus, nunc minus negotii ægrotantibus faceffere solet.

Unde fit, ut ex adhibitis superius recensitis, aliisque similibus remediis quandoque sine ulteriore labore resipiscant.

Quod si non fiat, &, si convulsiones una cum febre inflammatoria urgeant, timendum est, ne morbus in gangrænam, & mortem terminetur.

Quapropter in similibus circumstantiis, vel debet quantocius fieri gingivarum debita incisio, vel conveniens sanguinis missio.

A prima plerique nostratium ita abhorrent, ut nullis ratiociniis flecti possint. Unde necessaria erit sanguinis missio.

Quinimo contingit aliquando, ut admissa, & facta gingivarum incisione nihilominus prædicta symptomata perseverent: in tali casu nisi sanguis mittatur, de ægro actum erit.

Præterea illud, quod vesicantium applicationem in his, & similibus casibus concernit, perquam bene notandum esse duco, quod nimirum, si talia in urgente inflammatione, & non præmissa sufficiente detractio sanguinis applicentur, semper inflammationem, morbumque augeant; gangrænam, mortemque accelerent. Idem dicendum, & sentiendum est de liquore bezoardico Buffii, de spiritu cornucervi, aliisque similibus præsentente febre inflammatoria adhibitis.

Hæc sunt, quæ medicis attentione digna, in scarlatina benigna obvenire solent.

lent. Altioris vero sunt indaginis, tam illa, quæ cum scarlatina maligna conjunguntur, quam quæ illam subsequuntur.

## LXXXI.

## Ægrotus VII.

Nobilis Adolescens hujatis D. Saluarii, seu Cæsarei sylvarum Præfecti de Mayr filius duodecim circiter annos natus, temperamenti sanguinei, 1751. in autumnus, grassante tunc Viennæ scarlatina, inceperat per intervalla horrere, & de lassitudine totius corporis, & de dolore capitis, conqueri; somnus erat interruptus, appetitus dejectus; quinimo die sequente aliquoties vomebat, biliosa, aliquamque in deglutinatione difficultatem persentiebat; quæ tunc bili acri, vomitu ejectæ attribuebatur.

Verum die tertia, dum ægrum inviseram, vidi jam exanthemata scarlatina, in facie; deglutitio erat magis la-

boriosa; fauces rubebant & tumebant; pulsus erat celer, densus & fortis; fitis magna; & æger soporosus videbatur, quin imo noctu subdelirabat & inquietus erat; continuabat præterea nausea, & nifus ad vomitum cum amaritie oris.

Die quarta tota jam facies colore rubro, ferme uniformi obfita, & aliquantum tumens apparebat.

Eadem die videbantur jam maculæ rubræ in collo, pectore, dorso, sat numerosæ; in manibus vero & pedibus paucæ. Alia vero symptomata erant eadem die quæ præcedente.

Die quinta facies, collum, dorsum, & pectus adhuc intense rubebant: in manibus & pedibus maculæ rubræ pariter numero augebantur.

Die sexta observari poterant in facie plures maculæ rubræ ab invicem distinctæ; quæ tamen die præcedente vide-



debantur unam valde latam maculam constituere.

Die septima in facie palleſcebant, in manibus vero & pedibus adhuc rubebant.

Aſt hoc notatu dignum erat, quod jam eadem die, ſed præcipue die ſequenti ſeu octava præſertim in manibus, & pedibus obſervatæ fuerint quædam veſiculæ albæ, milliaria alba, ſub ſui initium exactæ referentes; quæ tamen ſecunda & tertia die latiores factæ flacceſcebant, & ſubſequæ deſquamationi, ſeu decorticationi fundamenta præbebant.

Nam die duodecima, decima tertia morbi, & ſequentibus lamellæ integræ, & quaſi coriaceæ ſecedebant, quas æger ſine labore, & dolore detrahebat.

A die morbi nona uſque ad vigefimam ſecundam, aut tertiam videbatur æger melius ſe habere; nam libere deglutiebat, febris, & ſitis remittebant,

& placidius dormiebat. Interim præ debilitate in lecto se fere continuo continebat.

Quo tamen non obstante vigesima secunda & 23. morbi die observabatur tumere primo in facie, dein in reliquo corpore, ita, ut 28. morbi die tumor iste leucophlegmaticus summum attigerit gradum, & de salute ægri jam actum videretur.

Hæc est succincta hujus ægroti historia; quæ duos alios nostri ægroti fratres, duasque sorores comprehendere debet: nam aliquot diebus vix elapsis eodem scarlatinæ malignæ contagio afficiebantur, & eadem pariter scarlatinæ malignæ funesta symptomata, quamvis non omnes in eadem intensione experiebantur. Etenim febris aderat magna, deglutitio difficilis, tandem sequebatur, decorticatio, & tumor leucophlegmaticus in omnibus. Quæ quamvis tum  
ægris,

ægris , cum mihi medenti, multum negotii facefferent, nihilominus tamen omnes, favente Numine integræ sanitati restituebantur. Sed videamus qua ratione id factum fuerit.

## LXXXII.

Cum die morbi tertia ad hunc ægrotum advocatus fuisssem, omniaque symptomata rite examinasssem, vidi, adesse magnam febrem inflammatoriam.

Item cum bilis vomitum, amaritiemque oris considerasssem, judicavi, a spasmus vesicæ felleæ bilem per ductum Cholidochum ad intestinum duodenum, tandemque ad ventriculum exprimi & deferri. Adeoque curavi

Primo, ut juxta datas §. XLVI. regulas inflammationi prospicerem, &

Secundo, ut illud acre exanthematicum, & biliosum temperarem, & abluerem e corpore: fecus enim si bilis sangui-

ni mitceatur, febrem periculumque augere solet.

Quapropter curavi quantocius uncias circiter octo sanguinis per venæsectionem extrahi. Cum vero intra aliquot minuta sanguis extractus crustam lardaceam indueret, jussi repeti, & ex eadem jam incisa vena post bihorium totidem uncias sanguinis mitti. Parentes videbantur quidem venæsectioni obstare; sed dum illis deplorabilem deglutionis statum, imminensque suffocationis periculum, objicerem, facilius meis adnuebant votis.

Eodem tempore ordinabam gargarisinata ex decocto hordei, nitro & melle rosarum.

Item clysmata ex decocto hordei, & specierum emollientium; aut etiam ex lacte; quæ semel aut bis de die injiciebantur.

Pro acrimonia exanthematica, & biliosa temperanda, & abluenda ordinabam diversa remedia: ut decoctionem ex rad.

scor-

scorzoneræ, acetosæ, tamarindis, & nitro, fyrupo aut ribium, aut acetosæ aut oxymelle simplici edulcorandam.

Item emulsa ex feminibus frigidis, aliquando cum, aliquando sine semine papaveris albi.

Eisdem indicationibus satisfaciebat pariter serum lactis; aut etiam hydrogala. Quæ adfiduo, & in debita quantitate, prout unum alterumve ex his magis ardebat, propinabantur.

Tandem ad inquietudines sedandas, fomnumque conciliandum inferviebant paragorica.

His effectum erat, ut omnia periculosa symptomata primo mitigarentur, dein vero plane abigerentur; sicque æger die circiter decima quarta in vado esse judicaretur.

## LXXXIII.

Verum octo diebus dein vix exactis tumor ille leucophlegmaticus novas nobis injecit curas, novumque attulit periculum.

Hic enim lente, & insensibiliter se insinuabat, & non, nisi dum in notabilem molem increvisset, observabatur.

Quapropter sine mora prædicta aperitiva, salina, diuretica, & per epicrasim evacuantia in usum vocabantur.

Præterea tumentis scroto applicabantur cataplasmata ex speciebus carminativis cum vino in pulvem coctis.

Cum enim ex his tam per alvum, quam per urinam multum materiæ serosæ, & mucosæ quotidie evacuaretur, & tumor exinde successive decresceret, illis institi, neque alia valentiora molitus fui. Quorum ope dein intra 15. aut 16. dies ægrotus pristinam recuperavit sanitatem; sed non vires, quibus refarciendis longiore tempore opus erat.

## LXXXIV.

## LXXXIV.

Eadem fere methodo usus fui apud alios nostri ægroti fratres, & sorores; qui eodem morbo, & iisdem symptomatibus affecti erant. Differentia tamen quoad curationem interfuit aliqua: nam duobus natu minoribus sanguis missus non erat, partim propter teneram nimis ætatem, partim quod symptomata non ut in aliis exasperata viderentur.

Item in uno prædictorum ægrotorum nonum annum agente tumor leucophlegmaticus ita pertinaciter affligebat, ut prædictis salinis aperitivis non cederet, sed potius augeretur. Unde necessarium fuit ad scillam, & millepedas confugere, quibus tandem domatus fuit.

## LXXXV.

## LXXXV.

## ANNOTATIONES

ad Ægrotum VII.

Hicce casus præprimis ostendit necessitatem venæsectionis in scarlatina maligna instituendæ, præsertim dum magna inflammatio fauces occupat. Quo in casu si omittatur, vel gangræna vel suffocatio presso pede sequi solet.

Hoc assertum possum pluribus aliis observationibus corroborare, sed sufficiat illa, quæ eodem tempore nobilissimam D. D. Comitum de Kauniz Profapiam attigerat. Duo nimirum Illustrissimi ejusdem familiæ juvenes Comites, in Academia Sabaudica tunc commorantes, corripiebantur scarlatina maligna. In utroque exanthemata fere una cum morbo in conspectum venerant; in utroque pariter ingens inflammatio fauces occupabat.

In



In uno feu secundo genito, propter metum retro pulsus nulla venæsectio admittebatur. Unde etiam factum fuit, ut intra triduum suffocaretur æger.

Alteri vero, nimirum primogenito debita sanguinis missio instituta erat; qui quamvis dein totius fere corporis desquamationem, & decorticationem expertus, tumoremque hydropicum in longum tempus perpeffus fuerit; nihilominus tamen (favente Numine) omnem hujus truculenti morbi sævitiem elusit, superavit, evicit; cui Deus secundam sine fine tribuat vitam, ut Magni Parentis vestigia terens, sibi, Reipublicæque felix vivat.

Præterea ex hoc casu edocemur quasdam cautelas, quæ vomitum bilis, amaritatemque oris (scarlatinæ malignæ solita symptomata) respiciunt, & quæ medentibus inexpertis, ut ego sæpe vidi, imponere possunt. Vidi nimirum in similibus casibus emetica præscribi; a quibus  
non

non tantum febris, anxietates, deliria perpetuusque nifus ad vomitum, augetur sed & fauces, præcipue larynx, pharynxque ita inflammantur, ut ægro suffocatione necessario pereundum sit.

Quapropter meliore & saniore incedimus via, si illud acre irritans tempere-  
mus, diluamus, & abluamus per illa, de quibus superius in cura dictum est; quæ tam per os assumi, quam per enemata injici possunt. Neque ex enematibus diluentibus, & emollientibus, dummodo omne acre irritans, stimulansque absit, quidquam de retropulsu metuendum est, ut quidam opinantur.

Tandem quod tumorem leucophlegmaticum in nostro ægro attinet, exinde cognoscere possumus, quod quandoque levioribus aperitivis abigatur, quandoque vero nec valentissimis cedat remediis.

## LXXXVI.

## Ægrotus VIII.

Juvenis septemdecim circiter annos natus cubicularii apud ferenissimam Sabaudia Ducem filius laborabat scarlatina maligna cum inflammatione faucium, aliisque solitis symptomatibus; quibus stillidium narium se adungebat.

Omnia remedia, quæ legitimis indicationibus satisfacere possent, in usum vocata sunt, excepta sola sanguinis missione, quæ, quamvis ordinata fuisset, tamen instituta non fuit.

Morbus interea cum inflammatione faucium augebatur; his accesserant deliria, convulsiones, & tandem quarta ab eruptione die mors.

Vix denato ægro, & toto adhuc calente cadavere, ingens copia sanguinis ex ore, & præcipue e naribus, effluxit.

## LXXXVII.

## LXXXVII.

## ANNOTATIONES

## ad Ægrotum VIII.

Hæc succincta morbi, mortisque historia nos docet, quod ex inflammatione faucium, aliarumque adjacentium partium venæ jugulares, & vertebrales ita premantur, ut se in subclaviam exonerare non possint; ex quo dein fit stasis inflammatoria in cerebro, ejusque sinibus. Hoc ipsum evidentissime observamus in angina, pleuritide, & peripneumonia.

His præsuppositis quisque cognoscet vanos, inanesque esse omnes alios medentium conatus, nisi in similibus casibus sufficiens fiat detractio sanguinis. In quo casu, sicut superius §. LXXIX. ostendi sanguisugas in infantibus post aures appositæ optimum præstare effectum, ex eadem

dem pariter ratione, & quidem majore, cum fundamento judico, sectionem venæ jugularis in ætate provectioribus omnibus aliis anteponendam esse. Quia hæc immediate ex cerebri sinubus, aliisque ejusdem vasis, in quibus stasis inflammatoria hæret, derivat.

Ex quo patet ratio illius observationis medicis practicis notæ, qua videmus, largam narium hæmorrhagiam in morbis acutis proficuum esse, stillicidium vero semper mali ominis; quia denotat, statim inflammatoriam in cerebro, quam de se solvere potis non est, in gangrænam degeneraturam.

Unde mirum non est, quod non tantum in scarlatina maligna, sed in aliis etiam morbis acutis, præcipue si sanguis non erat extractus, statim post mortem magna cruoris copia tam per os, quam per nares, quandoque effluere soleat; quia post mortem vasa, quæ prius stricta, &

integra erant, relaxantur, aut erosa, facile aperiuntur.

Quare dolendum quod quidam præjudiciis capti malint proprio suffocari cruore, quam in certis circumstantiis venæsectionem admittere.

### LXXXVIII.

#### Ægrotus IX.

Adolescens syntaxeos studiosus tredecim circiter annos natus 1760. in Novembri afficiebatur scarlatina maligna hoc modo: Prima statim die de summo languore, debilitate, nausea, & nifu ad vomitum conquerebatur; secunda die in conspectum jam venerant exanthemata scarlatina in facie, aderant præterea respiratio, & deglutitio laboriosa, fitisque intensa; & reliqua, quæ prima die: Ego advocatus inveni pulsum celerem debilem, & vix perceptibilem, qui, quamvis ad-

esset

esset summa faucium inflammatio, & reliqua, quæ venæsectionem indicarent, me a sanguinis missione deterrebat, & arcebat.

Dum vero post meridiem ægrum delirantem suffocandumque invenirem, judicavi non obstante prædicta pulsum debilitate, unicum superesse remedium, spemque e sanguinis missione; qua dein in pede instituta, pulsus fiebant successive sensibiliores, & fortiores; respiratio, & deglutitio evadebat facilior; & adhibitis aliis remediis ægrotus breve intra tempus sanitati restituebatur.

## LXXXIX.

## ANNOTATIONES

## ad Ægrotum IX.

De simili observatione locutus sum jam superius §. XLVII. ubi ostendi, vi-

rium prostrationem, languoremque sæpius a spiritibus, & viribus oppressis, quam ab exhaustis dependere; etenim in florente ætate, & alias robusto corpore causa subitanei languoris aliter concipi vix poterit.

Idem sæpe observamus in aliis febribus continuis, malignis, miliaribus, & petechialibus, in quibus pulsus debilis, & summa virium prostratio adesse solet; quæ symptomata multos medicos a venæsectione detertere, & arcere solent.

Quia prædicta virium prostratio quandoque a dissoluta humorum massa dependere observatur; in quo casu si venæsectio institueretur, æger certo certius succumbere deberet.

Qua ex ratione cum viderim, in similibus casibus venæsectionem multum ad salutem aut mortem conferre posse, indagavi, industria, qua potui, ut determin-



minarem, quando sanguinis missio institui, & quando omitti debeat.

Si enim virium languor dependeat a spiritibus oppressis, tunc quamvis pulsus sit debilis, est tamen densus, & durus; item genæ rubent, & corpus ad tactum calet; neque præcesserat nimia alicujus humoris evacuatio, quæ omnia in spiritibus, & viribus exhaustis, aut humoribus dissolutis aliter se habent.

Ut tamen in similibus casibus eo certior de secundo ex missione sanguinis effectu reddar, curo primo modicam sanguinis quantitatem extrahi; si enim sanguis magno impetu effluit, & dein crustam lardaceam induit, aut in ejusdem defectu spissus, & tenax esse appareat, tunc sine omni cunctatione, & periculo debet debita sanguinis missio institui, ex qua dein æger potius alleviatur, quam opprimitur.

Similis petechialis epidemia an. 1758. & 1759. hic Viennæ totam obtinebat

hiemem. Nam ægri conquerebantur de summa totius corporis lassitudine, de diversis rheumaticis affectibus, de ingenti dolore capitis, pulsus erat debilis, & sub initium morbi fere semper naturalis, in quo casu si sanguis mittebatur, ego semper lardaceum, aut perquam spissum, & tenacem vidi; qua ex ratione binas, aliquando etiam ternas venæsectiones præstituiere solebam, ex quibus, aliisque appropriatis antiphlogisticis, effeci, ut ferme omnes, qui meæ curæ commissi erant, sanitati restituerentur.

Alii vero eodem petechiali morbo affecti, quibus sanguinis missio instituta non erat, die quinta, aut septima fiebant soporosi, delirantes, & die undecima, aut decima quarta convulsi plerique moriebantur.

Iste est status in morbis acutis, ut plurimum malignis, in quibus sanguis mitti debet. Aliter vero sentiendum est, ubi  
con-

contraria signa adfunt ; ut si sanguis missus diffuat , vixque cohæreat ; aut , ubi largæ evacuationes per hæmorrhagias , aut diuturnas diarrhæas , præcesserant ; ex quibus ægri viribus exhauriri solent. In talibus enim casibus a venæsectione , quantum possum , mihi tempero ; & ex fonte pharmaceutico & diætetico remedia peto.

## CX.

## Ægrotus X.

Adolescens quatuordecim circiter annos natus , 1758. corripiebatur scarlatina maligna , aliisque superius §. XXVIII. recensitis & solitis symptomatibus.

Primis morbi diebus utebatur emulsis , fero lactis , & tinctura florum rhæados pro potu ordinario , aliisque antiphlogisticis , & appositis remediis.

Verum præsentibus exanthematibus, propter metum retropulsus nulla venæsectio admittebatur.

Die autem ab eruptione tertia ad domandam acrimoniam septicam malignam exhibebatur cortex peruvianus, tanquam specificum antisepticum.

Ast de die in diem augebatur morbus, febris, difficultas in respiratione, & deglutitione; tandem accesserant ferocia deliria; convulsiones & mors.

### XCI.

## ANNOTATIONES

ad Ægrotum X.

Sancte fateri possum, quod hujusmodi funestos casus non tantum in scarlatina maligna, sed etiam in aliis febribus malignis sæpius viderim: si enim in similibus morbis, qui phlogisticam indolem præferunt, cortex sine præmissa venæ-

se-

fectione exhibeatur, semper plus damni, quam commodi exinde expectandum erit.

Aliter vero se res habet, ubi præmissa sufficiente detractio sanguinis generis nervosum, præcipue vero vasculosum laxum redditur, pulsus concidunt, debiles mollesque redduntur; in similibus casibus sperare possumus, fore ut cortex virtute sua tam antiseptica, quam tonica, multum emolumenti ægrotis afferat.

Si quis meis allatis observationibus non acquiescat, acquiescet tamen, si parumper considerarit observationes de exhibendo cortice in febribus intermittentibus, & remittentibus apud diversos celebres practicos.

Omnes practici norunt, quam male exhiberetur cortex in exacerbatione talium febrium; quia sic non tantum paroxismus, sed morbus ipse augeretur.

Quapropter sedulo & attente observare solemus talium febrium apyrexiam,

aut remissionem, ubi nimirum pulsus incipiunt fieri rariores, mollioresque. In quo statu dein cortex optimo cum effectu exhiberi solet.

## XCII.

## Ægrotus XI.

Hujatis civis filia decennis laborabat scarlatina cum magna faucium inflammatione; respiratione, & deglutitione, difficilibus. Huic nulla fuit venæsectio celebrata, sed superius §. XLIX. recensita remedia antiphlogistica, item gargarismata, & injectiones ex decocto hordei cum melle rosarum, & pauxillo nitri in usum vocabantur. Externe vero circa collum cataplasma ex speciebus emollientibus in lacte coctis tepide applicabatur.

Die ab eruptione circiter sexta quotiescunque gargarismata, aut injectiones in usum vocabantur, secedebant, & excreabantur quædam lamellæ coriaceæ, illis, quæ superius §. VI. describuntur, quoad omnia similes.

Inti-

Intimius dein harum lamellarum, internique oris institutum examen docuit, quod hæc eadem, quæ in partibus corporis externis, præsertim manibus, & pedibus fieri solet, decorticatio fuerit; nam non tantum membrana, quæ palatum, tonsillas, uvulamque investit, sed etiam illa, quæ faucium ulteriorem, & profundiorum expansionem occupat, separabatur, & excreabatur.

Tandem sed aliquot diebus tardius, succedebat eadem decorticatio in corporis partibus externis; quin vero ille solitus tumor hydropicus sequeretur.

### XCIII.

## ANNOTATIONES

### ad Ægrotum XI.

Tales lamellas coriaceas non tantum in illa angina, quæ scarlatinæ jungi solet malignæ, sed etiam in aliis anginis sæpius  
vidi.

vidi. Nuperrime cum Expertissimo, & Magnifico Domino de Zwenhoff tres hujusmodi habui casus; in quibus non tantum similes lamellæ, sed integræ thecæ, quæ uvulam, tonsillasque obvolvebant, separabantur, & excreabantur, relictis prædictis partibus nudis, intense rubris, & sensibilibus; eo quod tunc tenerrima, & tenuissima tantum membrana obductæ essent. Quapropter has partes lacte tepido, aut mucilagine seminum cydoniorum, donec naturalem tonum, vigoremque adipiscerentur, fovere debuimus.

## XCIV.

## Ægrotus XII.

Adolescens Dominus de Peterneg undecim circiter annos natus corripiebatur scarlatina maligna, quæ tam vaga & variabilis erat, ut nunc majore nunc minore copia appareret, item nunc magis,  
nunc



nunc minus ruberet, quod aliquoties de die observabatur, ficque per octiduum fere hujus exanthematis inconstantia perseverabat.

Ægrotus interea statim a principio morbi inquietus, anxiosus, nunc plus, nunc minus delirans erat.

Instituta consultatione applicabantur duo vesicantia ad furas; post biduum vero alia duo ad brachia, tandem, cum deplorabilis morbi conditio pejor apparet, aliud ad nucham apponebatur.

Item in usum vocabantur diversa superius §. XLIX. recensita antiphlogistica remedia, quibus etiam modicum camphoræ addebatur. Venæsectio vero propter metum majoris retropulsus non admittebatur.

Verum ex omnibus his nihil proficiebat, quin imo semper in pejus ruebat æger. Nam die undecima delirium fiebat furibundum, & phreneticum, per intervalla

valla enim æger soporofus, occlusis palpebris, demissa voce diversa obloquebatur, & aliquantum quietus apparebat; sed mox convulsis palpebris, oculisque alta voce clamare, & vociferari incipiebat, e lecto profilire, omniaque tegumenta abjicere, conabatur; donec magno clamore, violentisque corporis motibus attritus, & lassus per brevia quædam intervalla conquiesceret: quæ mœsta & horribilis scena sæpius repetere solebat.

In hoc casu curavimus capillitium abscindi; sicque capiti columbas vivas in duas partes scissas apponi, sæpiusque aliis recentibus substitutis repeti.

Item superius nominatis remediis adjungebantur aliquot guttæ liquoris bezoardici Buffii, & anodynæ mineralis: & tandem enemata emollientia applicabantur.

Ast omnes isti erant vani, & inanes conatus; etenim die circiter vigesima fiebat quasi hæmiplecticus, quoniam in latere sinistro nec manum nec pedem movebat, cum tamen in alio latere violentos sæpe ederet motus.

Quare tot & tam diuturnis ærumnis attritus æger die morbi vigesima octava expiravit.

## XCV.

## A N N O T A T I O N E S

## ad Ægrotum XII.

In scarlatina sæpe contingere solet, ut exanthemata ita vaga, & inconstantia observentur; qua ratione fit, ut morbus sedem suam per modum inflammationis in cerebro figat, ut in nostro casu contigit.

Hoc vero singulare præsens casus habet quod morbus malignus, & inflamm-

flammatorius ad vigesimam octavam usque diem se extenderit.

Si enim talis cerebri inflammatio, ut plerumque fieri solet, in gangrænam transeat, tunc citius finem vitæ imponit; si vero in suppurationem tendat, ut in nostro casu factum fuisse videtur, tunc morbus longius protrahi potest.

Quapropter si in simili, ut præsens est, casu, debito tempore sufficiens sanguinis detractio, præsertim ex vena jugulari facta fuisset, sperari potuisset, fore ut prædicta cerebri, meningumque inflammatio eo facilius, coadjuvantibus aliis appropriatis remediis dissipata fuisset.

Ex quo iterum patet, quemadmodum jam superius sectione IX. §. LXXX, dixi, quare in hoc casu neque ex vesicantibus, neque ex camphoratis, aliisque volatilibus æger profecerit quidquam; quinimo semper metuendum est, ne urgente inflammatione & omissa ve-

næ-

næfectione talibus remediis plus damni quam emolumenti afferamus.

### XCVI.

Hic quæstio institui posset, an non in similibus casibus artificialis vaforum hæmorrhoidalium apertio aliquid ad salutem conferre posset.

Ad quod respondeo, quod quamvis propriis experimentis necdum id affirmare, & confirmare possim nihilominus tamen ex aliis rationibus judicem, sanguifugas venis hæmorrhoidalibus appositas plurimum levaminis afferre posse; quia

Primo anatomicis constat, quod carotides, & vasa hæmorrhodialia opposita directione sanguinem vehant; adeoque sperandum est, fore, ut revulsio in hoc casu habeat locum.

Secundo, quia ex aliis similibus observationibus constat, ut in mania, apoplexia & phrenitide vera, quod nimi-

rum in his hoc remedium proficuum deprehendatur : unde propter analogismum credere possum, quod etiam in phrenitide nostra symptomatica idem conducere possit.

Sic Hippocratis Sectione VI. Aphor. 21. dicit: *Si insanientibus varices, aut hæmorrhoides supervenerint, morbi solutio fit.* Idem sentit Celsus Lib. II. I.

Item tristis experientia nos docet, quod a suppressis hæmorrhoidibus mania, apoplexia, phrenitis, aut epilepsia aliquando superveniat; adeoque a contrario cum fundamento judicare possumus, quod a resuscitatis hæmorrhoidibus, prædictis affectibus levamen afferri possit.

## XCVII.

## Ægrotus XIII.

Anno 1746. in autumnno grassante scarlatina ut plurimum maligna, mea filia tunc annorum 7. corripiebatur eodem mor-

morbo. Exanthemata, uti in præcedente casu erant vaga & variabilia. Unde ægra delirabat, furebat, clamabat, & vociferabatur fere diu, noctuque, ut jam prius dixi. Hæc tristis, & funesta morbi conditio durabat fere octiduo integro.

Expertissimus & eruditissimus D. Collega Steindl de Plessenet, qui mihi tunc a consiliis & auxiliis fuit, una mecum omnem salutis spem abscissam esse judicabat.

Ast præter omnium opinionem die circiter undecima in sedatum, placidumque prolabatur somnum; unde expergefacta mente constare videbatur, sed ad interrogata, aut nihil, aut non apte respondebat. Ex quo constabat, surditatem adesse; etenim tunc ægra de dolore aurium conquerebatur; si aures contrectabantur, aut premebantur, dolebant.

Quapropter cataplasma ex speciebus emollientibus in lacte coctis applicabatur. Brevi dein aures plorabant materiam quandam puriformem, & striis sanguineis mixtam. In quo casu decoctum hordei cum melle rosarum sæpius auribus infundebatur tepide; sicque materia illa purulenta breve intra tempus abstergebatur, & abluebatur; ex quo ægra de die in diem facilius exaudiebat, meliusque valebat. Et tandem, benigno favente Numine, integræ restituebatur sanitati.

## XCVIII.

## ANNOTATIONES

## ad Ægrotum XIII.

Erysipelas, variolæ, alique similes morbi nos docent, quod ipsorum materia phlogistica, si superficiem corporis  
non



non occupet, facile caput petat, ibique inflammationi viam sternat.

Hoc ipsum in scarlatina maligna commune quidem, sed funestum symptoma esse solet. In nostro enim casu videtur inflammatio cerebrum, & meninges occupasse, quæ nisi critice ad aures mota fuisset, infallibiliter, aut in gangrænam aut in suppurationem degenerasset. Hæc metastasis facta fuit a parte nobiliore, nimirum cerebro, ad minus nobilem, & quidem cum symptomatum alleviatione, & die critico; adeoque ad motus criticos naturæ revocanda est.

Tales metastases legimus apud Hippocratem in Coacis prænotationibus N. 1. sed ibidem N. 2. legitur metastasis symptomatologica ad aures; quia morbus exinde non minuebatur sed potius augebatur.

Tandem hic meminisse convenit aliquarum, quæ ad hunc casum spectant notabiliorum observationum:

Sic Herula de Stab 9. annos nata, meam scarlatinā maligna laborantem filiam sæpe inviserat, eique adstiterat; unde factum est, ut in eundem incidere morbum, in quo exanthemata, ut in præcedente casu, vaga & inconstantia erant; ægra pariter delirabat, furebat, ac tandem convulsa mortua est.

Item & eodem funesto modo contigit aliquot Illustribus de nobili Familia L. B. de Nimsch Prolibus, quæ ex truculento hoc morbo aliquot dierum spatio denatæ sunt.

### XCIX.

Congrua & opportuna se offert hic occasio brevissime quidquam de illa notabili observatione dicendi; quam Clarissimus Hamilton de febre miliari affert. Observat enim hic Eruditissimus Vir in ejusdem historia I. & II. quod, si in exanthematibus miliaribus fiat raptus ad cerebrum, & deliria urgeant, nihil magis

gis conducat, quam purgans antiphlogisticum, & venæsectio. De venæsectione jam plura dixi superius: quæstio itaque esse posset; an non in illo casu scarlatinæ malignæ ubi fieret raptus ad cerebrum, & deliria urgerent, purgans aliquod antiphlogisticum ordinari quoque posset; cum eadem ratio, quæ in miliaribus illud hic quoque suadeat. Sane hic optime quadrat illud, quod extremis morbis extrema remedia optima sint; truculento enim huic morbo duro cuneo profecto opus est; neque similem ægrum prognostico relinquere, sed alia atque alia experiri debemus remedia.

## C.

## Ægrotus XIV.

Studiosus hujatis civis filius, octo circiter annos natus, corripiebatur scarlatina, quæ primis efflorescentiæ diebus benigna apparebat; nam eo tempore

æger diu noctuque quietus esse videbatur; item exanthemata triduo integro faturate rubebant, & constanter copiosa aderant.

Verum his non obstantibus die morbi circiter septima, & ab exanthematum eruptione quinta; æger tota nocte inornis, inquietus, & fiticulosus quinimo delirans esse dicebatur. Pulsus, qui prius fere naturalis erat, fiebat celerior, & durior.

Die sequente augebantur omnia prædicta symptomata; nam major aderat inquietudo, major mentis alienatio; per certa intervalla clamabat, vociferabatur, & e lecto profilire conabatur.

Hæc dira symptomata sequentibus diebus nunc magis, nunc minus urgebant; & quamvis remedia diluentia antiphlogistica, emulsa, pægorica, aliaque similia, interne; externe vero enemata, vesicantia, in usum vocata fuerint, nihil-  
omi-

ominus tamen, die 18. morbi convulsus mortuus est.

## CI.

## A N N O T A T I O N E S

## ad Ægrotum XIV.

Sane ego sæpe mirabar, & adhuc admiror, quod scarlatina, quæ optima signa præferre videtur, quandoque mēdentes, aliosque fallere possit.

Iste meo judicio est verus Character morborum malignorum, qui ideo maligni dicendi sunt, quia nobis facile imponere possunt.

Tales casus plures habui, & ideo cautior redditus de morbi natura facile ante debitum terminum definire non soleo.

In similibus casibus videtur materia exanthematica ad cerebrum rapta, statim inflammatoriam ibidem induxisse.

Quapropter cum omnia prædicta , quamvis valentissima , in usum vocata remedia videantur imparia tanto tollendo malo , unica spes superesset ex sanguinis missione , & antiphlogisticis per epicasim evacuantibus ; & statim ab initio talis exacerbationis , methodo a Clariss. Hamilton præscripta , ordinatis : quia , si inflammatio jam adolesceret , vix quidquam boni exinde sperandum erit ; in tali enim statu , aut in gangrænam , aut in suppurationem tenderet inflammatio.

Interea hic superficialiter saltem illam observationem attingere debeo , qua in similibus casibus videmus quandoque fieri metastases ad aures , parotides. Tales metastases aliquando fiunt critice , aliquando vero symptomatice. Vide §. XCVII.

Ast hoc ipsum omnes medici practici observant quandoque etiam in aliis morbis acutis contingere.

## CII.

## Ægrotus XV.

Perill. Domini de Baumaister filius, 13. circiter annos natus, 1761. primis Aprilis diebus sine manifesta causa fiebat languidus; tristis, prima statim morbi die, nec appetebat, nec placide, ut alias dormiebat. Item de siti, dolore capitis, & aliqua in deglutiendo difficultate conquerebatur.

Secunda morbi die aderant jam exanthemata scarlatina in facie, febris erat magna, & urina saturate rubicunda, sitis, & reliqua, ut die præcedente.

Tertia die totum corpus videbatur quasi una macula saturate rubra oblitum, subtumidum, & ad attactum, præcipue in manibus, adinstar carbonis igniti urens.

Die quarta idem rubor, & ardor perseverabat. Interim, quod mirum, non obstante prædicto ardore, pulsus

fus neque tam celer, neque tam durus, ut diebus præcedentibus, observabatur. Item fitis non erat ita intensa, neque inquietudo tanta.

Die quinta in facie jam palleſcebant exanthemata perfeverante tamen prædicto rubore in aliis corporis partibus.

Die sexta & ſeptima palleſcebant, & in toto ferme corpore evaneſcebant exanthemata; exceptis tantum illis, quæ pectus occupabant; nam hæc biduo integro diutius; adeoque ad nonam uſque morbi diem, perfeverabant.

Hic adnotare debemus, quod jam quarta morbi die in manibus quædam minimæ papulæ albæ, exanthemata miliaria referentes, in conſpectum venerint; quæ numero, & volumine ſucceſſive auctæ futuræ decorticationi fundamenta ſternebant; nam die morbi ſexta epidermis præſertim circa cubitum, & carpum fiebat alba, & in diverſæ figuræ lamellas, aſt adhuc ar-

cte



cte cum subiecta cute cohærentes , finebatur , quæ fequentibus diebus successive a cute secedebant , & quædam plus , quædam minus densæ separabantur.

Mirabilis illa decorticatio erat , quæ in volis manuum contingebat ; nam epidermis crassa , & ad instar bergamenæ densa , volas manuum exacte æquans , referensque abscedebat ; quam hodie dum propter rei raritatem pixidi inclusam Parentes conservant.

Prædicta decorticatio in manibus tantum observabatur ; etenim quæ in facie , pectore , dorso , reliquoque corpore fiebat , erat illi desquamationi , quam in morbillis videmus , similis.

Die morbi decima quinta , & decima sexta , ubi æger jam perquam belle valere videbatur , inceperant tumere , & dolere parotides , aliæque glandulæ colli.

In quo casu æger febricitabat , sitiebat , nec caput , nec collum movere pot-

poterat; quinimo preffis a prædicto tumore maxillæ inferioris musculis os ad capiendum cibum, & potum difficulter aperire valebat. Illa vero, quæ assumebat, sine magna molestia deglutiebat; quod denotabat, tonsillas, aliasque laryngis, pharyngisque glandulas liberas esse.

Iste tumor glandularum solebat sæpe, & celeriter variare situm; etenim nunc magis prædictas colli glandulas; nunc oxillares, mox dein inguinales occupabat, molestabatque. Quapropter mirabar, quod materia peccans tam cito ab una corporis parte ad aliam migrare & transferri possit. Verum tamen postquam considerassem idem fieri in vario-  
lis, & in arthritide vaga; videbar mihi dilucidius vias, per quas id contingeret, percepturus; nimirum non tam lege circulationis, quasi materia peccans, ad massam humorum resorpta, ad prædictas  
par-

partes deponeretur, quam quod median-  
te membrana cellulosa facile ab una parte  
ad aliam migraret, judicabam.

Ratio asserti consistit in ipsa experi-  
entia, qua videmus quod tales materiæ  
translationes fiant sine notabili exacerba-  
tione; sic in variolis tumor faciei trans-  
fertur ad manus & pedes, sine speciali exa-  
cerbatione; item in arthritide vaga sæpe, &  
sat cito materia peccans transfertur ab  
una parte corporis ad aliam pariter abs-  
que præcedente aliqua exacerbatione.

Hoc quidem verum est, quod tam in  
variolis, quam in arthritide vaga, dum  
materia peccans in aliqua parte sedem fi-  
git, dolores, tensionesque ibidem effi-  
ciat; ast si prius circulo humorum com-  
municaretur, deberet febrem, anxietates,  
& inquietudines excitare antequam  
ad aliquam partem fieret depositio.

Hoc ipsum fere quotidie videmus in  
criticis evacuationibus morborum acuto-  
rum;

rum; in quibus materia peccans circulando antequam per urinas, per alvum, aut per aliam viam, critice evacuetur, febrem accendit, anxietates deliria, aliaque gravia symptomata exasperat; juxta effatum Hippocrat. Sect. II. Aphor. 13. *Quibus crisis fit, his nox ante exacerbationem gravis est.*

Qui vero plura de membrana cellulosa legere cupit, videre poterit in Illustrissimi Domini de Swieten comm. Tom. I. §. 382. Item in Magnifici Archiatri de Haen tractatu de febrib. exanthem.

Sed redeamus ad nostrum casum: Hic molestus, atque ab omni periculo non immunis, status perdurabat usque ad vigesimam quintam circiter morbi diem; quo tempore non tantum febris, & tumor minuebantur, ac tandem dissipabatur; sed & libertas motus prædictis partibus conciliabatur; sicque ægrotus, quamvis sat ægre lenteque pristinae sanitati restituebatur.

re-

Remedia vero, quibus tam primis quam sequentibus morbi diebus, dum febris augebatur, utebatur æger, erant illa ipsa diluentia, antiphlogistica superius §. XLIX. exposita.

Ad tumores glandularum colli, parotidumque discutiendos applicabantur secundo cum effectu ab expertissimo Domino Reter, Chirurgiæ Doctore facculi ficci, quibus species carminativæ in pulverem redactæ inclusæ erant.

Phlebotomia autem, quamvis cum fundamento non tantum in principio morbi, sed etiam tardius, nimirum die 16. aut 17. dum febris fere inflammatoria urgebat, celebrari potuisset, nihilominus tamen omissa erat; quia timendum fuit, ne adstantes, & obstantes finistrum morbi eventum, quem metuebamus, huic unice, ut in similibus casibus fieri solet, adscriberent

Verum hic annotare debeo, quod, dum æger resipiscere videbatur, urinæ crassæ cum copioso sedimento secesserint, quod signum erat materiam peccantem hac via evacuari.

## CIII.

## A N N O T A T I O N E S

## ad Ægrotum XV.

Non tantum præsens, sed etiam plures alii similes, quos habui casus, docuerunt, quod, quo plura, & frequentiora cutem occupent exanthemata, & quo plus partes affectæ ad attactum urunt, eo major & notabilior fiat decortication. In quo casu diversa malæ notæ consuetaria metuenda restant; vel enim tumores & indurationes diversas corporis glandulas, vel tumor leucophlegmaticus totum corpus occupat, & pertinacissime vexat.

Qua-

Quapropter omni possibili cautela opus est; ut nimirum æger in debita transpiratione ad quartam usque hebdomadam detineatur; quo tempore, si nihil prædictorum accesserit, sperandum est, fore, ut sine periculo liberam in posterum capere possit auram; quod forsan aliquibus, in hoc morbo minus expertis, aut certis præjudiciis captis, paradoxum videbitur. Ast hæc, quæ scribo practicos, minus alios attingant, velim.

Præterea prædicta mala confectaria ultronee præcaventur, si alvus quotidie respondeat; quod si non fiat, ut plerumque contingere consuevit, debet, aut appropriato enemate, aut superius §. XLIX. recensitis remediis sollicitari sui que officii admoneri. Sic enim efficimus, ut humores ferofi, lymphaticique, qui in membrana cellulosa, viscera abdominis perreptante, facile restagnare possent, tum

libere circulent, cum etiam per urinas, aliasque vias libere evacuentur.

Qua ratione non tantum prædictos glandularum, sed totius etiam corporis tumores præcavimus.

Præterea ex his, similibusque observationibus constat, quod depositio materiæ peccantis quandoque ad internas, quandoque ad externas, & aliquando ad utrasque partes simul fiat; unde dein longe majus periculum, majorque in curatione labor.

#### CIV.

#### Ægrotus XVI.

Anno 1759. ego cum Magnifico, & Expertissimo Domino de Humelauer advocatus fui ad filiam Perill. Domini de Kraufan in Academia Sabaudica vice Directoris. Hæc tumebat toto corpore, difficulterque, & frequenter respirabat febricitabat, alvus filebat, & urina sup-  
pri-



primebatur. Dum in causam hujus funesti tumoris leucophlegmatici indagemus, Parentes ægrotæ nunciabant, narrabantque ante quatuor circiter hebdomadas in ægra observatas fuisse quasdam maculas rubras, totum corpus occupantes; quæ cum tridui tantum persisterent, & sine notabili molestia decurrerent, flocci factas fuisse. Sicque in sex rerum non naturalium regimine vix aliquam curam, aut cautelam adhibitam fuisse.

In tali extremo rerum statu, quamvis repetita enemata, aperitiva, diuretica, frictiones, aliaque similia, in usum vocata fuissent, nihil tamen, quod spem nostram erigeret, effici poterat. Unde evenit, quod prædixeramus, ut paucis post diebus vitam cum morte commutaret ægra.

## CV.

## ANNOTATIONES

## ad Ægrotum XVI.

Ex hac historia discimus, quod scarlatina etiam benigna tam quoad diætam, quam quoad transpirationem certis cautelis rite observandis, opus habeat; secus enim metuendum est, ne subsequens affectus plus negotii, quam primarius facessat; sicque error posterior fiat peior priore.

Pariter exinde patet, quod, si in simili tumore leucophlegmatico jam febricula adsit, vix quidquam boni sperandum restet; quia signum est humores restagnantes jam putrescere, corpusque in corruptionem & gangrænam tendere.

Hoc ipsum in hydrope, ascite dicto, ego summa cum admiratione sæpe contem-

templatus sum, dum vidi serum in abdomine ad plures mensuras collectum, non tantum per multas hebdomadas, sed per multos etiam menses sine putredine hærere posse. Quamprimum vero putrescere incipit, tunc æger magis sitit, febricitat, ac tandem brevi emoritur.

Ex hoc ipso fundamento sæpius admirabar, quosdam humores restagnantes, aut etiam extravasatos cito & facile; alios vero lente, aut nunquam corrumpi, putrescere.

Sic enim videmus, quod humores, qui in inflammationibus, in febribus continuis, ardentibus, malignis restagnant citissime in corruptionem vergant. Alii vero, qui v.g. in fugillationibus oculorum, aliarumque partium subsistunt, non tam facile in putredinem tendant.

Idem dicendum est de sero hydropicorum, de humore, quem embranæm

membranæ amnios, & chorion in gravidis continent; qui non tam facile putrescunt.

Unde patet, quod quamprimum humores nostri corporis putrescere incipiunt, exinde oriatur major febris, majusque periculum.

## CVI.

## Ægrotus XVII.

Puer octennalis laborabat scarlatina, ad malignam potius quam ad benignam revocanda.

Huic sub initium quartæ ab ortu scarlatinæ hebdomadæ supervenit tumor leucophlegmaticus; in quo scrotum, ut mihi dein relatum fuit, monstrose tumebat.

Huic ægro medebatur chirurgus, qui ægri parentibus erat familiaris. Sed præ aliis hic notari meretur methodus, qua tumorem scroti tractabat; applicabat enim dies noctesque fomenta calida sicca ex cineribus lignorum. Item sæpe inun-  
ge-

gebat scrotum cum spiritu vini camphorato, & cum alio liquore ut mihi videbatur, cum aqua calcis, mixto.

Quæ vero interne adhibita fuerint remedia rescire non poteram. Interim ex his effectum fuit, ut tumor ille hydropicus dissiparetur; quin imo tumor ipse scroti magnam partem evanesceret; verum durities quædam ad tactum indolens in scroto permanebat, quæ partim mole, partim pondere ægroto incommoda erat. Interim tamen æger quoad alias omnes functiones bene valebat.

Hæc ego dein, cum ad ægroti parentes ægrotantes advocatus eram audivi & vidi.

Quapropter jussi, species carminativas cum cerevisia in formam cataplasmatibus redactas, & coctas scroto apponi, sæpius renovari, diutiusque continuari.

Item ordinavi purgans ex rheo, & diagridio sulphurato cum uno alterove

grano mercurii dulcis bis qualibet hebdomada exhibendum. Verum tamen, quia dein parentes cum ægro sedem, & domicilium mutarunt, ulteriorem hujus morbi decursum ignoro.

## CVII.

## ANNOTATIONES

## ad Ægrotum XVII.

Superius §. LXIV. jam ostendi, quod tumor scroti hydropicus non tantum tunicas testiculos ambientes, verum etiam membranam musculosam dartos dictam occupet, seque intrâ ejus duplicaturam insinuando, eandem distendat.

Quare, si in simili casu talia applicentur, ut in nostro casu prædicta calida & sicca fomenta, tunc subtilissima discutiuntur, crassiora vero minimis vasculis impacta hærent. Si vero a spiritu vini  
cam-

camphorato prædicta vasa adhuc magis constringuntur, debent eadem adhuc magis ibidem incarcerari. Ex quo dein fit, ut in nostro casu contigit, ut humores una cum vasis in unum corpus scirrhosum quasi concrecant.

In simili casu, postquam hoc tempore per diversa capta experimenta jam constat, cicutam tam interne quam externe adhibitam, esse specificum ad tumores remedium, sane hoc omnibus aliis hucusque inventis remediis anteferendum esse judico, non neglectis tamen superius recensitis & ordinatis purgantibus mercurialibus; quia experientia nos docet, quod nihil magis minima vasa pervadere, & pervia reddere possit, quam mercurius. Plura de usu cicutæ legi possunt in tractatu de variolis §. CCCXI.

#### CVIII.

Huic similem fere errorem vidi ab alio chyrurgo committi in tumore scroti  
post

post scarlatinam superveniente. Cum enim æger in simili casu de potiore incommodo ex tumore scroti conqueretur, judicabat chirurgus, quod possit sacrficatione non tantum prædictum incommodum, sed etiam tumorem ipsum funditus amovere. Quapropter sacrficationem instituit, unde evacuabatur quidem multum feri, & scroti tumor imminui, minime vero penitus dissipari videbatur; item membrana dartos, quæ prius tensa & pellucida erat, corrugabatur; verum, tamen aliquot diebus vix elapsis iterato distendebatur, pristinumque scroti tumorem referebat; atque eadem ut prius incommoda, & discrimina minabatur.

Qua ex ratione necessarium fuit, remediis tam internis aperitivis, diureticis, & per epicrasim evacuantibus; quam externis carminativis, & discutientibus superius §. LXV. jam descriptis affectum hunc leucophlegmaticum oppugnare.

Ex.



Ex quibus tandem quamvis sat lente effectum fuit, ut patiens pristinae, & perfectae restitueretur sanitati.

Unde iterato constat, quod in tumore leucophlegmatico omnia particularia medentium molimina frustranea sint; nisi radicaliter affectus hicce tractetur; & abigatur per remedia superius descripta.

Isti, quos observavi, & adduxi, sunt singulares, & selecti de scarlatina casus, plures similes, si actum agere videri cuperem, afferre possem: ideoque quia talium, aut per decursum hujus operis superius jam meminerim; aut quia similes ad supradictos casus revocari possint, tacitus præterire constitui.

F I N I S.

# ERRATA NOTABILIORA

I N

## TRACTATU DE SCARLATINA.

Pagina	121.	Linea ultima	lege aâ 9r. β.
	148.	5.	lege deponendam pro de- ponendum.
	154.	1.	præditis pro præ- dictis
	156.	14.	efflorescentiæ pro ob- servantiæ.
	184.	ib.	phlogistica pro phlo- gitica.
	195.	14.	prolabebatur pro prolabatur.
	205.	1.	findebatur pro fine- batur.
	208.	18.	dissipabantur pro dis- sipabatur.
	215.	ultima	dele embranæm.


# ERRATA NOTABILIORA

## IN

### TRACTATU DE TERRÆMOTU.

Pagina 70.	Linea 6.	lege	atterebatur pro at- terabatur.
81.	- - -	1.	- - aperiatur terrâ.
94.	- - -	12.	- - quotidie 48 minu- tis &c.
113.	- - -	16. & 17.	- - causa materialis pro causam materiale[m].
118.	- - -	8.	- - 1 <sup>me</sup> debet deleri.
127.	- - -	11.	- - contigit pro con- tingit.

Reliquos, qui in his quatuor Tractatibus  
offenduntur errores, benevolus  
Lector ipse corriget.



TRACTATUS IV.  
DE  
TERRÆMOTU.

A U T O R E  
MARCO ANTONIO  
PLENCIZ,  
MEDICO VINDOBONENSI



---


VIENNÆ AUSTRIÆ,  
TYPIS JOANNIS THOMÆ TRATTNER, CÆSAR. REGIÆ  
APOST. MAJEST. AULÆ TYPOGR. ET BIBLIOP.  
MDCCLXII.

*Perpetua sibi omnia promittentibus in mentem  
non venit, id ipsum supra quod stamus, sta-  
bile non esse. Seneca natur. quest. Lib. 6.*

# PRÆFATIO AUTORIS

A D

## TRACTATUM IV. DE TERRÆ- MOTU.

orrendus & memorabilis terræmotus, qui 1. Novembris 1755. omnes penemundi partes conquassabat, & devastabat, incitavit multa Philologorum ingenia, ut in ejus naturam, originem & causas indagarent; quorum ratiocinia cum meis votis ad explananda terræmotus mirabilia phænomena minus apte responderent; ego ipse, ut mihi meoque sciendi desiderio satisfacerem, formavi systema quoddam, unde non tantum quisque terræmotus, sed & origo fontium, montium, conchyliorum, æstus marini, multaue alia lectione digna clarior, planiusque deduci possint.

A 2

Qua-

Quare factum est, ut eadem, quæ sparsim annotaveram, mihi-  
que soli destinaveram, hac occasio-  
ne colligerem, in ordinem redige-  
rem, aliisque ut spero non ingrata  
futura communicarem, quæ eo gra-  
tiora pluribus fore confido, quod  
illius horribilis 1755. terræ motus  
dissertationem, latino sermone ty-  
pis datam, adhucdum desiderari  
videam. Unde hac, quam tibi fi-  
sto, Benevole Lector, fruire; fa-  
ve, & vale.





## SECTION I.

**B**revem , & succinctam terræmotuum  
historiam ab initio mundi ad hæc usque  
tempora productam , exhibet ; ubi terræmo-  
tus , qui 1. Novembris 1755. Ulyssi-  
ponem , magnamque globi terraquei partem  
conquassabat , item illi , qui Austriam cum  
Metropoli Vindobona , affligebant , expla-  
nantur.

## SECTION II.

**D**e terræmotu in genere , ejus origine ,  
& causis.

## SECTIO III.

**D**e præcipuis terræmotuum phænomenis, item de fontium, montium, conchyliorum, æstuum, ventorum, morborum, & aliorum, quæ ex nostra sententia sequuntur origine, causis, & effectibus agit.





TRACTATUS IV  
DE  
TERRÆMOTU.

---

SECTIO I.



Uccinctam. & compendiosam  
terræmotuum, illius ve-  
ro, qui 1. Novemb. 1755.  
magnam globi terraquei par-  
tem convellebat, magis distinctam sistens  
historiam.

## I.

Quamvis probari non possit, credibile tamen videtur, jam ante diluvium universale a terræmotu, & exundationibus afflictum fuisse globum terraqueum, a quibus diversa continentia diruta, & a se invicem sejuncta fuere; ratio asserti est, quia causæ physicæ materiales, & occasionales, a quibus nunc ille dependet, jam tunc aderant, uti & causæ finales, morales, nimirum crimina, propter quæ Deus genus humanum punire consuevit.

## II.

An vero diluvium universale a terræmotu deducendum sit, suspicari quidem velim, sed statuere non ausim; quod Sect. II. magis elucescet.

## III.

Interim prima notitia terræmotuum, quantum noverim, habetur in Bardi Chronologia italice scripta, anno mundi

di 3508, ex quo in Græcia aperta fuit terra.

Sed jam anno mundi 3475. Ætna arfisse fertur, quod sine terræ motu haud factum fuisse reor.

## V.

Item Anno M. 3511. urbis conditæ 296. in Morea ex terræ motu fuerunt aliquot civitates everfæ.

## VI.

Item Anno M. 3519. V. C. 304. Græciam devaftabat terræmotus, cui dein dira fucceffit peftis.

## VII.

Romam concufferat terræmotus Anno M. 3529. & 3532. V. C. 314. & 317.

## VIII.

Atlantem Locrenfium civitatem in infulam convertit terræ motus Anno M. 3543.

## IX.

Terræ motus, qui Anno M. 3630. V. C. 415. Macedoniam invaserat, erat tot fulminibus stipatus, ut totus mundus cremari videretur.

## X.

Notari quoque meretur terræmotus, Anno M. 3726. qui Asiam minorem, præsertim vero insulam Rhodum, atque illum memorabilem ibi situm, & inter memorabilia mundi numerandum Colossus devastabat.

## XI.

Terræmotus, qui post nativitatem D. N. JESU Christi mundum affligebant, est præ aliis ille mirabilis, qui anno 30. adeoque in morte Sacratissimi Redemptoris Judæam concusserat; qui non tantum in sacris litteris, sed & in Scriptoribus profanis, ut Tertulliano, Dionysio Areopagita, & Luciano Martyre notatur.

## XII.

## XII.

Tacitus meminit terribilis terræmotus, qui primo post Christum natum sæculo 13. urbes everterat, urbes vero erant Ephesus, Magnesia, Sardis, Moflene, Magechiro, Cæsarea, Philadelphia, Himulus, Tomis, Cuma, Mirtina, Apollonia, Diahircana.

## XIII.

Anno 526. 9. Maji die Veneris, circa meridiem invasit Syriam tam vehemens terræmotus, ut celebris civitas Antiochia fere penitus corruerit, hunc concomitabatur ignis e visceribus terræ erumpens, & sex dierum spatio reliquum, quod ex ædificiis supererat, plane consumens.

## XIV.

In sexto sæculo, sed diversis temporibus Græciam, præcipue vero Constantinopolim affligebat terræmotus, in quo singularia phænomena observanda erant;

erant ; nam in aliis terræ convulsionibus, lacus, flumina, maria plerumque intumescere, & exundare observantur ; in hoc vero terræmotu contrarium accidit, nam mare a consuetis littoribus ad 2000. passuum se receperat ; ex quo factum fuit, ut indefinitus piscium numerus in terra a mari deserta computruerit, & aëra infecerit, ex quo dein dirissima pestilentia exorta fuit.

## XV.

Bertoldus Episcopus Constantiensis describit terræmotum, qui 1100. & 1117. fere totam pervagabat Europam, a quo multæ urbes diruebantur, multa hominum millia desiderabantur, tandem multi montes, infirmis factis eorum fulcris, exesisque eorum fornicibus, corruisse feruntur

## XVI.

Anno 1348. in Austria, Stiria, aliisque ditionibus, præsertim Austria-  
cis



cis fat diu furebat terræmotus , a quo quamplurimæ civitates , multaque hominum millia ad internecionem convalebantur , his malis fucceffit peftilentia gravis , quæ magnam in his provinciis egerat fragem.

## XVII.

Quammaxime vero memorabiles funt terræmotus Annorum 1523. 1571. 1580. & 1623. Nam his plurima damna , quæ Hispanienfes provinciæ , Belgium , Roma , aliæque adjacentes ditio- nes ferre debebant , in acceptis referunt; Tyberis enim tanta exundatio , vicinarumque terrarum tanta inundatio fuit , cui fimilem annales non memorant. Verum nulli- bi majorem calamitatem , majorem fragem videre fuit , quam in Belgio ; etenim fuperatis & divulfis aggeribus , foffarumque monumentis , tanta fuit illarum provinciarum ex - & inundatio , fere Cata- clyfmo fimilis , ut quam plurima homi-  
num

num & armentorum millia aut aquis, aut fame misere perierint. His calamitatibus successit pestilentia 1580. quæ universam fere Europam pervagabat, & devastabat.

### XVIII.

Notabiliores sunt pariter præ aliis terræmotus, annorum 1692. 1701. 1703. 1706. Sed præcipue anni 1747. Nam primus Siciliam tam ferociter concusserat, ut celebres urbes, Syracusa, & Catanea fere penitus una cum 100000. hominum strage perierint. Secundus vero, tertius & quartus Italiam, Neapolim, Romam præcipue vexabat & infestabat, ædificiis ruinam, quam plurimis autem hominibus necem inferebat.

Ast ultimus, nimirum anni 1747. ideo præ aliis memorabilis & horribilis erat; quod non tantum diversis Europæ regionibus, sed præcipue Americæ nobi-

bilissimis urbibus, Limæ & Callao, Hispaniarum opulentissimis emporiis infestissimus, & perquam exitialis, extiterit; unde damnum ex tot. & tam pretiosis amissis mercibus regi, aliisque mercatoribus illatum ad centum millia millionum piastrorum factum fuisse fertur.

## XIX.

Verum alius, qui non pridem, id est circa finem Octob. & principium Novembris 1759. Syriam aliasque adjacentes provincias invasit, superest referendus terræmotus; ex quo celebris urbs Safet, quondam Betulia, cum multis pagis & magna hominum multitudine ad multas leucas subsidisse fertur; unde etiam aliæ civitates, ut Damus, Balbeg & Tripolis multum damni, & detrimenti sufferre debebant.

## XX.

Nolo decidere, an eadem causa materialis terræ motus, quæ, ut diximus  
Sy-

Syriam devastabat, an alia paulo post ad plagam septentrionalem Europæ conversa, ibidem eandem tragœdiam luserit; etenim eodem anno 1759. intra 21. & 22. Decembris statim post mediam noctem exortus est terræmotus, qui Norwegiam, Daniam, Sueciam, Holstatiam conquassabat; maxima ejusdem vis fuit Gothoburgi ad finem Codanum, Carelstad, Alingsas & in Judland. Hic terræmotus plus terroris, quam damni attulit, directio ejus erat ab occidente ad orientem.

## XXI.

Hunc terræ motum in aliquibus locis præcefferant, in aliis vero concomitabantur diversa phœnomena; sic audiebatur magnus strepitus, murmura, sibillus, item concussio & fragor adinstar explosi tormenti bellici. Præterea cœlum in aliquibus locis videbatur lucidum & flammeum quasi in vicinia aliquod adesset incendium.

Ma-

Mare Norvegicum bulliebat, uti in aliis similibus casibus contingere pariter solet.

## XXII.

Interim in hoc ultronee observandum & annotandum esse judico, quod nimirum uno alterove die ante hunc terræ motum, Vesuvius, qui cum magna lava per aliquot dies furebat, derepente filuerit; cui dein præsens terræmotus supervenit. Dein probabimus diversos Vulcanios, & Euripos per hiatus & canales subterraneos habere inter se communicationem; adeoque iste casus, & prædictæ circumstantiæ nobis offerunt copiam & occasionem, ut possimus, nolim dicere, decidere, sed conjecturare, prædictum impetum Vesuvii retropulsum & ad plagam septentrionalem conversum fuisse.

Iste ipse terræmotus se dein magis ad plagas, meridionalem & occidentalem

exporrigebat ; sic die 19. Januarii 1760. Aquisgranum , die vero 21. ejusdem mensis , repetitis concussionibus infestabat coloniam Agrippinam ; quinimo eodem tempore se extendebat in Galliam, Hispaniam & Portugalliam.

### XXIII.

Isti , quos summarie adduxi , & breviter exposui , terræ motus sunt principes , qui ad hæc usque tempora globum terraqueum concusserunt & afflixerunt. Si horum atque plurimorum aliorum terræ motuum , quorum hic mentio nulla facta est , completam desideras historiam , habes autores tum veteres , cum recentiores quam plurimos, unde tuæ curiositati satisfacere valeas.

### XXIV.

Interim terræmotus , qui Viennam Austriæ metropolim , aliaque contigua , & vicina loca , infestarunt , tacitus præterire non ausim , sed mihi recepto more

re tales quam brevissime attingam, ut Annis 1201. 1265. 1341. 1410. 1485. tremuit Vindobona, sed damnum exinde illatum non notatur, signum est, tales terræmotus fuisse leves. Ast terræmotus 1485. in eo est memoria dignus, quod illo ipso tempore se Viennæ manifestarit, quo Rex Mathias Viennam longa obsidione cingens, eamque ad deditionem cogens, publico & triumphali apparatu Metropolim ingrederetur.

## XXV.

Funestus & memoria dignus est terræmotus anni 1590. qui non tantum Metropolim nostram, sed universam etiam austriam infestabat. Iste prima vice observatus fuit Viennæ 15. Septembris hora quinta vespertina, sat levis, secunda concussio sentiebatur hora tardius sed fortior. Tandem tertia conquassatio, & quidem fortissima fuit hora 12.

noctis ; unde maxima pars ædificiorum fissuras & rimas contraxit , ut necessarium fuerit , fulcris & sustentaculis , ne collaberentur , fulcire. Domus ad solem aureum ( *goldene Sonne* ) dicta plane corruit , & solo æquata , lapidum horribilem præ se ferebat acervum ; sub cuius ruinis omnes inhabitatores aut enecati , aut lethaliter læsi sepulti jacuere. Item turris Ecclesiæ Societatis JESU corruerat ; celebris autem turris Sancti Stephani exinde incurvabatur ; qualis ejusdem apicis curvatura ad hæc usque tempora perseverat.

## XXVI.

Alter vix levior priore 1690. quarta Decembris infestabat Austriam & Vindobonam, ex cuius concussione turris S. Stephani ex præcedente terræ motu aliunde jam labefactata adhuc majus detrimentum contraxit , ut fere lapsui proxima videretur. Quare necessarium fuit , ut  
cele-



celeberrimi Europæ Architecti advocarentur; qui dein magno labore, & magnis sumptibus illam firmarunt, sicque a casu præservarunt.

Aderat alius 1712. 10. Aprilis circa primam pomeridianam, sed levis & vix memorabilis terræ tremor.

## XXVII.

Tandem superest, quamvis extra annalium ordinem, singularis ille, & horribilis terræmotus exponendus, qui 1755. & 1756. orbem terraqueum, potissimum vero Lusitaniam, ejusque Metropolim Ulyssiponem concussit & devastavit, qui per magnam Europæ partem in Africam & Americam se extendit, & ubique locorum, quæ attigerat, funesta & lugubria post se reliquit vestigia.

## XXVIII.

Terræ motus hicce inter alios recentissimus propter stupenda illius phænomena

mena animis nostris tam alta impressit vestigia, ut credam, opus non esse, per longas ambages ejus tristem renovare memoriam, præsertim cum tot, & tam diversis linguis exaratae, & minutim exponentes ejusdem historiam, prostant, & cui libet jam notæ sint relationes; unicum doleo, quod necdum copiam habuerim videndi latinam de hoc terræmotu historiam.

Unde hæc potissimum est ratio, quæ me movit, ut in descriptione hujus aliquantum prolixior videar.

### XXIX.

Antequam vero ejusdem historiam referam, congruum esse judico, præmittere illa, quæ communiter magnos terræmotus præcedere, aut concomitari solent; sicque signa illa palam facere, quæ nostrum pariter præcedebant terræmotum, quæ cum illo conjungebantur.

Magnos terræmotus præcedere & plerumque concomitari solent quædam signa, quæ in aquis, aëre, animalibus, quin imo in sole & luna observantur; sic aquæ alias lympidissimæ & insipidæ, fiunt turbidæ, ingratae & sulphur redolentes. Observatur stridor gallinarum, anserum, nimia avium in caveis pervolitatio, fremitus equorum aliorumque quadrupedum conatus ad solvenda ligamina, columbarum diutinus per aëra volatus, quasi non fiderent alicubi conquiescere, quidam, ut Plinius, meminere cujusdam trabis cœlestis, quam oblonga nubes repræsentare videtur.

## XXX.

Ast præ omnibus jam nominatis phœnomenis debet considerari motus mercurii in Barometro, ut singulare phœnomenon; nam solet mox ante, & tempore terræmotus sat profundum situm occupare; hoc ipsum contigit in terræ mo-

tu 1755. & quidem non tantum in illis locis, ubi sensibilis erat, sed & alibi, ut hic Viennæ, ubi nulla ejusdem aderant vestigia: sic in meo perpendiculari Barometro tam profunde situs erat, ut rarissime hoc in situ illum observaverim; in alio vero Barometro, quod constat ex uno brachio perpendiculari, & altero horizontali in 80. gradus diviso contigit, ut brachium horizontale plane deseruisset, & se ad perpendicularare recepisset Mercurius.

Ex quo inferre possumus, quod tempore terræmotus terra in certis locis non ita prematur; ex quo ut dein patebit, multa deduci possunt.

### XXXI.

Terribilis iste terræmotus initium sumfit 1755. prima Novembris mane paululum ante decimam matutinam; ejus concussio fuit maxima Ulyssipone, quæ eodem, quantum nobis notum est tempore se extendebat per Lusitaniam, Hispaniam, Italiam, Galliam potissimum

ma-

maritimam ejus partem. Item per Angliam, Daniam, Sueciam & magnam partem Germaniæ; tandem in Africam & Americam præcipue Septentrionalem penetravit. Quousque vero Oceanum pervagatus sit iste tam violentus motus, non constat. In annalibus ab initio mundi ad hæc usque tempora non refertur terræ motus, qui huic æquiparari possit, præcipue si illius extensio per Europam, Africam & Americam consideretur. Hæc generaliter tantum allata & relata adduxi; qua ratione vero & quanto furore, diversas concusserit provincias, item quoties repetierit, & quamdiu duraverit, brevissime referam.

## XXXII.

Terræ motus, qui Ulyssiponem conquassabat, ædificiis tam funestus erat, ut magna eorum pars humi jacta, soloque æquata tristem lapidum acervum oculis offerret; alia vero eorum pars

concussionibus attrita rimas & fissuras tot contraxerat, ut ulteriori oneri ferendo, ni extemplo fulciretur, impar extiterit; unde proh dolor! factum est, ut tot hominum millia sub his ruinis sepulta jacuerint. Maris Tagique tanta fuit intumescencia & exundatio, ut ædificia, aliaque opulentissima mercium promptuaria pessumiverint. Quod vero adhuc supererat, orto incendio in cineres redigebatur; ex quo tam funesto eventu commerciis & mercationibus, præcipue Anglico opulentissimo emporio inæstimabile & irreparabile damnum allatum erat.

### XXXIII.

Eadem sævitia, qua Ulyssiponem affligebat, terræ motus, furebat pariter in aliis Lusitaniæ urbibus, pagis, portibus, & fluminibus; eadem fere fuit ædificiorum conquassatio, attritio & ruina; hominum, armentorum strages; maris,

ris, fluviorumque violentus motus, & exundatio. Urbes, quibus multum damni allatum fuit, sunt, præter Ulyssiponem: Setubalia in Extremadura, cujus vix adhuc superesse aliqua vestigia dicuntur, Irenopolis, Oportus Villa regalis, Conimbria, & aliæ plures. Præterea montes: Estrella, Arabido, Maruan, & mons Junius tanta conquassabantur violentia, ut aliqui eorum in diversas separarentur, & desilirent portiones; alii vero eorum plane subderent.

## XXXIV.

Eadem tragoedia ludebatur in diversis Hispaniarum provinciis, ut Mantuæ Carpetanorum, seu Madriti; ad fretum Herculeum seu Gaditanum, ad portum Gaditanum, item Hispali, Mallacæ, Coronii, & alibi, ut Compostellæ, in regno Galliciae, ubi terræ motum comitabatur magnus strepitus & fragor. Præterea

terea mirabiles erant in prædictis locis æstus maris; nam intra horam sexies, in aliquibus locis etiam septies ad sex, & ultro pedes aquæ intumescabant & detumescabant, spumabant, & vortices formabant, ex quo dein non tantum ædificia, civitatum munimenta & viventia ipsa multum damni perpetiebantur.

## XXXV.

In Gallia, præsertim ad oras maritimas fuit eadem clades & eadem strages, ut in aliis regionibus, de quibus jam diximus. Sed maximum damnum afferebat exundatio, uti aliorum fluminum, sed præ aliis, Rhodani, hujus enim in toto suo tractu diebus 29. & 30. Novemb. 1755, tanta fuit exuberantia, ut duodecim pedes superaret illam intumescentiam, quæ 1743. adjacentes terras devastabat. Ex quo quisque cognoscere poterit, mala, quæ omnes Rhodanum lambentes & adjacentes experiebantur provin-



vinciæ. Parisiis vero 30. Aprilis 1756. hora nona vespertina sentiebatur terræ-motus, qui plus terroris, quam damni attulit. In Piccardia autem erant fortiores concussiones, & cum strepitu subterraneo conjunctæ. Non procul hinc exorta fuisse scaturigo fertur, ex qua aqua magno impetu, & quasi bulliret, scaturiebat.

## XXXVI.

Eadem hujus terræ motus incommoda & damna persensit multis in locis Italia; etenim tam concussiones, quam exundationes se manifestarunt Mediolani, Bononiæ, Augustæ Taurinorum, Venetiis & alibi, sed favente numine sine notabili damno.

In Anglia præstat meminisse motum maris, quam terræmotus, qui hic loci vix sensibilis fuit.

## XXXVII.

## XXXVII.

Ast majore sunt memoria digna, illa, quæ multæ Germaniæ provinciæ ex hoc terræ motu perpessæ sunt damna, sic non tantum Belgium, Helvetiam, sed fere omnes provincias, quæ ad circulos, Rhenanum superiorem & inferiorem, Westphalicum, Suevicum & Saxonicum spectant, occupabat; aliquibus plus, aliis minus damni afferebat; quin imo & diversis temporibus concutiebatur; nam terræ motus, qui 9. Decembris 1755. item 26. & 27. Januarii, item 18. Februarii 1756. furebat, se extendebat per Belgium, Helvetiam & circulos Rhenanos.

## XXXVIII.

Isti terræ motus non erant funesti tam suis concussionibus, quam exundationibus, quales non tantum in diversis fluminibus, sed præcipue in mari germanico & Baltico, item in multis lacu-

cu-

cubus , præfertim Helveticis observabantur ; nam lacus Bodanicus , Prigantinus , Constantiensis , Bodamicus , Cellerensis , Laufanensis , & alii mirum in modum exundabant , vicinasque regiones cum magno damno inundabant ; hæc facta sunt prima Novembris 1755. item 9. Decembris ejusdem anni ; aquæ enim lacuum æstuabant , quasi bullirent.

Idem observatum fuit in diversis Germaniæ fontibus medicatis , ut Spadano , in thermis Carolinis , sed præcipue Tœplicensibus , quarum scaturigo repente evanescere , mox dein majore impetu , majore quantitate , & majore calore profluere videbatur ; in quo casu aqua alias limpidissima , turbida , & flavo fusco colore tincta , propter majorem ocræ quantitatem apparebat , quæ dein successive clarescebat , & ad pristinum caloris gradum , si non majorem reducebatur.

## XXXIX.

Sicco pede præterire non possum, effectus hujus horribilis terræmotus, qui in diffitis regionibus Africæ, & Americæ observabantur. Refertur enim, quod admiratione dignum, idem terræ motus eodem tempore, & fere eadem, si non majore violentia in Africa & America sæviisse.

Etenim in Africa, ut Tanger, Ceuta, Tetuani, & in regno Maroccano tanta fuit vis concussionum, ut non tantum multa ædificia, sed magnæ & nobiles urbes multum damni perpessæ fuerint. Exundationes maris vero dicuntur fuisse alias invisæ; nam ad 40. & 50. pedes intumuisse fertur. Multæ scaturigines mox siccabantur; sed mox & majore impetu reviviscebant. In America vero & præ aliis locis sensibilis erat in Barbados & Boston, ubi tantus fuisse fluxus & refluxus dicitur, ut intra aliquot horas  
idem

idem repetierit. Hæc de horribili terræmotu annorum 1755. & 1756. fere generice dicta fufficiant, si vero quis harum concussionum diarium exigat, talem remitto ad eruditissimos viros D. D. Krüger, Wagner, Bergholz, aliosque, qui data opera & magno labore distinctam & completam non tantum de terræmotu anni 1755. sed & de aliis, qui ab initio mundi ad hæc usque tempora globum terraqueum concusserant, scripserunt historiam.

Hunc memorabilem terræmotum sequebatur alius longe minoris quidem momenti, verum tamen, quia Metropolim Viennam concusserat, non prætereundus.

Hic terræmotus ingruerat die 13. Augusti, 1760. sub vesperum, tertio quadrante ad septimam, in aliquibus locis magis, in aliis minus sensibilis. Hunc terræmotum præcesserat tempestas variabilis, statio Mercurii in Barometro pa-

riter variabilis. Die sequente seu 14. Augusti mox post meridiem sequebantur pluviae copiosissimae, noctu vero coelum valde rubebat occidentem versus.

Anno 1761. 31. Martii circa meridiem conquassaverat terræmotus oras præcipue maritimas Hispaniæ, Galliæ & Lusitaniæ, quinimo in Angliam usque sese extenderat. Verum nullibi plus damni ædificiis navibusque, quam Ulyssipone attulit.

---

## SECTION II.

*De terræmotu in genere ejusque  
causis.*

**O**mnis labor eorum, qui de terræmotu scribere conantur, debet præcipue in eo consistere, ut causas physicas

ficas adæquatas ejusdem adstruant, unde facile, omnia illius horrenda phænomena explicari & exponi possint; sed hic labor, hoc opus est, in quo plurimi defudarunt, sed perpauci id affecuti esse videntur. Nam multi eorum accusant quidem partes sulphureas, bituminosas, verum non exponunt, quomodo & quare istæ accendantur & in actum deducantur, ad hoc, ut tam horribiles globi terraquei convulsiones exinde deduci possint.

## XL.

Alii vero partes nitrosas, &, nescio, quos pulveres pyreos in cavernis subterraneis delitescentes sibi imaginantur; sed tales videntur veram naturam & originem nitri ignorare; nam verum nitrum artis fere semper est opus, constat enim ex duplici principio, nimirum sale illo universali acido, alias primigenio & catholico dicto, quod in aëre ho-

spitatur, & ventus in ventre suo portat, & ex principio terreo, alcalino, sulphureo, quod matricem & basim constituit, & prædictum acidum, tanquam magnes in se trahit & imbibit.

Unde constat, ad naturam nitri non sufficere acidum catholicum, & terram alcalinam, ut opinatur Clariss. Krüger in phycis operibus Tom. 1. pag. 294. sed requiri sal alcali fixum, quod est artis, non naturæ productum.

### XLI.

Quare patet, quod illud nitrum, quod in muris antiquis, aut alibi forte invenitur, non pro naturali, sed potius artificiali habendum sit, quia illud sal alcali fixum calcis vivæ, aut cinerum clavellatorum, quo tale nitrum constat, non pro opere naturæ, sed artis habendum est.

### XLII.



## XLII.

Item patet, quod illud fal, quod ex certis aquis nitrosis per elixiviationem separatur, verum nitrum dici non possit, quia neque in chrystallos coit, neque flammam concipit.

Falluntur igitur illi, qui in cavernis subterraneis verum nitrum reperiri autumant, sicque una cum partibus sulphureis accensionem fieri, & terræmotum exinde exurgere asserunt; nam deinde ostendemus, ad accensionem materiæ sulphuræ non necessarium esse nitrum, quemadmodum talis accensio per modum fulguris in nostra atmosphæra fit absque omni nitro. Igitur, qui talia terræmotus principia admittunt, falso supposito laborant.

Antequam vero adæquatas terræmotus causas constituamus, necessarium erit, ut talia, sine quibus ille nec concipi, nec intelligi potest, præmittamus.

## XLIII.

Primo præsupponi debet, quod, quemadmodum dantur multæ cryptæ & cavitates subterraneæ, quæ aperto ore ad superficiem terræ se manifestant, (quales legi possunt apud Varenium & Kircherum) ita pariter admitti debeant aliæ cavitates subterraneæ sat profundæ, & sat amplæ, quæ raro hiant ore ad superficiem terræ nobis notæ sunt; quarum aliquæ magis superficiales, aliæ vero valde profundæ, & quæ maximam partem per certos canales inter se communicant; quia, nisi hoc admittatur, concipi non potest, quomodo 1631, incendium Vesubii communicatum fuerit Semo Æthiopum monti; uti habet inter alios Gassendus in vita Peireschii.

## XLIV.

Sed nihil magis tales subterraneas cavitates, earumque inter se per diversos canales communicationes evincit, quam  
illa

illa phœnomena, quæ in memorabili terræmotu 1755. prima Novembris observabantur; etenim, ut omnibus constat, eodem tempore in diversis Africæ, Americæ & Europæ regionibus observabatur terræmotus; in aliis vero, ut in littoribus maris præcipue Balthici; in Bohemia circa thermas Carolinas, Teplincenses observabantur diversi superius jam recensiti ejus effectus. Verum hæc nec intelligi, nec concipi possunt absque prædictis meatibus subterraneis in longum extensis & inter se communicantibus. Plura de cavitatibus subterraneis legi possunt apud Erud. Künium.

Quare exinde constat, quod quamvis a priori prædictas cavitates demonstrare non possimus, eo quod profundius uno milliari penetrare non liceat; a posteriori tamen, & ex effectibus evidenter tales dari evincantur.

## XLV.

Secundo, quod præsuppositis talibus subterraneis cavitatibus debeant admitti diversa subterranea receptacula, quorum alia hydrophylacia, alia aëreophylacia, & alia pyrophylacia dici debeant; quod, ut clarius pateat, singula seorsim exponere oportet. Woodbardus quidem in sua geographia physica in visceribus terræ admittit magnam quandam aquarum abyssum, per diversos canales cum mari, fluminibus, lacubus, & fontibus communicantem. Quamvis ex hoc systemate multa phænomena naturæ egregie explicari possint, tamen particularis quidam alicujus regionis terræmotus vix exponi posset, quia, cum causa terræmotus in illa abyssu latere dicatur, deberet semper se per totam extendere abyssum, adeoque semper ad minimum medietatem globi terraquei tali convulsione afficere. Superfunt multa alia argumenta, quibus  
Do-

Doctissim. Camerarius hoc systema Woodbardi infirmare conatur, quibus locus hic non est.

### XLVI.

Si tamen plures tales subterraneas plus minus profundas, & per diversos canales inter se communicantes cavitates magnam abyssum vocare lubet, non laborabimus, ut assentiamur.

Unde spero, fore, ut quisque facile & libenter nobis concedat, quod aliquæ prædictarum cavitatum sint aut plenæ, aut semiplenæ aqua, quæ hydrophylacia dici possunt, in aliis vero adsit aër, quæ aëreophylacia audiunt; neque credo, aliquem esse, qui in hoc nobis difficultatem aliquam moveat, quorum existentia dein ex diversis phœnomenis clarius patebit.

### XLVII.

Verum major posset esse difficultas de pyrophylaciis, ast nos hic per pyro-

phylacia non intelligimus ignes quosdam centrales, ut aliqui autumant, sed calorem quendam subterraneum, qui in uno loco major, quam in altero observatur, in quantum causa ejusdem materialis, de qua postea erit sermo, majore quantitate in uno, quam in altero loco aggesta est.

### XLVIII.

Multæ afferri solent rationes, quæ sententiam de ignibus centralibus infirmant, nos in sequentibus acquiescimus: nimirum, quia sequeretur, quod talis calor seu ignis deberet æqualiter per terram esse diffusus, cum ab eodem dependeret fonte, quod, ut mox diximus, est contra experientiam. Item sequeretur, quod, quo profundius & propius ad terræ centrum tenderemus, eo major deberet sentiri calor; quod pariter est contrarium observationibus & experimentis, a Clariss. Marsilii tum in mari, cum  
in

in profundis fodinis captis, quæ apud eundem per extensum legi possunt.

Obvium autem argumentum, quo ignes centrales extinguuntur, defumi potest ex diversis fontibus medicatis, quorum aliqui calidi, alii frigidi observantur, quod ab ignibus centralibus certe derivari non potest.

Quapropter quæri potest, si calor subterraneus ab igne centrali non dependet, qualis igitur illius causa assignari debeat? nam dici non potest, dependere a calore solis, quia calor solis ultra 12. pedes non penetrat, igitur ad aliam causam confugere debemus, quæ, ut clarius pateat, sequentia bene observanda sunt.

#### XLIX.

Ex relationibus fossorum constat, in locis subterraneis fere ubique, in aliquibus tamen plus, in aliis minus de materia

ria sulphurea, bituminosa, martiali, sub pyritarum forma reperiri.

## L.

Item certis observationibus constat, si terræ pyrite divites aëri expositæ madesiant, quod statim incipiant calere, æstuarè, & latissime tam effluvia, quam odorem sulphureum spargere; quinimo si hoc in cubiculo, aliove loco clauso quis experiri velit, tunc tale cubile impletur tam magna effluviorum & halituum copia, ut, si candela accensa quis intrare vellet, mox accendantur halitus, & odor sulphureus se adhuc magis manifestet.

## LI.

Ex his observationibus multa, quæ ad nostrum scopum pertinent, inferre & eruere possumus; ut primo, quod calorem subterraneum magno cum fundamento a prædicta materia sulphurea, martiali humectata derivare possimus, quæ prout  
in



in aliquo loco majore aut minore quantitate reperitur, major quoque, aut minor calor ibidem percipiatur. Ex quo pariter ratio patet, quare fodinarum fossiores in aliquibus fodinis suffocativum sentiant calorem. Item quare aliquæ aquæ minerales calidæ, aliæ vero minus calidæ profluant; etenim dum tales aquæ prædicta loca calore prædita præterlabuntur, debent necessario, non tantum eodem affici calore, verum etiam materia illa sulphurea martiali, & vaporoso illo principio, alias spiritu minerali dicto, imbui & saturari. Spiritus enim mineralis ex nostra opinione nihil aliud est, quam prædicta illa materia volatilis, quæ sub forma vaporum halituum, seu effluviorum a prædictis corporibus pyriticis fervescentibus elevatur. Iste spiritus non videtur semper, & ubique ejusdem esse naturæ, sed differt prout diversa combinantur

tur mineralia, quæ una cum pyrite calent, & fervent. Unde videmus aliquas minerales, ut Aquisgranenses, in Austria thermas Badenses, plus de materia sulphurea, alias vero, ut aquas Pyrmon-tanas, Spadanas plus de martiali participare. Verum manum de tabula, nam hæc potius scopum medicum, quam nostrum attingunt.

## LII.

Interim hoc hic præterire non possumus, de quo etiam dein fiet mentio, quod sæpe tales vapores, seu halitus calidi ex visceribus ad superficiem terræ penetrent, sicque in illo terrætractu aëra tepidum reddant, quod sæpe adulta jam hieme & in regionibus frigidissimis contingere observamus; ut ex tali tepore derepente & glacies & nives solvantur, sed tale phænomenon non aliunde, quam ex prædictis vaporibus ex visceribus terræ exhalantibus derivari potest; quia qui-  
libet

libet observare potest , quod & nix & glacies in illa parte, quæ terræ est magis vicina & contigua, solvi , & regelare incipiat prius, quam alia , quæ est magis remota. Item experientia ostendit, quod prædictus tepor supervenire soleat absque omni vento sive australi, aut alio, & quod determinatum tractum terræ occupet , ita ut circum circa & gelu, & pristinum frigus teneat, & perseveret; adeoque signum est , quod caussa prædicti teporis a nulla plaga derivari possit , secus enim deberet dici , quod a plaga v. g. meridionali usque ad prædictum tractum terræ , regelare omnia deberent ; itaque signum est evidentissimum , quod talis tepor ex visceribus terræ suam habeat originem.

### LIII.

Unde necessarium esse , quisque intelliget , ut prædictæ exhalationes subterraneæ intime trutinentur , præcipue in  
quan-

quantum ad faciliorem terræmotus explanationem inferviunt ; nam ex jam dictis pro certo statuere possumus , in prædictis cavitatibus subterraneis duplicem dari materiam sulphuream , nimirum una est fixa , crassa , & bituminosa , quæ sub forma pyritarum cum majore aut minore quantitate ferri est conjuncta ; alia vero est materia sulphurea volatilis & valde mobilis , & facile inflammabilis , quæ suis carceribus tam facile coerceri non potest , sed a minima causa nunc ad unam , nunc ad aliam partem dirigitur.

## LIV.

De prima materia sulphurea , crassa , aut si mavis dicere pyritica , nullus dubitabit , spero , quia alias quotidianis observationibus contradicere deberet , adeoque tota difficultas posset esse de materia sulphurea volatili , quæ etiam sæpe cum exhalationibus mercurialibus aut arsenicalibus conjungitur , uti in fodinis  
mer-

mercurialibus Hydriæ. Verum si consideremus, quæ superius diximus de materia sulphurea pyritica fervescente, facile intelligi poterit illa materia sulphurea volatilis; diximus autem, quod dum prædicta materia pyritica fervet, emittat diversos & copiosos vapores sulphureos volatiles, qui nihil aliud sunt, quam illa materia sulphurea volatilis & facile inflammabilis, de qua hic erat quæstio.

## LV.

Sed nihil magis evincit prædictam materiam volatilem, quam fons ille in Lancastræ, qui admota candela ignem concipit, tale quid est etiam apud Allobrogos, aliquot milliarium distantia ab urbe Gratianopoli.

## LVI.

Nostrum assertum adhuc magis confirmatur, ex illis observationibus, quas Eruditissimus Ramazzini de petroleo montis Zibinii assert hoc modo: *In sum-*

mitate collis parva planities sedet, in cujus medio hiatus visitur crateris forma - - unde materia quædam bituminosa continuo sursum protruditur, ac ad modum pultis ebullit; interdum vero, impendentibus præcipue magnis temporum mutationibus: ex illo hiatus ingentes flammæ erumpunt una cum saxorum, & cretaceæ materiæ projectione, tanto quidem fragore, ut in ipsa civitate interdum, noctu præsertim strepitus non secus ac æneorum tormentorum exaudiatur. Idem fere observatur in furentibus Vesuvio, Æthna, aliisque montibus ignivomis; ex quibus omnibus non tantum materia sulphurea, bituminosa, crassa, & volatilis, sed etiam ipsa materialis causa terræmotuum utcunque elucescit.

Ut vero causa adæquata omnium terræmotuum eo clarius pateat, oportet ad ea, quæ superius diximus, reflectere; diximus autem in cavitatibus subterraneis esse non tantum materiam sulphuream,

py-

pyriticam, sed & aëra & aquam; adeoque inquirere debemus, quomodo hæc pro causa terræmotuum statui possint.

## LVII.

Ex observatione & calculo Marioti in tractatu de aëre constat, quod aër in statu naturali consideratus se habeat ad rarefactum ut 1. ad 4000. Quinimo aër, qui in aqua continetur, potest ita rarefieri, ut sit tanquam 1. ad 46656000000. Vide Muschenbroeck tentam. experiment. Acad. del Cimento.

## LVIII.

Quamvis jam ex his pateat, vim aëris rarefacti esse stupendam; tamen ex aliis observationibus scire oportet, istam adhuc magis & in immensum augeri; si una partes sulphureæ bituminosæ rarefiant. Ut alia observata omittamus, considerare oportet tantum illa, quæ Clariss. Fried. Hoffmann. in suis observationibus physico-chymicis edition. Hall.

pag. 308. adducit, quæ sane ad illustranda illa, quæ terræmotum concernunt, plurimum faciunt. Nam videbit, quantos strepitus, quantas ruinas materia sulphurea rarefacta excitare possit.

## LIX.

Huc referri possunt illa, quæ mox antea LVI. de petroleo montis Zibinii diximus. Qui itaque vim tam aëris, quam partium sulphurearum rarefactarum penetraverit, facile concipiet illa, quæ in terræmotu Siciliæ in Majo Anno 1537. ejusd. 12. observata sunt; mons enim Æthna incendio ita furebat, ut cineres & favillæ usque ad Melitæ portum ejicerentur, qui portus 40. miliaribus a litore Siciliæ distat; ad alias vero maris partes ejiciebantur ad 200. leucas, ita, ut naves, quæ Venetias dirigeabant iter, damnum exinde passæ fuerint. Ita Varen. in Geographia generali. Item anno 1631. tantus fuit furor



ror Vesuvii in Campania ut cineres Constantinopolim usque projecti fuerint. Ita Julius Cæsar. Braccini l' incendio del Vesuvio. LX.

Ex his itaque adhuc magis elucescit stupenda vis aëris, & partium sulphurearum, dum hæc rarefiunt, & inflammantur; unde pariter facile terræmotus ejusque phænomena intelligi possunt, igitur supereft tantum, ut ostendamus, quæ sit illa causa, quæ tam partes aëreas, quam sulphureas rarefaciat & inflammet; nam quamdiu in cavitatibus subterraneis aër est in æquilibrio, & quam diu partes sulphuræ non accenduntur prædicta stupenda rarefactio concipi non potest, neque terra quidquam exinde metuendum habet.

## LXI.

Communis fert physicorum opinio montes ignivomos esse spiracula caloris, seu ignis subterranei. Item constans fuit

usque ad hæc tempora observatio, dum montes flammivomi silent, observari ut plurimum magnos terræmotus, secus dum ardent. Vide Buff. p. I. theorie de la terre, aliosque. Nam signum est prædictos vapores & halitus sulphureos in magnis illis cavitatibus subterraneis colligi & congregari, unde duplici ex causa, nostra opinione, potest contingere, materiæ sulphuræ accensio.

## LXII.

Primus modus, quo isti vapores volatiles sulphurei accendi possunt, est dum illi copiosius in unam cavernarum irruunt, tollunt æquilibrium aëris in tali caverna contenti; unde fit ejusdem motus major semper & major, ex quo pariter contingit partium sulphurearum semper major & major motus, & attritus, ex tali aucto attritu partes sulphuræ facile flammam concipere possunt.

## LXIII.

## LXIII.

Verumne hoc assertum alicui paradoxum videatur ad principia physica confugiat oportet, ibi enim docetur & ostenditur, quod ab attritu non tantum calor, sed etiam flamma facile excitari possit. Ut vero ad nostrum scopum similior videatur paritas; dic quæso; unde in nostra atmosphæra fiunt fulgura? Certe omnes saniores physici asserunt, talia dependere ab halitibus & vaporibus sulphureis collectis, motis, & attritis; igitur ex eodem fundamento admittere debemus tales vapores sulphureos, intra cavitates subterraneas collectos; motos & attritos accendi & inflammari.

## LXIV.

Iste est unus modus, quo halitus illi sulphurei inflammari possunt; alter vero & forsitan frequentior modus consistit in eo; si nimirum in prædictis cavernis contineatur magna quantitas materiæ sul-

phureæ inflammabilis, five talis ibidem fit sub specie halituum, five sub specie materiæ crassioris sulphureæ martialis, seu pyriticæ; etsi in hoc casu hæc materia sulphurea & martialis, a superveniente, & in talem cavernam irruente principio aqueo humectetur, quod vel a superiore, aut laterali hydrophylacio fieri potest, tunc mox incipit tepere, rarefieri & fervere, dein semper magis & magis incallescere; dum hoc fit, tunc aer contiguus pariter rarefit, hinc tollitur ejusdem æquilibrium cum alio magis remoto, unde excitatur ejus impetuosus motus seu ventus, uti patet in incendiis, quæ semper ventus comitari solet, quo motu aeris ad instar flabelli aut ingentis follis prædicta massa adhuc magis effervesceat & incalescit, ac tandem inflammatur. Accedit hic bene notandum, quod calor aquæ non nisi ad gradum 212. ascendere possit; calor vero mate-

te-

teriæ oleosæ & sulphuræ gradum circiter 600. recipere valeat; ex quo quisque sibi imaginari poterit, quantus strepitus, quanta lucta oriatur, dum talia ad invicem miscentur.

## LXV.

Iste est alter modus, quo ostenditur, uti dein probabitur materia sulphurea inflammari posse.

Dum itaque prædicta materia sulphurea & martialis in apertam flammam erumpit, summa fit rarefactio non tantum illius materiæ sulphuræ sed etiam aëris intra cavernam conclusi, exinde latera cavitatis seu parietes talis cavernæ ita premuntur, & distenduntur, ut illa pars, quæ minus resistit, necessario cedere & diffringi debeat, quod aut sursum, aut deorsum, aut ad latera ad alias cavernas adjacentes fieri potest XLIV. Si vero talis caverna, in qua accensio fit, per certos & angustos meatus cum aliis vicinis ca-

vernīs communicet, siue dein isti canales sint patuli, siue obstructi, tunc contingere debet, ut prædicta materia inflammata & rarefacta magna vi & violentia per prædictos anfractuōsos canales ad alias vicinas cavernas, qua data porta ruat; unde tota vis ad instar tormentorum bellicorum summo cum fragore in talem cavitatem derivatur, etsi ibidem adsint prædictæ causæ materiales LVI. recensitæ, fit ibidem eadem accensio, rarefactio, & reliqua, uti jam dictum est §. 59. & 60.

## LXVI.

Quinimo cum prædicta materia sulphurea in subterraneis cavitatibus accenditur, possunt fieri fulgura tonitrua & fulmina; unde terræmotus magis horrendus, & funestus contingit; quæ omnia mox magis in aprico esse videbuntur.

Istam igitur tanquam veram omnium ingentium terræmotuum, sed præcipue illius, qui 1755. 1. Novembris globum terra-

terraqueum infestabat , causam constitui-  
mus. Dixi ingentium tantum terræmo-  
tuum , quia leviozem , uti dein patebit ,  
aliam quoque posse esse causam determina-  
bimus. LXVII.

Ne vero prædicta perperam asserta  
videantur , singula per partes probabi-  
mus ; & quidem primo , quod prædicta  
materia sulphurea & martialis in cavitati-  
bus subterraneis per admixtionem humo-  
ris aquei calefiat , rarefiat , ac tandem  
flammam concipiat ; hoc quidem jam  
constaret ex antecedentibus L. ubi di-  
ximus , & ostendimus , calorem sub-  
terraneum dependere a materia pyritica  
feu sulphurea , & martiali humectata.  
Verum , ut clarius hoc pateat , esto ex-  
perimentum nunc temporis physicis no-  
tum : Accipe , quantum placet v. g. ad  
unum vel plures centenarios limaturæ  
martis & sulphuris , hæc madefiant &  
subigantur in massam ; dein effodiatur in  
ter-

terra sat profunda cavitas, huic cavitati imponatur prædicta massa, quæ terra aggesta tegatur. Hæc massa brevi incipiet tepere, calere, fumare, rarefieri terram aggestam elevare, & tandem intra 7. aut 8. horas cum notabili in vicina terræmotu, & eructatione flammæ carceres disrumpere, flamma diutius perseverante, & ignivomum montem referente.

## LXVIII.

Item experientia constat, quæcunque viridia in cumulum congesta & pressa, item fœnum in cumulum congestum & madefactum fumare, calere & tandem in flammam erumpere: Ex quibus itaque patet, partes sulphureas ab aqueo principio non tantum incallescere, sed etiam in apertam flammam degenerare.

## LXIX.

Scio quidem, multos Viros eruditos dubitare, quinimo negare, in locis sub-



subterraneis unde quaque occlusis flammam subsistere posse. Verum, si meminimus eorum, quæ superius LXVI. diximus, facile de veritate hujus asserti convinci poterit quisque, nam in nostra atmosphæra pariter ab agitatione & ventilatione aëris flamma, & conservatur & augetur. Item experientia constat, quod in profundissimis fodinis, candelæ accensæ conservari possint, si aër per folles, aut per delapsum aquarum ventiletur; igitur ex eodem fundamento admitti debet, quod in cavitatibus subterraneis flamma conservari possit, quamdiu aër in iisdem uti superius dictum est, moveatur & agitur. Hoc quidem admitti potest, quod, dum talis aër ad quietem & ad æquilibrium reducitur, flamma extinguatur, quæ vero si prædictæ LXIV. causæ recurrant, iterato reaccendi poterit.

## LXX.

Alterum vero, quod fulgura, tonitrua & fulmina concernit, juxta nostra principia non videtur pariter majoribus difficultatibus obnoxium; nam ex LII. patet, dein que evidentius patebit, quod omne ætherogeneum, quod nostræ atmosphæræ communicatur, prius jam extiterit in visceribus terræ; & quod illud exhalando, & evaporando cum aëre nostro misceatur. Itaque omnia illa principia, ex quibus in nostra atmosphæra fulgura, tonitrua & fulmina generantur, jam præextiterunt in visceribus terræ. Si igitur in visceribus seu cavernis terræ ita moveantur, combinentur & ad invicem atterantur, uti fit in nostrâ atmosphæra, poterunt pariter exinde fulgura, tonitrua & fulmina produci, uti hoc fieri videmus in atmosphæra.

## LXXI.

## LXXI.

Hoc adhuc clarius demonstratur ex observationibus in montibus ignivomis captis ; antequam enim talis mons incipiat flammam vomere, sentitur ab accolis in locis subterraneis mugitus, sibillus, murmura, tandem horrendi fragores, ac si multa tormenta bellica exploderentur ; qui non cessant, nisi dum flamma libere evomitur, quod signum est, omnes illos meatus & cavitates jam esse pervias.

## LXXII.

Accedit, quod sæpe post ingentes terræmotus, siue alicubi terra dehiscat, siue non ; & quidem in hieme in nostra atmosphæra excitentur fulgura, tonitrua & fulmina ; hoc ipsum prohi dolor ! in terræmotu, qui 1755. diversas tenebat & affligebat provincias, sæpe observatum est. Sic in illo terræmotu, qui 17. 21. 22. & 27. Decembris anno 1755. Compostellæ sentiebatur, sub terra audie-

bantur horrendi fragores, ac si multa tormenta ænea exploderentur.

## LXXIII.

Idem in aliis terræmotibus sæpe observatum & annotatum fuit; sic refert Bardinella Chronologia, quod anno M. 3630. V. C. 415. Macedoniam tam horribilis affligerit terræmotus, quem infinita fulgura, tonitrua, fulmina comitabantur & sequebantur, ut videretur totus mundus disrumpi & cremari, quod sane non aliunde factum est, quam quod tales vapores sulphurei, & ignei magna copia & violentia ex visceribus terræ excussi, & expulsi fuerint; igitur ex iisdem vaporibus sulphureis in cavitatibus subterraneis contentis, motis & attritis pariter talia produci poterunt. Scio quidem, Clariss. Friedr. Hoffmannum in suis observationibus physico-chymicis, ubi agit de sulphure, non admittere, ex talibus exhalationibus, & evaporationibus

bus fulphureis generari fulgura, tonitrua, & fulmina; quia, ut ibidem asserit, partes sulphureæ nimium fixæ sunt, quam ut ex visceribus terræ evaporare, & exhalare possint; quapropter Clariss. ille vir substituit alias sulphureas, volatiles, nimirum vegetabilium exhalationes, ex quibus talia fieri asserit.

## LXXIV.

Verum quamvis non eamus inficias, exhalationes pariter vegetabilium constituere saltem concaussam materialem fulgurum. Hoc tamen nostram non infringit sententiam, quia illæ ipsæ vegetabilium exhalationes jam prius in visceribus terræ continebantur, & a vegetabilibus hauriebantur.

Alterum vero, ubi Clariss. autor asserit, partes sulphureas in visceribus terræ nimium fixas esse, quam ut in auras exhalare possint, ex nostra sententia difficultatem non habet; quia jam supe-

rius §. 50. diximus pyrites humectatos exhalare sulphureum odorem. Item diximus, dari diversos in terra hiatus, materiam sulphuream exhalantes, quibus si candela accensa applicetur, mox accenditur. Præterea observatio omnibus nota est; in locis, ubi materia sulphurea exuberat, plurima fulgura, tonitrua, fulmina generari. Verum nihil clarius ad sensus, quam quod in terris sulphureis odor sulphureus fortiter nares feriat; qui certe non nisi a particulis sulphureis volatilibus & e terra exhalantibus dependet. LXXV.

Usque nunc allatæ sunt causæ, quæ quoscunque vehementes terræmotus comitari solent; nunc superest, ut causas antecedentes, prædisponentes, seu occasionales terræmotus, qui 1755. diversas occupabat provincias, determinemus; verum hic labor, hoc opus, in quo quælibet ætas, quod labore, inveniet;

niet ; nam exponere causas tum prædisponentes , cum concomitantes hujus horrendi terræmotus , qui uno quasi momento se ad 4000. miliarium extendebat , sane arduum , si non impossibile , videtur

## LXXVI.

Interim ; ut Christiani philosophi summam Numinis providentiam adoramus & agnoscimus , a Deo , tanquam autore & conservatore omnium rerum has terræ convulsiones pariter dependere ; quia hic in omnes effectus naturæ tanquam causa prima influit ; adeoque ab ipso dependet , ut prædictæ causæ antecedentes , seu occasionales applicentur aut amoveantur ; cum istæ pariter ab illo regantur & dependeant , uti sacre literæ nos docent.

Igitur certum est , hæc & similia sæpe in poenam peccatorum nostrorum evenisse & etiamnum evenire.

Si autem, ut Phyfici in prædictas causas prædisponentes & occasionales moderni terræmotus inquirere velimus, debemus necessario mutationes temporum, seu tempestates, quæ præcesserant, examinare, unde spero, fore, ut aliquid saltem verisimile eruere possimus.

### LXXVII.

Notum est anno 1754. per totam Hispaniam, uti & Portugalliam tempestatem ficcissimam, & summam anonæ penuriam præextitisse, anno vero sequente 1755. successisse copiosissimas pluvias; quinimo jam in Octobri, quod in his provinciis omni tempore rarum, magnam nivium copiam decidisse, quibus dein 1. Novembris terribilis ille & omni ævo memorabilis terræmotus supervenit.

### LXXVIII.

Si super illis, quæ nunc attulimus, ratiocinari licet, concludere debemus, quod, cum præcedenti ficcissimæ tem-

pe-



pestati abundantes successerint pluviae, pariter ex visceribus terrae copiosissimae tunc fuerint exhalationes aqueae, quia jam superius LXX. ostendimus, quod pluviae dependeant a vaporibus aqueis ex terra in atmosphæram aeris elevatis; cum vero jam in Octobri eodem anno copiosae nives oppleverint terram, tunc a frigore externo derepente omnes pori & meatus corticis terrae constringebantur & occludebantur; adeoque copiosissimi illi vapores aquei, qui alias exhalare debuissent, in visceribus, seu cavitatibus terrae congregabantur, qui dum cum materia sulphurea & martiali ibidem contenta miscerentur omnia illa, quae LXV. diximus, caussabantur; nimirum factum est primo, ut dum tales vapores aquei in cavitatem irruerent, æquilibrium aeris ibidem contenti auferrent; unde ille in motum concitari debuerit. Factum est secundo, ut prædicta illa materia sul-

phurea incalescere, effervesce, & rarefcere inceperit, ex quo aër præcipue contiguus pariter magis femper & magis rarefieri & moveri debuit, a quo aëris motu materia fulphurea adhuc magis commovebatur & atterabatur, magis incalescebat, & rarefiebat, ac tandem inflammabatur, a qua, uti superius ostendimus, fumma tum aëris, cum materiæ fulphureæ rarefactione latera seu parietes cavitatis femper pariter magis premebantur & distendebantur, ut pars debilior & minus resistens necessario defilire & rumpi debuerit; quod in nostro casu in pluribus locis illius cavitatis videtur factum esse; nam vis illa vix non eodem tempore se extendebat per totam Hispaniam in Africam usque, item per totam Portugalliam, partem Galliæ in Americam. Ex quo patet, has cavitates esse debere profundas & profundiores oceano; quia subter has maris aquas præ-

prædicta vis ex Europa in Africam & Americam penetraverat.

## LXXIX.

Superius jam dictum fuit, in profundis locis subterraneis dari plures cavitates, quæ per latera, seu parietes intermedios plus minus densos ab invicem separantur, aut quæ per certos meatus seu canales inter se communicant; dum igitur prædicta vis rarefacta & inflammata five per disruptos intermedios parietes, five per canales intermedios, five utroque modo in alias adjacentes cavitates irruit, debet ibidem necessario ingens terræmotus fieri, quia ista expansio fit adinstar fulguris & fulminis quasi instantanei & summo cum fragore; nam dum prædicta vis rarefacta sua, quibus violente continetur, perrumpit claustra, & qua data porta in alias adjacentes irruit cavitates, tot & repetitæ fiunt impulsiones & refractiones in parietes ta-

lium cavitatum, ut isti necessario contremiscant; iste impulsus renovatur sæpius, quia prædicta materia sæpius inflammatur, ex supra jam allatis caussis, unde fiunt fulgura, tonitrua & fulmina; hinc factum est, & etiam fit, ut sæpius & repetitis vicibus concussa fuerit terra cum ingente murmure, sibillo & fragore; nam superius jam ostendimus, quod interclusus & motus aër majores & plures patiatur refractiones & impulsiones; sic ex hoc fundamento dicit Retrodorus Chius, uti videre est apud Senecam, quod vox in dolio cantantis intendatur. Idem videmus contingere in certis antris, ad quæ si lapis projiciatur, fiunt ingentes fragores & tumultus; quæ omnia certe non aliunde, nisi a prædictis repetitis refractionibus & allisionibus dependent; & eo magis augentur, si illa vis non tantum ab aëre, sed etiam a particulis sulphureis rarefactis, & inflamma-

matris dependeat; uti hoc contigit in nostro terræmotu. LXXX.

Hæc terribilis tragœdia tam diu repetit, donec prædicta materia sulphurea deflagaverit, aut per certa spiracula, seu montes ignivomos expiraverit; etenim experientia edocuit, quod furentibus Vulcaniis montibus terræmotus fileant. Tempore, quo 1755. & 1756. terræmotus furebat, aliquoties quidem factum est, ut Æthna & Vesuvius fumare & furere inceperint, sed tali impetu alio verso mox filebant.

## LXXXI.

Hoc quidem verum est, quod in tali terræmotu multum de prædicta materia sulphurea volatili per terram porosam in aëra atmosphæricum transpiret; quod præcipue in prædicto terræmotu factum erat, totamque hyemem obtinebat. Etenim notum est hyemem 1755. & 1756. fuisse temperatissimam & fere veri similem;

item vix credo, observatam fuisse hyemem, in qua tot meteorea ignea, tot fulgura, tonitrua & fulmina visa fuerint, quam per prædictæ hyemis decursum.

## LXXXII.

Pariter ex relationibus habemus, quod in fodinis præcipue Saxonice hoc tempore talis suffocans calor observatus fuerit, ut operarios a labore solito arceret. Verum hæc omnia infallibile nobis exhibent argumentum asserendi prædictam sulphuream materiam fuisse hujus terræmotus causam, cum negari non possit, eandem in visceribus terræ, antequam exhalaret, præexistisse.

## LXXXIII.

Hactenus demonstratum est, causam terræmotuum principem esse, aut illam materiam crassam sulphuream, pyriticam, aut subtiliorem volatilem sulphuream, aut etiam utramque simul, quæ accensa adinstar fulguris uno quasi momento ad vastissima & remotissima se  
ex-

extendere potest loca. Interim in hac subsistere non possumus, sed admittere debemus, dari etiam alias terræmotuum saltem leviorum causas, in quibus nulla prædictæ materie sulphuræ accensio intercurrit; ne vero hæc perperam dicta videantur, considerare debemus ea, quæ in superficie terræ contingere solent. Numquid constat, ingentes faxorum moles a rupibus sæpe separari absque manifesta causa? quinimo integros montes infirmis factis eorum columnis & fornicibus apud Plinium Lib. 2. C. 91. aliosque autores confedisse, & se ipsos absorbisse leges? Item vastissima ædificia injuria & edacitate temporum labefactari, ac tandem, cum hæc plus ponderis, quam virium habuerint, corrui re, omnes norunt.

Dum enim hæc & similia magnæ molis cadunt, terram ita quassant, ut omnia, quæ in vicinia sunt, una contre-

tremiscant ; talia quoque intra viscera terræ contingere sæpe , quis negabit ? Si enim dantur , uti jam probatum est , amplissimæ , & vastissimæ subterraneæ cavernæ , quæ habeant diversos anfractus , diversas circumgirationes , diversas columnas , fornices , quibus tanquam fulcris ingentes terræ moles sustentantur , utique facile fieri potest , quinimo sæpe fit , ut talia sustentacula jacturam temporum patiantur , ab influentibus aut a præterfluentibus aquis subterraneis solvantur , abradantur , aut ab aëre , aut a spiritu illo catholico exedantur , & debilitentur , imparesque fiant tanto ferendo ponderi ; in tali enim casu ingens terræ moles suis destituta fulcris præceps ibit , cujus impetus eo major erit , quo major moles , & quo profundior casus ; quo tempore terra tremere & concuti debet ; in tali enim statu fit tam impetuofus aëris intra cavernam motus , ejusque



que magna ad parietes columnæ allisio & repetita reflexio; qualis in superficie terræ nunquam fieri potest. Hoc videmus in aliquibus profundis puteis & cavernis, quæ aperto ore ad superficiem terræ hiant, si lapillus in talem cavernam dejiciatur, tunc fit magnus strepitus & fragor; uti refert Eruditissimus Verulamius in historia ventorum: sunt quidam putei in Dalmatia & regione Cerranaica, in quibus, si dejiciatur lapis, excitantur tempestates.

## LXXXIV.

Terræmotus ab ista causa excitatus, arctos intra limites, continebitur, nam vix ad unum alterumve milliare sese extendet.

## LXXXV.

Verum alia, quæ forte frequentior, quæ magis funesta esse solet, adstrui potest terræmotus causa, quæ sine accensione alicujus materiæ sulphuræ terræ-

mo-

motum excitare potest, & hæc ad flatum, seu ventum subterraneum reduci, & hac ratione comprehendi debet. Ad hoc vero, ut istud assertum clarius exponatur & facilius intelligatur, præmittenda, & de verbo ad verbum adducenda est notabilis illa observatio, quæ in Actis Anglicanis edit. Lips. p. 387. habetur. „ Quando „ in profunda fodina occurrit magna co- „ pia aquæ stagnantis hiemalis, solere „ operarios aditum parare, qua deri- „ vent aquam illam: sed simul ac ad „ illum Horizontis paralelismum perven- „ tum fuerit, ut aqua incipiat devolvi, „ in locum tutum operarios se ex aditu, „ quam primum possint recipere, ne in „ frustra comminuantur ad latera aditus: „ inclusum enim aërem seu ventum in „ aqua stagnante fragore adeo horribili „ erumpere, ut crederes, displodi tor- „ mentum, tantaque violentia, ut omnia „ secum rapiat, ipsas dissolvendo rupes, vel „ ali-

„ aliquam multum distantes in opere seu  
„ aditu. LXXXVI.

Superius jam diximus, aërem, qui in cavitatibus subterraneis continetur, esse in statu violento, etsi immotus sit, in æquilibrio; si vero contingat, ut ex aliqua parte talis cavernæ aqua irruat, aut vapores aquei in guttas condensati ad illam ferantur, tunc necessario in tali aëre tollitur æquilibrium (quod etiam fieri videmus in nostra atmosphæra) igitur aër, qui prius quietus erat, commovetur, & pro diversa amplitudine talis cavernæ nunc magis, nunc minus ad ejusdem parietes allidit, & refringitur, sicque ventus excitatur; qui dum per angustos & anfractuosos canales ab una caverna ad aliam transit, non tantum sibillum, mugitum, sed etiam magnum fragorem excitare potest; uti jam paulo ante de lapillis in puteum, aut cavernam injectis dictum est. Ex qua impetuosa ad parietes alli-

fio-

sione, & exinde subsequente fragore terræmotus excitari potest.

### LXXXVII.

Accedit, quod, dum ventus in parietes cavernæ allidit & impellitur, facile contingat, ut aliquam terræ molem minus cohærentem, & resistentem a loco suo dismoveat, & ad fundum cavernæ præcipitet; in quo casu dum duæ tales causæ concurrunt, fortior & sensibilibior etiam terræmotus continget, qui aliquoties repetere, & sat diu perdurare potest, donec aër subterraneus se ad æquilibrium componat.

### LXXXVIII.

Si talis caverna, in qua prædictus excitatur ventus non multum a superficie terræ distet, tunc fieri potest, ut ab illo fragore & impetu superior pars, tanquam minus resistens rumpatur, & terra laxata dehiscat, aut subsidat; unde observamus, quod per terræmotus  
fæ-

sæpe aperiatur absque eo, quod fumus aut flamma exeat; quod certe fieri non posset, si omnis terræmotus ab accensione superius expositæ materiæ sulphuræ dependeret.

Quare vides Benevole Lector, quod ad aliquam ex jam adductis causam quilibet terræmotus reduci, & exinde tanquam fonte omnia ejus phænomena explicari possint. Quare sit

### SECTIO III.

*De præcipuis terræmotus phænomenis, item de fontium, conchyliorum, æstuum, ventorum & aliorum, quæ ex nostra sequuntur sententia, origine, causis & effectibus.*

#### LXXXIX.

**S**ic phænomenon, quod in diversis aliis, sed præcipue in terræmotu

I. Novembris 1755. observabatur, vix aliunde, quam ex nostra sententia deduci poterit, erat autem tale: nimirum, uti jam ex §. XXXIX. patet, quod vis illa ex Portugallia se extenderit, in Africam & Americam, & magnam Europæ partem eadem die & eodem fere tempore pervagaverit; hæc fere momentanee ad 4000. milliarium in distans se extendens & expandens actio sane non aliter concipi nec exponi potest, quam quod prædicta §. LXIV. materia sulphurea volatilis inflammata, & accensa adinstar fulguris, & materiæ electricæ ad talem distantiam suam exeruerit vim. Etenim repetitis experimentis jam evictum est, materiam fulguris esse materiam electricam, & materiam electricam ad indefinitam fere distantiam quasi momentanee, & instantanee suam exercere vim. Unde sapientissime Eru-  
ditissimus D. Krüger ad hanc materiam  
ele-

electricam ad explicanda phœnomena terræmotus respexit. Alterum phœnomenon multo majore admiratione dignum, quod §. XXXIV. jam expositum habetur, consistit in eo: Nimirum 1. Novembris 1755. item 18. & 19. ejusdem mensis, uti etiam 9. Decembris ejusdem anni observabantur diversa maria, flumina, diversi fontes & lacus repetitis & alternis vicibus nunc intumescere, mox iterum detumescere, ita, ut mare in diversis locis sexies intra horam increverit & decreverit; sic fons medicatus Teplicensis in Bohemia sexies pariter intra horam increverat & decreverat.

## XC.

Hoc mirabile in natura phœnomenon non aliam, quam ex nostra sententia deductam explanationem admittit; nam si meminerimus eorum, quæ §. XXXI. dicta sunt, & quæ in actuali terræmotu concurrunt, palam erit, quod in cavi-

tatibus subterraneis debeat fieri tam aëris, quam partium sulphurearum præcipue volatiliū immanis rarefactio, a qua rarefactione aqua in his cavitatibus contenta ita premitur, ut necessario per meatus, & canales subterraneos tam ad mare, quam ad fontes, flumina & lacus, cum quibus, ut diximus, §. XLV. communicat, propelli, & extrudi debeat; etenim jam ostendimus, in locis subterraneis, etiam profundissimis, dari magna hydrophylacia, quæ per diversos canales, uti ipse Clarissimus Woodbardus statuit, cum mari, fontibus, & lacubus communicant; si itaque aqua in prædictis cavitatibus ita premitur, facile fit, ut ad loca, cum quibus communicat, exprimatur. Si igitur in illis cavitatibus fiat alternativa pressio aquarum, uti jam ostendimus, fieri posse, si nimirum fiat ibidem alternativa accensio, & fulguratio, tunc debet pariter sequi alternativa  
in-



intumescencia & detumescencia; nam sicut dum aquæ in suis hydrophylaciis a prædicta rarefactione premuntur, exprimi debent, v. g. ad mare, quod exinde intumescit, ita dum prædicta rarefactio, & pressio remittit, aquæ ad abyssum, ex qua prodierunt, revertuntur, unde fit detumescencia.

Ex quo pariter constat, ut dein dicemus, quam facile omnes difficultates de diluvio universali exinde salvari possint.

### XCI.

Hoc quidem verum est, quod illa intumescencia, quæ ad littora maris observatur, diu in tali statu perseverare non possit, eo, quod aquæ paulo post se ad æquilibrium cum aliis contiguis reducere debeant. Dum vero talis aqua magna mole & magno impetu ex suo gurgite truditur ad mare, facile fit, ut in vicinia hujus gurgitis aqua marina tumeat, quin adhuc increfcat alia aqua

marina magis remota. Talis casus legitur : Histoire de l' Academie Royale, anno 1725. Scilicet in Normania ad portum villæ flaminiae 13. Julii mare ad 10. pedes increverat, quin hoc in vicinis locis, ut Cherburgi, Cartereti, aut Rozeliis observatum fuerit.

## XCII.

Item facile concipi potest, quare aliqui fontes ex terræmotu oblitterentur, & alii novi profiliant, quia illa ipsa vis tantam terræ molem in certos fontium canales intrudere potest, ut exinde obstruantur; & illa ipsa vis poterit alios per terram minus cohærentem, & resistentem canales novos sibi præparare, sicque aquam illuc derivare, atque novos fontes excitare.

## XCIII.

Verum ne mirum, aut forte impossibile alicui appareat, tantam molem aquarum a prædicta rarefactione exprimi,

&amp;

& ad circumferentiam terræ propelli posse, attendat illa, quæ superius diximus de vi tam aëris, quam partium sulphurearum rarefactarum, sed præcipue ad illa, quæ de Vesuvio ardente & furente allata sunt; sic enim spero, fore, ut facile victas præbeas manus. Nam ex his patet, rarefactione aëris, & partium sulphurearum, quæ in cavitatibus Vesuvii fit, magnam copiam saxorum, metallorum, aliarumque rerum ita longe rejici, ut cineres ad portum Melitæ Venetias, quinimo Constantinopolim usque pervenerint. Igitur adhuc facilius videtur fieri posse, ut aqua ex suis hydrophylaciis a prædicta rarefactione ad superficiem terræ pel-latur; nam si omnes terribilis terræmotus 1755. effectus consideramus, facta comparatione cum illis, qui ex Vesuvio ardente, & furente fiunt, videbimus, quod vis rarefactionis in nostro casu statui debeat esse multo major, quam illa,

quæ est, dum Vesuvius ardet, & furit; ista enim se tantum ad vicina loca extendit, cum alia tertiam orbis terraquei partem occuparit.

## XCIV.

Hinc patet quoque ratio, quare illo tempore, quo prædicta aquarum intumescencia observabatur, in diversis locis, tam in mari, quam in lacubus, aqua quasi bulliret, & in varios moveretur vortices, apparebat, quod phænomenon sine dubio ab aqua ex profundis hydrophylaciis magno impetu proruen- te, derivari debet; hoc ipsum videre est in mirabili illa Norwegiæ charybdi, quæ per 6. horas aquas marinas quam avidissime haurit, & absorbet, per alias vero 6. horas summo impetu evomit; in quo casu aquæ quasi in montem assurgere, & bullire videntur. Ex qua observatione evidentissime patet, quod tam intumescencia, quam ebullitio aquarum, quæ

quæ in terræmotu observantur, ab aquis ex abyſſo, ſeu cavitatibus ſubterraneis impetuoſe irruentibus dependeant.

## XCV.

Patet exinde pariter ratio, quare diverſa flumina, ut Rhodanus, Viadrus, aliaque exundarint, & tumuerint tempore alias pacatiſſimo & ſereno, ut prohdolor! vicina loca tantum exinde detrimenti ceperint. Hoc quoque ex duplici cauſſa eveniſſe videtur, partim, quia mare vicinum, in quod alias talia flumina ſe exonerare conſueverunt, ita tumuerat & increverat, ut hæc in illud ſe exonerare non poſſent, & partim, quia a tergo ſeu ex ſcaturigine ipſis major aquarum moles accedebat, unde dein neceſſario exundare & omnes adjacentes terras labefactare debebant.

## XCVI.

Ex hac alternativa intumeſcentia, & detumeſcentia multa alias in natura ignota in-

ferri possunt, ut primo, quod hæc considerari possit tanquam æstus maris insolitus, & irregularis, eo, quod causa hujus fuerit extraordinaria, quæ aquas ex visceribus terræ expresserat, uti jam probatum est.

Jam si supponamus, quod æstus maris irregularis fiat absque lunæ actione, sive illa dicatur pressio, sive attractio, sive materiæ gravificæ interceptio; tunc possumus, quinimo debemus omni cum fundamento etiam admittere, quod æstus soliti, & regulares fiant pariter sine aliqua actione lunæ; adeoque quod luna, quæ ab omnibus vix non philosophis pro causa æstus marini accusatur, plane indifferenter se hac in re habere videatur. Hoc systema tanquam novum A. R. P. Kell, Vir Doctissimus adoptavit, & ad ejusdem confirmationem singulari industria quam plurimas collegit observationes, quæ in suis celeberrimis operibus philosophicis videri possunt.

## XCVII.

Ast vix meo judicio melior & efficacior adferri potest observatio, quæ hoc systema magis firmet, quam illa, quæ hoc tempore terræmotus observata sunt, tum in mari, cum in lacubus; nam si mare ad littora, item lacus assurgere, elevari, seu intumescere & detumescere possunt, quod idem est, ac æstuarare, eo, quod aquæ ex hydrophylaciis subterraneis per certos canales seu voragines cum mari & lacubus communicantes irruant, tunc ista intumescencia fiet, quoties causa aderit, propter quam aqua ex prædictis hydrophylaciis communicetur mari. Quæ vero possit esse causa, propter quam aqua ex prædictis hydrophylaciis bis, aut semel de die influat in mare, unde illud intumescat, iterumque refluat, unde mare detumescat; omnino difficile est determinatu; & revera tota difficultas hujus

jus systematis in determinanda & assignanda tali causa versatur.

### XCVIII.

Interim si consideremus præcipua duo naturæ phænomena, hoc facilius concipi poterit: & quidem primum, quod terra quotidie circa suum axem giretur; item, quod atmosphæra non ubique æqualiter globum terraqueum premat, sed, uti celeberrimorum autorum observata docent, hæc pressio versus polos semper magis augeatur; versus æquatorem vero, & sub eodem, minuatur; quod patet a ponderatione gravium, & oscillatione pendulorum; & sane hæc unica est ratio, quare sub æquatore, & in ejus vicinia æstus majores, & magis regulares observentur; circa polos vero, & sub illis nullus fit diurnus æstus, aut saltem minor. Si igitur hæc considerentur, facile concipi potest, quod sub diversa, & regulari, quæ quotidie fit, cir-



circumgiratione globi terraquei, & diversa ac inæquali pressione aquæ marinæ nunc accrescant, nunc decrescant; prout necesse est, ut inter aquas subterraneas, & marinas æquilibrium fervetur. Quamdiu enim aquæ marinæ cum illis, quæ sunt in illa magna abyſſo, æquilibrium servant, nullus erit æstus, si vero in una alterave parte tale æquilibrium dematur, ibi, ubi tale deest, debet fieri æstus, at tale æquilibrium facile & fere regulariter quotidie tollitur; quia jam diximus, quod pressio aquæ marinæ sit major versus polos, minor circa æquatorē, unde si consideremus ex facta hypothesi, quod terra moveatur, facile concipiemus, tale æquilibrium tolli debere. Doleo, quod præfatus Clarissimus Autor causam istam nec attigerit, multo minus explanarit; doleo pariter, mihi satis temporis derogari, ad hujus sufficientem investigationem, quæ cura maneat alios.

## XCIX.

Interim ex his , quæ compendiose attuli , patet , causfam faltem materialem hujus recursus æstuum , five sint regulares , five irregulares , intra viscera terræ , & non extra illam , ut in luna , latere ; neque enim obest illud argumentum , in quo adversarii totam vim ponunt , quod nimirum æstus regulares videantur motum lunæ sequi , & quotidie bis intra 24. horas & 48. minuta uti dies lunariis , absolvi. Item cum luna quotidie 48. tardius oriatur , idem contingat etiam in æstu maris. Verum jam superius dictum est æstus regulares eodem modo contingere , ut irregulares ; sed quis dicet , quod æstus maris & lacuum , qui 1. Novembris Anni 1755. sexies intra unam alteramve horam contigit a luna dependere possit. Igitur sicut hoc in casu diximus aquas marinas , & lacuum incrementum adscivisse ab aquis

quis subterraneis irruentibus, decrementum vero ab iisdem recedentibus, ita etiam omnes æstus regulares eadem ratione contingere debere.

## C.

Tales æstus maris insoliti sæpe observantur, sed notatu dignus est ille, quem refert Dom. Newhouse supplem. act. Lipf. Tom. 1. anno nimirum 1669. mare intra tres horas circa Weymutum septies affluxit & refluxit; idem pariter contigit in Tamesi anno 1656. 3. Oct. item anno 1749. 13. Julii hora 11. matutina mare alias pacatissimum in Comitatu Pembrockshire intra 1. horam septies æstum passum erat.

## CI.

Item naturæ scrutatoribus noti sunt diversi Euripi, qui æstum patiuntur absque aliqua actione lunæ; sic nota est illa mirabilis Charybdis in Norwegia, Melstroom dicta, cujus ambitus ad 13. fere mil.

milliaria se extendit. Dum enim Oceanus refluxum patitur tanta copia per sex horas haurit aquas marinas, aut quidquid five naves, five Balanæ prædictum voraginis ambitum attigerit una hauriatur, & præceps in barathrum detrudatur; per alias vero sex horas, dum Oceanus affluxum patitur, eadem vi, qua prius absorbserat, aquas una cum diversis rebus haustis evomit, ita, ut aquæ ibidem quasi ebullire & in montes assurgere videantur, & hoc fit absque illa actione lunæ.

Ex his sane clare patet, quod mare intumescat, quia aquæ ex cavitatibus subterraneis in idem impetuose ruunt, & detumescat, quia ab iisdem cavitatibus absorbentur.

## CII.

Ad maiorem hujus asserti confirmationem plura alia argumenta afferri possent de fluminibus & lacubus æstuantibus, de morbis,

ut febribus, insultibus epilepticis periodice & regulariter absque omni actione lunæ affligentibus ; cum a nostro scopo aliena sint , libentissime præterimus & aliunde quam plurima eorum in elegantissimo opere A. R. P. Khell ; item in operibus Eruditissimi Kühnii videri possunt. Interim hic unicum præterire non possum, quin meminerim, quod ad æstum maris, terræ elevationes, ejusque fissuras tempore terræmotus observatas, multum contribuere possit atmosphæra illo tempore, & in illo loco, ubi fuit terræmotus plerumque levior. Nam mercurius in barometro profundissimum solet obtinere locum. Unde dein fit, ut aqua & terra tunc ab atmosphæra minus premantur, sicque facile elevari possint ; uti hoc & ex eadem causa videmus in Typhone, aquas marinas in columnas elevari.

Item ex sententia de terræmotu, quam superius adduximus, clarius, quam

unquam patet origo fontium & fluminum, de qua tam hoc, quam superiore sæculo Clarissimi Viri tam multa tamque contraria nobis communicarunt.

## CIV.

Duæ principes a Clarissimis Philosophis hac de re foventur sententiæ, quarum una omnes fontes, fluvios & lacus a pluviis & solutis nivibus derivat; altera vero fontes & præcipue perennes a mari deducit. Verum si ea, quæ in nostra superius allata & exposita sententia occurrunt, examinentur & in memoriam reducantur, palam erit, omnes fontes perennes ex subterraneis profundissimis, aquarum abyssis originem ducere; nam superius jam ostendimus istas aquas subterraneas per diversos canales, meatus, quin etiam per terram porosam cum mari, fontibus & lacubus communicare; quia si tales aquæ in suis cavitatibus subterraneis ab aliqua causa premantur, uti  
con-

contigit in terræmotu 1. Novembris anni 1755. tunc ad superficiem terræ extruduntur, & tam mare, quam fontes & lacus exinde augentur & intumescunt. Igitur duplici modo prædictæ aquæ subterraneæ ad fontes derivari possunt; vel enim in propria substantia per communicantes canales, uti jam diximus, vel evaporando versus terræ superficiem, qui vapores, dum in aliquo cavo subterraneo conveniunt, qualia cava præcipue circa montes observantur, primo guttas, dein rivulos, tandem diversa in prædictis cavis hydrophylacia constituent, ex quibus dein fontes originem habent, talia igitur hydrophylacia superficiæ terræ vicina cum aliis profundioribus & majoribus hydrophylaciis, seu aquarum abyssis communicant, & , uti jam expositum est, conjunguntur duplici modo, nimirum per meatus & canales, quod jam sufficienter probatum

est ; igitur dubitare aliquis potest de vaporibus ex profundo , & quasi centro globi terraquei ad superficiem terræ ascendentibus , quorum magna pars in auras rapitur , & materiem pro pluviis aut nivibus subministrat ; alia vero horum vaporum pars in diversis cavis in guttas condensatur , & ibidem prædicta hydrophylacia constituit ; verum , si aliquis sequentes , certas & fere unicuique notas observationes rite examinarit , facile in nostram abibit sententiam. Nam 1. in profundis fodinis , antequam in nostra atmosphæra pluat , experiuntur fossiores suffocantem calorem , copiosissimos vapores , qui lateribus talium cavitatum adhærentes magnas guttas , & quasi pluviâ constituant ; quinimo rivuli quidam ex talibus fodinarum parietibus horizontaliter in cavitatem sæpe tam copiose depluunt , ut operarios a labore arceant. Sæpe etiam contingit , ut cum prædictis

va-



vaporibus exhalationes sulphureæ conjungantur, quæ ab accensis candelis, aut facibus fummo cum fragore & operariorum strage inflammantur & deflagrant.

## CV.

Dum prædicti vapores in fodinis observantur, periti & experti solfores prædicere possunt non tantum pluvias, sed etiam quam diu tales duraturæ sint, determinant. Qui vero hos vapores tanquam pluviae prænuncios nollet admittere, experiri poterit magno cum sui nasi incommodo in latrinis; quin imo observationes docent, quod in profundis Sueciæ fodinis sæpe pluat, cœlo existente sereno. Vide *Voiage au Nord* par Mr. Outhier.

## CVI.

Ex hac tanquam principe observatione sequuntur plures aliæ pariter certæ & aliunde notæ, quæ prioris effectus merito dici possunt: nam dum prædictæ evaporationes ex visceribus terræ ad su-

perficiem ejusdem fiunt, turbantur diversi lacus & fontes, quorum aquæ non ita sapiunt; mare ipsum sine aliquo ventorum impulsu movetur, & quasi bullire videtur, quinimo calidius redditur, & magis evaporat, hinc contingit, ut tali tempore pisces ad ejusdem superficiem profiliant, quasi auram pro refrigerio capturi. Item quandoque in mari nocturno tempore flamma & scintillæ conspiciuntur, montes nebulis operiuntur, Vulcanii vero copiosos & densos vapores & fumos exhalant; præterea alia, quæ vix non in omnibus corporibus solidis, ut lapidibus præcipue marmoribus & ferro observantur, quæ omnia, dum imminet pluvia, humida apparent.

## CVII.

Cum itaque omnia hæc observentur, uti dictum est, antequam pluat, evidentissime inferri potest, quod maximam partem tam pluvia, quam multorum  
fon-

fontium origo a prædicta evaporatione dependeat; nam pars talium vaporum penetrat superficiem & crustam globi terræquei, atque in auras elevatur, unde pluviae dependent; pars vero in diversis cavitatibus non procul a superficie terræ in guttas condensatur, ibique accumulatur, & prædicta superficialia hydrophylacia constituit, ex quibus plerique fontes originem ducunt.

## CVIII.

Neque verisimile videtur, pluvias a ventis vapores afferentibus semper dependere, quia juxta Verulamium venti non longe extenduntur, & quia sine ventis ingruunt: Item ipse ventus ex visceribus terræ originem ducit. Vide Act. philos. soc. Ang. p. 387. Item Verulamium de ventis.

## CIX.

Hoc quidem facile admittere possumus, quod tam ex pluviis, quam ex

folutis nivibus aliqua portio aquarum per terram porosam, per rimas, aut fissuras se aliquibus magis superficialibus hydrophylaciis insinuare possit, unde talia magis turgeant. Verum hoc non infringit nostram sententiam, quia exinde concludi non potest, quod talis aqua det fontibus & fluminibus originem, sed quod ipforum molam & volumen augeat; unde etiam fit, ut ista aquarum exuberantia brevissime duret, & una quasi cum pluviis esse desinat, & dein flumina se mox ad pristinam & consuetam extensionem reducant.

## CX.

Dixi, quod aqua pluviarum ad aliqua tantum, & magis superficialia hydrophylacia penetret; nam si conditio terræ nimis lapideæ aut argillaceæ hoc impediat, aut si talia hydrophylacia nimis profunde delitescant, tunc aqua pluvia & solutarum nivium ad talia penetrare  
non

non potest, quia de la Hire & multi alii Clarissimi Viri repetitis experimentis observarunt, quod aquæ pluviae ultra duos pedes penetrare non possint. Neque enim effugium adversariorum aliquam habet vim, dum respondent, quod aliter se res habeat circa montes eorumque radices, sed nostra opinione crederem, contrarium obtinere debere, nam si aqua pluvia in plano horizontali, in quo diutius quiescit, ultra duos pedes penetrare non potest, neque etiam tam avidè a terra hauriatur, ut videmus in cloacis diu perseverantibus; multo minus penetrabit in montibus, aut circa eorum radices, & juga, quæ sunt tanquam plana inclinata, ubi aqua pluvia partim sua gravitate, partim ab alia aqua ex monte decidua magna violentia & celeritate ultro abripitur.

## CXI.

Quare ex hoc fundamento, per se corrui illud argumentum, in quo Clarissim. Vallisnerius, alique tantum fiducia ponunt, dum dicunt, obvia experientia constare, quod deficientibus pluviis deficient fontes & flumina; supervenientibus autem pluviis hæc quasi renascantur. Unde concludi potest, fontes & flumina originem habere ab aqua pluvia.

## CXII.

Ast ex illis, quæ superius diximus aliud clarissime eruitur; nam si tam pluviae, quam prædicta illa hydrophylacia superficialia originem habent a vaporibus subterraneis, nemo mirabitur, si imminutis, aut suppressis illis vaporibus, & alio raptis tam pluviae, quam illa hydrophylacia, adeoque fontes & flumina jacturam patiantur; tunc enim verum quidem erit, quod deficientibus plu-

pluviis deficient multi fontes; sed verum non erit, quod ideo deficient, quia deficient pluviae, interim bene dicere possumus, quod ideo deficient fontes, quia deficient evaporationes, & ideo deficient evaporationes, quia a diversis causis intra viscera terræ agentibus & nobis ignotis alio vergunt, & rapiuntur.

## CXIII.

Interim dixi, quod in magnis siccitatibus multi fontes, sed non omnes deficient. Sic illa mirabilis scaturigo Mutinensis, de qua Ramazzini eruditissime scripsit, siue pluat, siue non pluat, siue solvantur in Alpibus nives, siue non, semper manet eadem, hoc est ipsius in puteis aquæ ad eandem semper altitudinem ascendunt.

Item Derham. Theolog. phys. asserit, fontem prope Upminster immutabilem manere, siue pluat, siue non. Idem videmus in multis aliis, sed præ-

ci-

cipue fontibus medicatis. Quod ex nostris fundamentis facile salvari potest, quia jam superius dictum est, aquas subterraneas duplici modo fontibus & fluminibus præbere originem, nimirum primo per evaporationem, taliumque vaporum in superficialibus hydrophylaciis collectionem, & dein per communicationem mediante canalium cum fontibus & fluminibus. Sic dantur fontes & fluvii, qui utroque modo & originem & augmentum capiunt; dantur vero alii, qui uno tantum ex prædictis modo suas aquas accipiunt; potest itaque aliquis fons, quamvis pluviae & omnes subterraneæ evaporationes desint, immutatus manere, si talis per canalem cum abyfso communicet. Et tales sane sunt constantissimi.

## CXIV.

Sed forte quæres, unde & quomodo fieri potest, ut aqua ex profundissimis



mis hydrophylaciis ad superficiem terræ ascendat? quærenti fiet satis, si ad priora reflectamus; diximus enim, aquas subterraneas per diversos canales & meatus plus minus amplos communicare cum mari, fontibus, fluminibus &c. adeoque isti canales inter se communicantes constituunt quendam syphonem recurvum, in quo ex hydrostatices legibus aqua debet se restituere ad æquilibrium, adeoque aqua fontium, fluminum debet æquilibrare cum mari. Unde facile colligitur, quare ascendere debeat, ut dein magis patebit.

## CXV.

Sed quæres ultro, quare & quomodo aqua ex visceribus terræ per modum vaporum sæpe ita ascendat & elevetur? Huic quæstioni pariter ex prioribus satisfieri poterit, ubi ostendimus, calorem subterraneum esse aliquando majorem, aliquando minorem, item in aliquo loco  
esse

esse majorem, in alio minorem, prout materia illa sulphureo-martialis, aut pyritica prædominatur. Itaque a calore subterraneo prædicti vapores in visceribus terræ elevari poterunt tam bene quemadmodum omnibus notum est, a calore solis aquam in superficie globi terraquei in vapores resolvi & elevari. Unde illa quæ superius attulimus, adhuc magis confirmantur; nam ostendimus, constare ex constanti observatione & relatione fossorum, quod imminentibus copiosis & diuturnis imbribus in fodinis subterraneis tum copiosi vapores, cum calor quasi suffocativus operariis magno incommodo sit.

## CXVI.

Verum terræmotus anni 1755. nobis evidentissimum subministrat fundamentum asserendi, quod fontes perennes communicationem & originem ex profundissimis hydrophylaciis & abyssis habeant;  
etenim

etenim superius jam dictum fuit, quod causa hujus terræmotus profundissime latuisse debuerit, eo, quod subter Oceanum in Africam & Americam evagata fuerit. Cum vero eadem causa diversos & diffitos fontes, lacus attigerit, ut §. XXXVIII. diximus, signum evidentissimum est, quod tales fontes & lacus ex iisdem abyssis seu hydrophylaciis habeant originem.

## CXVII.

Ex quibus inferimus primo: quod fontes, qui ex profundissimis hydrophylaciis originem habent, constantiores & vere perennes dici possint, reliqui vero, qui a superficialibus & circa montium radices sitis hydrophylaciis dependent, in magnis & diuturnis siccitatibus deficere possint; quia superius ostendimus, talia hydrophylacia a vaporibus subterraneis maximam partem dependere. Si igitur tales vapores deficient, uti hoc in  
diu-

diuturnis siccitatibus contingere solet , debent pariter tales fontes deficere.

## CXVIII.

Item inferimus secundo , quod fontes , lacus & maria , quæ cum magna abyſſo , seu cum hydrophylaciis subterraneis communicant , etiam communicent inter se per tubos, seu canales diversi perimetri; adeoque debeant necessario juxta leges hydrostaticas inter se æquilibrium servare; si itaque talia liquida essent homogenea, seu ejusdem gravitatis , deberent se ad eandem altitudinem componere ; verum cuilibet notum est , aquas marinas esse. graviores aquis fontanis ; adeoque ex hoc principio fit, ut fontes in altissimis sæpe montibus scaturire videamus, quod certe non aliunde nisi ex legibus hydraulicis & hydrostaticis deduci potest.

## CXIX.

## CXIX.

Quapropter mirari debemus, quod Celeberrimi & Illustres Viri, ut eo facilius contrariam tueri possint sententiam, judicent, prædictos vapores subterraneos, guttas aqueas, item rivulos, qui in locis subterraneis observantur, ab aqua pluvia se per terram porosam, diversasque rimas insinuante, dependere; cum tamen prædicti vapores, uti jam diximus, antequam pluat, & dum pluit in locis subterraneis observentur. Quinimo observationes nos docent, quod in profundissimis suecicis fodinis sæpe pluat cœlo existente sereno.

Plura similia legi possunt apud Verulamium in elegantissimo tractatu de ventis, ubi ostenditur, causam materialem pluviarum ut plurimum ex visceribus terræ originem ducere, quamvis negare non possimus, exhalationes, seu evapo-

rationes lacuum, fluminum, aquæ marinæ ad pluvias multum contribuere.

## CXX.

Unde non videtur magnam habere difficultatem ille calculus, quem Clarissimus Mariotte de fluvii sequanæ aquis, qualem etiam Clarissimus Sedileus in aliis fluminibus instituit. Ejusdem genii est alter calculus, quem ingeniosissimus Halleyus de quantitate evaporationis maris mediterranei cum quantitate aquæ ex fluminibus in idem se exonerantibus computavit, exinde conatur enim ostendere, quod vapores, qui ex mediterraneo elevantur, longo intervallo excedant omnem molem aquarum, quam omnia flumina in illud invehunt. Igitur infert, quod omnes alii superstites mediterranei vapores successive ad terram, vel per modum pluviarum aut nivis recidere debeant; & cum sic vix quarta pars ad mare iterum deferatur, necesse erit, ut alia moles

les aquarum pluviarum se in profundum terræ insinuet, & partim pro nutritione vegetantium, partim pro constituendis hydrophylaciis, tanquam vastissimis aquarum & fontium promptuariis inserviat.

## CXXI.

Verum nostri fori non est, hæc minutim trutinare aut refutare, cum hæc profundissime examinata & soluta videri possint in Clarissimi D. Kuhnii meditationibus de origine fontium &c. Item in Actis Lips. anno 1685. Eruditissimi Plot Societat. Lond. Secretarii, aliisque Clarissimis autoribus, qui data opera hac de re tractarunt, sicque ne actum agere videamur, Lectorem B. ad illos remittimus.

## CXXII.

Item ex nostra de terræmotu sententia facile solvitur, illa de aquis diluvianis ingens difficultas. Nam ex sacris litteris constat, quod aqua diluvii quindecim

cim cubitis altior fuerit quam altissimi montes, quos operuerat; cum enim omnes aquæ, quæ hoc tempore superficiem globi terræque operiunt, sufficere non potuerint, ut prædictam altitudinem adipiscerentur, unde necessarium erat, ut Deus vel alias novas aquas crearet, quod infinitæ ejus providentiæ obesset, vel quod tales aquas aliunde, ut ex aliis syderibus in auxilium vocaret. Ex quo factum est, ut aliqui, uti acutissimus Wiston, putarent, quod terra suo motu in cujusdam cometæ caudam impeerit, & virtute attractiva copiosissimas aquas, tanquam largissimos imbres in se rapuerit, atque sic aquarum molem, quæ in diluvio prædictæ altitudini efficiendæ par esset, constituerit. Ast hæc & similia ad libitum inventa & asserta videntur; etenim ostendi non potest, quo illæ aquæ post diluvium devenerint, an annihilatæ, aut alio derivatæ fuerint.



## CXXIII.

Ex nostra vero sententia facile ostendere possumus, aquas illas subterraneas, quæ magnam illam abyssum implent, & constituunt, ad prædictum diluviū sufficere potuisse. Nam dum aër in prædicta abyssu rarefactus omnes aquas ibidem contentas expresserat ad superficiem terræ, factum erat, ut aquarum locum prædictus aër rarefactus occupasset, ne ibidem vacuum admitti debeat.

## CXXIV.

Hoc autem non tantum rectæ rationi sed & sacris litteris respondere videtur, sic Genes. c. VII. *Rupti sunt omnes fontes abyssi magnæ. Item: Ego adducam aquas diluvii super terram.*

Si enim ab aliis vicinis syderibus aquæ in auxilium vocatæ fuissent, non dixisset super terram sed potius in terram.

## CXXV.

Item dum dicit: *Omnes fontes abyssi magnæ rupti sunt* significat, quod aquæ ex profundissimis hydrophylaciis summa violentia per canales, quibus cum fontibus, lacubus, & aquis marinis communicant, ad superficiem terræ propulsæ fuerint, adeoque, quod exinde summus ibidem æstus excitatus fuerit.

Unde iterato constat imo communicatio fontium, fluminum, lacuum, & marium cum aquis subterraneis.

## CXXVI.

Item exinde deduci possunt plura hydrophylacia, seu plures abyssi: nimirum aquarum abyssus magna & plures minores inter se communicantes, aut saltem plura similia hydrophylacia subterranea inter se per diversos canales communicantia, abyssus aquarum magna vocari potest.

## CXXVII.

Tandem exinde derivari possunt montes, & diversa peregrina atque exotica con-

conchylia , quæ ibidem reperiuntur , & quorum ortus ad hæc usque tempora magna Phycorum adeo exercuit ingenia. Nam dum aqua ex profunda abyſſo magno impetu per canales communicantes ad superficiem terræ exprimebatur , tunc debuit neceſſario contingere , ut multum terræ minus cohærentis ex his canalibus abraderetur , & ad superficiem terræ abriperetur , quæ ibidem congeſta , ſi non omnes , ſaltem multos , quos videmus , montes conſtituerat.

## CXXVIII.

Quia vero exinde canales per quos aqua impetuoſe ferebatur , neceſſario dilatabantur , factum eſt ; ut una cum aqua & terra ex profundiffimis hydrophylacis quam plurima conchylia adferrentur , quæ dein partim prædictæ terræ ex canalibus abraſæ , & ad superficiem terræ propulſæ immixta , partim a motu & impetu aquarum ultro evecta & cum alia

terra mixta, hinc inde sat copiose deprehenduntur. Dum vero aquæ diluvii subsidissent, & se in pristinas cavitates recepissent, multæ portiones terrestres leviores & limosæ, quæ cum aquis hinc inde agitabantur, partim lege gravitatis operiebant superficiem terræ, partim vero ipsis canalibus, per quos aquæ diluvii se receperant, adhærendo angustabant eorum diametrum, uti mox diximus, nimis dilatatum, quæ tamen sufficeret pro conservanda communicatione fontium cum aquis subterraneis.

## CXXIX

Ex quo ratio patet, quare scaturigines circa montes potissimum habeant suam sedem; item cur ibidem multa superficialia hydrophylacia efformata fuerint, quia tales cavitates, quæ prædicta hydrophylacia efformant, nihil aliud esse videntur, quam aliqua pars adhuc superstes ex illis canalibus nimium tempore diluvii dilatatis.

Su-

Superfunt aliqua, fed minoris momenti explananda terræmotus phœnomena, quæ facile ex datis principiis solvi & explicari possunt.

## CXXX.

Primo, quare terræmotus nunc magis horizontalis, nunc magis perpendicularis observetur, quinimo idem terræmotus in uno loco magis horizontalis & ab una plaga ad alteram directus, in altero vero magis perpendicularis esse deprehenditur?

## CXXXI.

Secundo, quare unus locus magis, alter minus tremat, quinimo contingit sæpe, ut multa loca intermedia leviter, aut plane non commoveantur, ubi tamen alia circumambientia magnopere convelluntur, uti hoc in terræmotu 1755. multis in locis observatum fuit.

## CXXXII.

Tertio, quare & quando fiat sibillus, mugitus & strepitus subterraneus, qui

ab uno loco in alium moveri observatur; item unde bombi & fragores, quasi tormenta bellica exploderentur?

### CXXXIII.

Quarto, quomodo ex terræmotu aliquando oriuntur montes ignivomi, & novæ insulæ; aliæ vero oblitterentur; item, quomodo novæ propullulent scaturigines, aliæ vero per multa sæcula nobiles, comprimantur; & multa alia, quæ aut jam explanata sunt, aut levi labore ex his, quæ jam dicta sunt, deduci poterunt.

### CXXXIV.

Itaque de duabus primis quæstionibus dicendum aliquid brevissime, & quidem quoad primam dicimus, quod terræmotus perpendicularis fiat, dum materia intra cavitatem subterraneam rarefacta fornicem seu septum superius, tanquam partem minus resistentem perripit, in quo casu tota vis materiæ rarefactæ in cavitatem superiorem superemin-

nentem agit, adeoque omnia, quæ cavitati huic superincumbunt, concutit & contremiscere facit. Dum vero parietes laterales, qui pariter sunt septa cavitates subterraneas ab invicem separantia, perrumpuntur, tunc tota actio & vis determinatur & dirigitur ad lineam magis horizontalem, in quo casu terra una cum ædificiis suprapositis pariter horizontaliter, & quasi undularet, movetur, quia illa ipsa vis plures & repetitas allisiones, percussiones & refractiones subire debet. Iste terræmotus, cujus generis videtur fuisse ille 1755. potest se ad magnam distantiam extendere, eo, quod, si impetus sit vehemens, plures tales & amplissimas subterraneas cavitates perfringere & pervadere possit.

Item potest contingere, ut prædicta vis se non tantum horizontaliter & ad latera, sed etiam perpendiculariter ad superiorem partem extendat, in quo casu

mo-

motus, qui observatur, erit mixtus, & eo violentior.

## CXXXV.

Ad secundum vero, quare nimirum unus locus magis alter minus tremat, ipse Plinius Lib. 11. jam respondit, dum ostendit aliquas terras facile, & ad ingressum tremere, sicut in Gabienſi agro non procul urbe Roma jugera fere ducenta equitantium cursu terra tremit. Idem observatur in agro Reatino.

## CXXXVI.

Interim observationibus physicis constat, quod terræ solidiores magisque compactæ, ut rupeæ, montosæ, magis & violentius concutiantur, quam rariores limosæ, & laxè cohærentes. Ratio physica hujus observationis in eo consistit, quod impetus & vis, quæ in rebus compactis communicatur uni extremo, propagetur ad aliud usque extremum, ubi e contrario in illis, quæ rariores & laxè cohærentia sunt vis communicata mox infringatur & obtunda-



datur. Sic globus tormenti explosus, & in solidissimum propugnaculi murum impactus commovebit notabilem propugnaculi partem, quod non fit, si tale propugnaculum ex terra plus minus limosa & argillacea compactum sit.

### CXXXVII.

Si ultronee de effectibus, quos terræ motus caufatur, ratiocinari libet, fane illos, qui animalia & specialiter hominem attingunt, ex officio physici & medici, quo fungimur, sicco pede præterire non possumus. Etenim observationes & relationes nos docent, quod sæpe vehementes terræmotus diversi morbi epidemici maligni, contagiosi, quinimo pestilenciales sequantur, uti Sect. 1. jam diximus. Ratio hujus est, quod multæ exhalationes putridæ tali tempore inficiant aëra, item quod ex illo mœrore & terrore, quo homines tempore terræmotus percelluntur, humores facile ad putredinem disponantur.

### CXXXVIII.

## CXXXVIII.

Quam vehementer autem mens humana ex convulsionibus globi terraquei percellatur, patet exinde, quod menti exinde tam tristis imprimatur idea, ut diu noctuque in continua anxietate & pavore degat uni infixa tristi cogitationi. Ex quo necessario sequitur, ut omnes functiones tam animales, quam vitales & naturales langueant. Unde mirum non est, si exinde non tantum corpus, sed & mens ægrotet; etenim multos tali tempore affligit vertigo, vomitus. Alios apoplexia invadit, foeminæ passionibus hystericeis corripuntur, aliæ, quæ uterum gerunt, abortire solent. Verum numerus eorum, quos affectus hypochondriaci, melancolici, quinimo etiam maniaci tenent, vix non aliis prævalet, quod Seneca quæst. natural. Lib. VI. Cap. I. experientia edoctus confirmat :  
„ Nunquam visa fuit tanta stultorum &  
„ fatuorum quantitas, quam eo anno, quo  
„ ter-

„ terræmotu cecidit illustris urbs Pom-  
 „ peja in Campania nonis Febr. Regulo  
 „ & Virginio consulibus.

## CXXXIX.

Interim calamitoso tali tempore quorundam, aut delirantium, aut impiorum malitia eo invalescere consuevit, ut audeant urbium, oppidorum ruinas, everfiones publice prædicere & vaticinari. Hoc factum esse, legimus ex Baronio ad Annum 396. Constantinopoli sub Arcadio & Honorio cum maximo habitantium terrore.

Ast idem recentissime contingit Romæ 1702. Nam nocturno tempore, media nocte, dum fere omnes fomno sepulti essent Romani, quidam scelestissimi audebant, semitas, vicofque percurrere, domorum fores pulsare, & alta voce clamare, ea nocte universam urbem dirutum & absorptum, omnesque incolas sub ejusdem ruinis sepultum iri, ex quo falso nuncio terrefacti cives, propriam salvare vitam studebant, & fe-

feminudi pavidique valedicebant laribus & urbi, seque ad vicinas recipiebant planities, sicque extremum urbis excidium horrentes expectabant, donec a provido & claro urbis Magistratu titubantium animi ad quietem componerentur. Huc spectat Senecæ textus Lib. VI. c. 29. „Alios timor vehementius perturbat, & in dementia transfert, „ nec unquam plura exempla vaticinantium invenies, quam ubi formido mentes „ religione mixta percussit. „ Quare simili funesto in casu optimum erit divinissimi Senecæ consilium Lib. VI. quæst. natural. „ Proinde magnum fumamus animum adversus istam cladem, quæ nec evitari nec „ provideri potest - - „ Timor sine „ remedio stultus est, ratio terrorem prudentibus excutit, imperitis fit magna ex „ desperatione securitas - - Tandem: si „ vultis nihil timere, cogitate, omnia „ timenda esse.

F I N I S.

MARCI ANTONII PLENCIZ,  
MEDICI VINDOBONENSIS  
**DISSERTATIO**  
PHYSICO-OECONOMICA,  
S E U  
NOVA RATIO FRUMENTA,  
ALIAQUE LEGUMINA QUAM  
PLURIMIS ANNIS INTEGRA,  
SALVAQUE CONSERVANDI.



---

VINDOBONÆ,  
TYPIS JOANNIS THOMÆ DE TRATTNERN.  
CÆS. REG. AULÆ TYPOGR. ET BIBLIOP.

1764.

*Nisi utile est, quod facimus, stulta  
est gloria.*

Phædro Fab. lib. 3. Fab. 81.

# PRÆFATIO.



Multa solent typis dari opera, quæ potius multiplicandis Eruditorum contentionibus, quam augendis promovendisque Reipublicæ commodis infervire solent.

Ego diligentia, qua potui, semper studui, ut a similibus contentionibus quam longissime absim, & pro tenuitate mēa Reipublicæ prosim.

A 2

His

His rationibus accensus ante biennium mea opera physico-medica, in quatuor partes divisa, typis dedi, in quibus præter alia, novam hypothefin de Contagio, Putredine, Rubigine, de lue bovina adduxi, stabilivi. Item Scarlatinam tam benignam, quam malignam, a nemine hucusque perfecte descriptam talem, qualem triginta annorum praxi ex ægrotorum lectis didici, una cum ejusdem curatione delineavi.

Item recensui ibidem emolumenta, quæ ex nova illa hypothefi in Rempublicam cum tempore redundare valeant.

Inter



Inter alia videtur id principem  
obtinere locum, quo demonstratur,  
frumentum quam plurimis annis in-  
tegrum, salvumque conservari posse.

Hoc ipsum hic, ac ex iisdem  
ibidem adductis principiis, aliisque  
nunc adjectis experimentis, observa-  
tionibus atque auctoritatibus, fieri  
posse ostendam.

Cum vero materia, de qua hic  
ago, requirat rei œconomicæ ex-  
pertos potius, quam eruditos viros;  
sic magis opportunum fore judicavi,  
ut illa, quæ latino sermone divul-

gare intendo, etiam lingua vernacula efferam.

Interim, quæ hic de frumento, aut tritico dicuntur, statuuntur, eadem etiam de hordeo, avena, de lentibus, fabis, faseolis, aliisque similibus intelligenda, statuenda esse judico.



# SYNOPSIS

E O R U M,

quæ in hoc opere continentur.

CAPUT PRIMUM *agit de vulgari-  
bus granariis. Item de granis frumen-  
ti, de eorum fabrica, & de causis, quare  
hæc lædantur, & corrumpantur.*

CAPUT SECUNDUM *de remediis,  
quibus frumentum diu integrum sal-  
vumque conservari possit; & quid agen-  
dum sit, si frumentum jam corrup-  
tum infectumque in iisdem observetur.*

CAPUT TERTIUM proponit alias vias, quibus frumentum diutius bonum, integrumque, quam in granariis vulgaribus conservari possit.

CAPUT QUARTUM docet aliam, & novam methodum quam diutissime frumenta integra salvaque conservandi.



# C A P U T I.

D E

## GRANARIIS IN GENERE.

---

*De Granorum frumenti hordei, aliorumque similium structura, & de causis, talia corrumpentibus.*

I.

**Q**uam in diversis regionibus, & diversis temporibus ex laudabili Magistratum providentia adlaboratum sit, ut frumenta longæva, & integra, tempore difficultatis annonæ in usum ducenda, conserventur, ex multis gravibusque Authoribus ostendi posset. Verum celeberrimus

A 5

des

des Landes in suo elegantissimo Tractatu physico pag. 102. loquatur pro omnibus

*La construction des greniers avoit été proposé pendant la Magistrature de Tibérius Gracchus ; ce Tribun si affectonné aux intérêts du peuple, & son frère Cajus s'étant chargé de les faire bâtir, il conduisit lui-même l'ouvrage, & l'acheva avec une magnificence, & une promptitude, dont les Romains seuls étoient capables.*

Huc referri potest illud ex Sacris Literis notum Josephi Patriarchæ granarium, septennio futuro sterili destinatum, quod hodie adhuc (quamvis non sit illud ipsum) in vicinia urbis Gran Cairo visitur, & granarium Josephi ab incolis appellatur.

## II.

Quia vero hæc communia granaria non sunt frumentis tali asylo, quin hæc brevi,  
nimi-

nimirum intra unum alterumve annum, corrumpantur; de alia methodo, qua frumentum diutius integrum fanumque conservari possit, jam dudum cogitatum fuit.

### III.

Talis methodus ad hæc usque tempora adhuc desideratur. Unde contigit, ut aliqui œconomiae ruralis periti directores legentes mea opera physico-medica ante biennium hic typis data, ex ibidem a me allatis & propositis regulis sperent fore, ut frumenta quam plurimis annis incorrupta servari possint; unde factum est, ut data colloquendi occasione me provocarint, stimularintque, velim hac super materia planius, dilucidiusque meam mentem ultronee aperire.

### IV.

## IV.

Ut datam illis fidem solvam, & antequam viam, qua talia frumenta quam diutissime incorrupta servari possint, aperiam, necessarium judico, ut præliminariter examinemus, qua ratione frumenta, aliaque vegetabilia communibus in horreis aliisque similibus receptaculis corrumpi soleant, & quæ eorum sit structura, partesque componentes. Sic enim dum causam prædictæ corruptionis noverimus, facilius eidem obviam ire poterimus.

## V.

Structura granorum frumenti, tritici, hordei aliorumque similibus constat ex tribus potissimum partibus, scilicet ex membrana, seu cortice plus minusve denso, totum granum obvolvente, dein ex globulis farinaceis, pariter suis subtilissimis mem-



membranis obvolutis, ac tandem ex ipso germine. Qui plura de harum partium mirabili structura, & usu legere cupit, ad Clar. Leevenhœck Epistolam de arcanis naturæ p. 236.

## VI.

Causæ vero, quæ frumenta in granariis corrumpunt, sunt tres potissimum species Insectorum, quarum duæ curculiones & scarabæi dici possunt. Descriptio horum insectorum legi potest in tractatu physico des Landes pag. 123. &c.

## VII.

Præterea sunt vermiculi a Leevenh. Lupi, seu Wolf dicti, qui non tantum frumenta, sed, & farinas exedunt. Istos vermiculos peiores curculionibus esse credit, nam in tineas volatiles mutari solent. Istæ tineæ dein multa deponunt ova, ex quibus

bus prædicti fimiles vermes evolvuntur. Ab his enim non tantum frumenta, sed etiam horrei tabulata exeduntur, in quibus multa familia ova, data occasione evolventa, hospitantur. Ex quo inferri potest, quam difficile sit, talia granaria semel infecta a prædictis infectis, eorumque ovulis vindicare.

## VIII.

Talia infecta suis acuminosis oris cupidibus pungunt, perforantque granorum frumenti corticem, unde dein substantiam farinosam hauriunt, & consumunt.

## IX.

Præterea fit, ut ad hoc ipsum foramen, quod excavant, deponant ova brevi evolventa; ad hoc, ut foetus, qui adhuc impar esset rumpendo cortici, nutrimentum & augmentum ex farina facilius capiat.

Qui

Qui plura de his infectis, eorum ovulis, aliisque eorum partibus legere cupit, ad-  
eat Leevenh. arcana naturæ. Item des  
Landes & Hartseekeri opera physica.

## C A P U T II.

*Qua ratione bis frumenti, aliorumque simi-  
lium, hostibus obviam eundum sit.*

### X.

Princeps meus scopus non est, ut si-  
milis vulgaria granaria minutim examinem,  
aut illustrem; verum ut talem proponam  
viam, methodumque qua longe diutius fru-  
menta, aliaque vegetabilia, quam in tali-  
bus granariis, integra & incorrupta conser-  
vari possint. Interim, cum talia granaria  
ubique ex usu sint, & cum certum, omni-  
busque notum sit, quod frumenta in iisdem  
diutius incorrupta conservari possint, si cer-  
tæ,

tæ, longa experientia cognitæ cautelæ rite observentur; sic necessarium duxi, tales cautelas, quas ego ipse ab experientissimis œconomiae Præfectis didici, hucusque, hic quam brevissime adjungendas esse.

## XI.

Primo necessarium est, ut grana frumenti, tritici, aut quæcunque alia, probe ficcata deferantur ad horreum, alias sat cito corrumpuntur, aut germinare incipiunt. Ast hoc unicum non sufficit, sed præterea requiritur, ut talia ibidem conserventur. Adeoque debent defendi ab omni aëre humido, nebuloso, ad quod maxime necessarium est, ut portæ, & fenestræ granarii sint exacte clausæ, ne aer humidus, nebulosus libere penetrare possit. Etenim ex constantibus peritorum granarii

narîi Præfectorum observationibus, & relationibus habemus, quod si talia granaria, eorumque fenestræ tempestate humida, nebulosa, aut flantibus Austris aperiantur, mox propullulent innumerabilia, superius descripta insecta, frumenta depascentia, quod fundatur in meis de contagio & putredine principiis, quæ parte I. meorum operum physico-medico-  
rum explanavi.

## XII.

Secundo ex antea dictis resultant aliæ necessariæ cautelæ, ut videlicet frumentum unius messis, seu anni, non misceatur cum aliis, quia experientia docet, unum altero humidius esse, unde fit, ut unum altero diutius intactum conservari possit; quod humidum est, citius corrumpitur, & aliud, cum quo mixtum, aut

B

cui

cui vicinum est, inficit, & in sui naturam vertit. Ad hoc præcavendum, aut deberet quælibet messis in diversis granariis fervari, aut deberent ad mentem Clariss. des Landes magna scrinia interne ubique tenuissimis ferreis aut plumbeis bracteolis (Blech) seu lamellis, obducta construi, quæ possent frumentis diversarum messium repleri, sicque probe clausa conservari.

Emolumentum exinde esset multiplex; sic enim posset annus cujuslibet messis ad scrinia annotari; sed præcipuum emolumentum exurgeret inde, quod, si frumentum unius scrinii corrumpatur, manerent alia intacta & integra. Tandem & aliud exinde exurgeret emolumentum, quod certum sit, frumenta in prædictis scriniis longe diutius, quam in vulgariibus granariis conservari posse. XIII.

## XIII.

Sicut ostendi, humidum frumentum cum ficco in granariis misceri non debere, ita certum definitumque est, frumentum corruptum cariosum, aut rubiginosum nec miscendum, quin imo neque in vicinia cum integro collocandum esse. Etenim experientia docet, quod si aliquot tantum grana rubiginosa immixta sint, mox totum granarium eodem morbo contagio affici & infici. Unde dein exsurgit, ut tale frumentum nec pro panificio, nec pro semine adhiberi possit. Sane hæc observatio tanti est in re œconomica momenti, ut observationes, & experimenta, quæ hac de re, aut hac de causa instituit, nobisque communicavit Clariss. Expertiss. Tillet in sua auro & cedro digna Dissertatione hic adducere oporteat.

*Ad comprobendam secretam, quæ in pulvere cariosorum granorum est, malignitatem, illud etiam valet tentamen, quo compertum est, sanissima, & optime matura cæteroquin grana, si diutius in pulvere carioso detinentur, veneni malignitatem contrahere, quæ post varias cum aqua communi institutas lotiones adhuc conspicua evadit. Eam quoque non propagant solum stramina, pulvere ejusmodi carioso infecta, sed etiam pulveris tenuis portio, in agrum optime constitutum, ejusque determinatum locum inspersa, quæ solam hanc particulam inquinaverat.*

*Quo evidentius hæc confirmarentur, cistulam Clariss. Tillet in duos divisit loculos; alterum pura terra replevit, & en bonas sanasque produxit spicas, alterum terra pulvere nigro (id est rubiginoso) imbuta, quæ non nisi cariosas tulit spicas. Ex his autem,*  
*aliis-*



*aliisque multis tentaminibus concluditur, certissimam corruptionis causam in pulvere carioso latere, ut granum sanum contagio veloci & communicatione intima venenum latens percipiat, illudque ad grana dimittat, inde iterum provenientia: ut illa grana semel infecta in pulverem sese convertant nigrum, & reliquorum corruptionis causa existant! ut ipsa, quæ spicas produxerant cariosas, stramina pestifera sint granis vicinis.*

Qui plura hac de re legere cupit, talia inveniet in Commentar. de rebus in scientia naturali, & medicina gestis, Volumine X. pag. 642. & reliquis. In quibus mea nova de contagio, putredine & rubigine sententia ultronee confirmatur.

## XIV.

Tandem ultimo, si contingat, ut in granario in conspectum veniant multa in-

secta, curculiones, papiliones, tineæ volantes, tunc quam citissime prospiciendum est, antequam hæc multa deponant ovula, ut talia deleantur, necentur.

Hoc fit, si clausis portis, & fenestris sulphur accendatur; fumo enim sulphuris viva insecta necantur quidem, sed eorum ovula non destruuntur inde; quapropter hæc qua data occasione sobolescere solent.

### XV.

Aliud ad eundem finem obtinendum secretum remedium legimus in Commentariis de rebus in scientia naturali & Medicina gestis Volumine I. pag. 430. de herba Germanis Heller- und Pfennigkraut dicta, quæ Thlaspi species esse videtur. Ibidem enim hæc legimus: *Nemo enim nescit, quanta a curculionibus soleat frumenti granis strages inferri, quos non tam necat,*

*cat, quam odore suo ingrato in universum videtur abigere & relegare.*

Novi œconomiae frumentariae expertissimum virum, qui mihi, ut evidentissimum remedium, tam pro conservando a curculionibus frumento, quam pro iisdem si jam adsint, abigendis communicavit: quod fit, si pala seu spatula, qua frumenta volutari solent, illico in parte illa, quæ frumenta attingit, inungatur. Ratio hujus effectus aliunde patet, qui noverunt alium esse summum anthelminticum.

Ex quo fundamento judico, pleraque anthelmintica præcipue illa, quæ male olent, eundem effectum præstare posse.

Supersunt sane multæ aliæ cautelæ, quæ peritis horreorum Præfectis magis, quam mihi aut cuique alteri, notæ sunt, quas hic prætereo, atque iis, quorum interest, observandas relinquo

CA-

## CAPUT III.

*De alia methodo longe diutius, quam alias,  
frumentum, triticum, bordeum, avenam,  
lentes, ciceres, aliaque similia, integra  
& incorrupta conservandi.*

## XVI.

Cum experti, peritique œconomiae  
Præfecti, alique, quibus salus Reipubli-  
cæ cordi est, experientia didicerint, gra-  
naria vulgaria paria non esse diu servan-  
dis integris, incorruptisque frumentis, ex-  
periebantur aliam viam, aliamque insti-  
tuebant methodum, qua talia frumenta  
longe diutius farta tectaue conservarentur.

Verum hac de re diversa semper fuit  
sentiendi, & experiendi ratio. Quam Pli-  
nius ipse suo jam tempore nobis exposue-  
rat. Qui textus lib. XVIII. cap. XXX.  
fane lectione dignus est; ut unusquisque  
videat, quod illa, quæ hoc tempore pro

novis venditantur, pleraque veteribus jam nota fuerint. Ejusdem textus sic sonat: *Horreum operosa tripedali crassitudine, pariete lateritio exædificari jubent aliqui, præterea superne impleri, nec afflatus admittere, aut fenestras habere ullas. Alii ab exortu tantum æstivo aut septentrione, eaque sine calce construi.--- Alibi suspendunt granaria lignea columnis, & perflari undique malunt.--- Multi ventilari vetant.*

Postquam diversas opiniones, diversaeque frumenta, diu sana, intactaque conservandi rationes exposuerat, suam subjungit aperitque mentem: *Utilissime tamen servantur in scrobibus --- & ante omnia, ut sicco solo fiant, curant.--- Ita frumenta (potius frumentis) si nullus spiritus penetret, certum est nihil maleficum nasci --- sic conditum triticum durat annis*

*quinquaginta; milium vero centum. Fabam & legumina, in oleariis cadis oblita cinere, longo tempore servantur. Item faba a Pyrrhi Regis ætate in quodam specu Ambracie, usque ad Piraticum Pompei Magni bellum duravit annis centum viginti.*

Hæc & similia possunt etiam legi in Varrone de re rustica, & aliis.

### XVII.

Verum adeamus magis nostra, quæ vivimus tempora, & similia, quorum Plinius, quorum Varro aliique antiqui nobis reliquerunt memoriam, inveniemus. Sic Ambiani, Metropoli Picardiæ; item in Trevirensi districtu forte inventa sunt similia antra, & cavernæ subterraneæ, in quibus frumenta plurimis annis integra & sana conservabantur.

In Africa dantur putei in rupibus excavati,

cavati, valde ficci; hos Arabiæ incolæ vocant *Matamore.* Hi obducuntur palea ficca; ac tandem frumento replentur; & exacte omni ex parte clauduntur. Plura similia habentur in Tractatu physico Clar. des Landes. pag. 110.

## XVIII.

Nostrates coloni, præsertim illi cis Danubium, solent in terra argillacea sibi formare cavitates inferius, seu in fundo latas, superne angustas. Has vel stramine, vel lignis immixtis & accensis ficcant, ne frumenta malum saporem aut odorem contrahant. His factis, & strato prius stramine, frumento implent cavitatem, superius cavitatis orificium stramine & terra cooperiunt, ita, ut aquæ pluriæ non penetrent, sed per declivia ultro promoveantur. Quo artificio fit, ut tale  
fru-

frumentum aliquanto diutius, quam in granariis vulgaribus conservari possit. Verum malus odor, aut sapor frumenti, quibuscunque adhibitis cautelis vix præcaveri potest.

Alii vero solent frumenta una cum spicis conservare, experientia enim nos docet, quod omnia vegetabilia in suis naturalibus involucris diutius quam evoluta, integra servari possint.

---

---

#### CAPUT IV.

& ultimum.

*Proponit meam novam methodum frumenta longiore tempore, quam quacunque alia ratione, integra, & incorrupta conservandi.*

#### XIX.

In meis operibus Physico-Medicis, præsertim Parte prima, ubi novam ideam  
con-



Contagii, Putredinis, & Rubiginis, explanavi, ostendi emolumenta, quæ Reipublicæ exinde resultent, aut quæ cum tempore exoriri possint.

Inter reliqua est primum, quod ex hac hypothesi morbi contagiosi brutorum, præcipue vero luis bovinæ, facilius dilucidari & curari possint. Alterum est de Rubigine vegetabilium, quod nimirum morbi vegetabilium, ut frumenti, hordei, avenæ, aliorumque, pariter ex mea sententia facilius, intimiusque cognosci, & præcaveri possint.

Quare ibidem validis rationibus & certis multisque experimentis ostendi, quod ex meis de Contagio, Putredine & Rubigine principiis frumentum, triticum, hordeum, aliaque legumina, quam diutissime sana, & integra servari possint.

Hic

Hic loci, quam brevissime fieri possit, hæc repetam, & majore cum fundamento ostendam, deducamque, frumenta hac ratione diutius, quam quacunque alia, integra servari posse.

## XX.

Omnes experti, peritique Physici pro certo compertoque habent, quod tam vegetabilia, quam carnes animalium in anthlia pneumatica sat diu recentia, & incorrupta servari possint.

Idem etiam fieri potest, si talia adipi aut alicui alteri pinguamini immergantur. Item ostendi, quod nec putredo, neque evolutio insectorum, seu minimorum animalculorum fiat, nisi in aere aperto.

## XXI.

Præterea omnibus Physicis notum est, quod humiditas corpora disponat ad corruptio-

ruptionem, seu putredinem. Ut alia experimenta hic præteream; juvabit meminisse tantum illorum, quibus superius ostendi, quod frumenta in diversis cryptis & specubus ficcis multis annis incorrupta hæferint, eo quod ibidem omne humidum abfuerit.

Item superius XI. ostendi, quod aer humidus incaute ad granaria admissus frumentum ibidem brevi corrumpat, destruat, eo quod exinde innumerabilia insecta mox propullulent.

## XXII.

Ex quibus aliisque similibus observationibus merito deducere possumus, quod ad hoc, ut frumenta diutius integra conserventur, duo potissimum requirantur.

Primum est, ut ab omni libero aere vindicentur; Alterum est, ut ab omni humiditate defendantur.

Hoc

Hoc adhuc evidentius recentissima observatione & relationibus, quas nuper ex publicis Ephemeridibus habuimus, confirmatur: refertur enim, frumentum in ruinis Herculani, ubi per multa secula latebat, inventum fuisse integrum, incorruptumque; cujus aliqua portio ab Eruditissimo, & Religiosissimo Patre Floriano Dalham Clerico Regulari e Scholis Piis Viennam allata fuit.

Verumtamen hoc frumentum alia ex ratione ibidem integrum tam diu conservari non poterat; nisi quia tegebatur undique cineribus, aliisque corporibus exustis siccissimis, quæ Vesuvius furens evomuerat. Sic enim tale frumentum liberum erat ab omni aeris accessu, & ab omni humiditate.

## XXIII.

Si itaque prædictæ duæ tam necessariae cautelæ nunc exacte observentur, nullus dubito, quin & nunc idem effectus exinde exfurgat. Quapropter omni cum fundamento asserere possumus, quod, si exstruatur aliquod cavum frumento replendum, si hoc ab omni humido, & libero aëre vindicetur, quod nimirum tale frumentum, quam diutissime incorruptum fervari possit.

## XXIV.

Secundum jam data principia, & fundamenta poterit quisque sibi formare ideam alicujus similis cavitatis, in qua, quo melius superius requisitæ conditiones observatæ fuerint, eo magis certiusque effectus respondebit votis.

Etenim talis cavitas, fossa, aut caver-

C

na

na formari poterit in rupibus, in terra arenosa, cretacea; aut in defectu horum, in quacunque terra, dummodo hæc humiditate non abundet.

Talis fossa poterit esse ad libitum lata, & profunda, prout quis majorem, aut minorem frumenti quantitatem immittere velit.

Sic si quis experimenti capiendi causa aliquam cavitatem formare desiderat, hanc cum uno, duobus, aut tribus modiolis implere poterit; respiciendo semper magis ad altitudinem, quam ad amplitudinem fossæ. Quia, si capta experimenta in fossa, una, aut duabus orgiis alta, & uno alterove pede lata nostris respondeant votis, respondebunt pariter, quæcunque sit latitudo fossæ.

## XXV.

Meo concipiendi modo, caverna pro frumentis, aliisque similibus diu integris servandis posset excitari hoc modo:

Fiat caverna ad libitum lata, & profunda, in loco ficco, elevato potius, quam in humili, in rupibus, terra arenosa, aut etiam alia.

Ad hoc, ut talis caverna eo securius ab omni vindicetur humiditate, posset tam fundus cavernæ, quam ejus latera, argilla ad unum alterumve pedem muniri. Quod quidem, ut dein videbimus, semper non requiritur.

Dein pro majore securitate deberet tenuis murus cum, aut sine calce ex lateribus coctilibus, seu uftis circumduci.

Caverna hoc modo præparata, si aliqua interna humiditas subsit, quemadmo-

dum plerumque adest, deberet stramine, aut lignis intromissis, & accensis exficari.

## XXVI.

Antequam vero talis caverna repleatur frumento, deberemus nobis excogitare, & invenire, faciliorem methodum, qua tale frumentum convenientius undequaque cineribus ordinariis lignorum tegatur, ambiaturque.

Hoc posset fieri hoc modo: si primo fundus hujus fossæ, seu cavernæ ad duorum, triumve pedum altitudinem repleatur prædictis cineribus. Ne vero cineres una cum frumento misceantur, posset sepimentum ex tela interponi. Hæc tela deberet se ad cavernæ superficiem extendere, hac tamen ratione, ut inter hanc & latera cavernæ ad unum aut duos pedes spatium, prædictis cineribus undequaque  
re-



replendum, interfit; ut tali modo frumentum hæreat quasi in sacco, cineribus undequaque circumdatum.

## XXVII.

Postquam igitur talis caverna præscripta ratione repleta fuerit, debet ejus superficies ad duos trefve pedes, adeoque densius, quam ejus latera, tegi iisdem cineribus lignorum, his debent superimponi tegmen, vel ex lapidibus quadratis, vel ex lateribus ustis; ac tandem hæc omnia debent argilla fat dense cooperiri, aut etiam aliquo tecto ex afferibus muniri: ne pluviae aut nives super fossam cadentes se in fundum cavernæ insinuent.

## XXVIII.

Ne mireris Benevole Lector, quod opportunum, & quasi necessarium credam, sentiamque, ut tale frumentum undequa-

que cineribus cinctum confervetur; sed mirari defines, si principia, videlicet salem alcalinæ naturæ, & siccissimam terram, quibus cineres constant, rite perpenderis. Hæc sunt principia, quæ non tantum humiditati, sed vel maxime putredini resistunt.

Hoc ipsum nos docet observatio eorum, quæ in ruinis Herculani incorrupta inventa sunt; cujus mirabilis effectus sane alia reddi non potest ratio, nisi quia frumenta similibus cineribus ita tegebantur, ut non tantum aëri, sed & humiditati omnis via præclusa fuerit.

Quin imo hoc ipsum Plinius superius XVI. citatus nobiscum sentit, dicens: *Quod fabæ & legumina oblita cinere longo tempore integra servantur.*

## XXIX.

Interim in illo casu, ubi tanta quantitas cinerum quanta requireretur, non sup-

peteret, arena bene ficcata defectum supplere poterit.

Quapropter possemus vel cineres miscere cum arena, vel arenam solitarie in usum vocare; a qua pariter semper bonus effectus expectandus est.

Hæc, quæ dico, non tantum in ratione, & proprio asserto, sed & authoritate Illustrum Virorum nituntur; sic ad quæstionem ab Academia Regia Suecica de granis frumenti aliisque frugibus diu integris conservandis, propositam; responsum fuit, *optimum fore, si talia grana arena tegantur.* Vide Commentaria de reb. in scientia natural. & medicina gestis Volum. III. pag. 200.

XXX.

Ferre eundem effectum possumus expectare a stramine, & palea; si nimirum tam

pavimentum, quam latera fossæ loco cinerum, aut arenæ obducantur stramine perquam sicco.

Unde posset levi labore, & exiguis expensis extrui caverna, in qua valde diu frumenta integra conservari possint: si videlicet fodiatur similis caverna in solo arenoso; tunc debet methodo superius XVIII. exposita primo ficcari, quia solum arenosum sub terra semper conjunctam habet aliquam humiditatem; dein deberet fundus, seu pavimentum cavernæ, uti & ejus latera, stramine obduci; quo facto deberet primo caverna frumento impleri. Interim deberet maxima cura adhiberi, ut os, seu cavernæ superficies quam optime occludatur, ne aut humiditas, aut aer se in cavernam insinuare possit. In quo casu illa, quæ superius XXII. dixi, hic in usum vocanda erunt.

Ex

Ex quibus apparet, quod diversæ sub-  
sint viæ, quibus frumenta sat diu integra  
conservari possint; verumtamen illa est præ-  
aliis melior, quæ securius, & certius fru-  
menta ab humiditate, & aëre defendet.

## XXXI.

Hic posset, & quidem non sine funda-  
mento, institui difficilis quæstio; an vide-  
licet frumenta melius, & diutius in loco  
calido, aut frigido integra conservari possint;  
rationes videntur pugnare pro una, & pro  
altera parte: pro loco calido stat illud, de  
quo superius XI. dixi; statui autem ibidem,  
quod quo ficcius & quo magis ab omni  
humiditate liberum est frumentum, eo diu-  
tius integrum sanumque retineri possit.

Omnes autem norunt, quod calor magis,  
quam frigus frumenta ficca conservet; unde  
videtur locus calidus frigido præferendus  
esse.

Pro loco autem frigido possunt plures rationes afferri. Sic omnibus Physicis notum est (uti ego in meis operibus parte I. pag. 51. ostendi) quod in loco frigido nulla fiat germinatio, nulla insectorum evolutio, denique nulla putrefactio, nulla corruptio.

Ex quo tanquam magno fundamento deduci potest, quod frumenta in loco frigido diutius, quam in calido, & radiis solaribus exposito, incorrupta conservari possint.

Pro confirmatione hujus accedit observatio, & autoritas celeberr. Leewenhoeck, qui observavit, quod curculiones cœlo frigido instar mortui jaceant, qui, accedente calore, mox moveri, & reviviscere incipiant. Vide ejusdem Authoris arca-  
na naturæ pag. 253.

## XXXII.

Unde si rationes pro & contra rite ponderem, an frumenta diutius in loco calido, radiis solaribus exposito, an in frigido integra, & incorrupta conservari possint, definire nolim. Quia hanc quæstionem deberet experientia, & observatio plurium annorum decidere.

Quare his, aliisque similibus rationibus motus, jam in Aprili 1764. diversa institui experimenta. Nimirum primò accepi duo vasa fictilia longioris, & angustioris colli, quorum quodlibet libras circiter viginti aquæ capere posset. Hæc implevi frumento ficcissimo usque ad medietatem colli; aliam colli medietatem replevi cineribus, valde compressis. Ac tandem vasis aperturam, ne aër, aut humiditas se infinuare possit, quam exactissimè clausi.

Unum

Unum ex his vasis deposui in cellario ficco. Alterum vas libero aëri, & radiis solaribus exposui.

XXXIII.

Item accepi lagenas vitreas duas, angustioris & longioris colli, quarum quaelibet octo circiter aquæ libras caperet; has pariter implevi frumento ficco usque ad medietatem colli, reliquam colli medietatem implevi arena ficcissima; ac tandem probe clausi.

Unam ex his deposui cum supra dicto vase fictili ad cellare; & alteram, sicut de vase fictili dixi, exposui aëri libero, & radiis solaribus.

Tandem in vasis tam fictilibus, quam vitreis annotavi annum 1764, & mensis diem, scilicet 20. Aprilis; visurus, si Deus longævam faverit vitam, qualis effectus,



& quæ differentia posterioribus annis sit futura.

#### XXXIV.

Cum enim radii solares magis vasa vitrea, quam fictilia penetrent, interim utrumque vas una cum contento frumento æqualiter calefaciant, oportebit observare, an frumentum exinde aliquod detrimentum capiat, nec ne.

Si enim multis annis integrum, fanumque perfisteret, posset omni cum fundamento turris sine porta, & fenestris, adeoque undequaque probe clausa; relicta tantum in superiore parte exigua apertura excitari.

Talis turris deberet primo bene exficari, dein ejus fundus, seu pavementum primo lateribus uestis, cum vel sine calce sterni; ac tandem, vel cineribus, vel arena ficca, aut etiam stramine ad unum circiter pedem conspergi.

His

His factis deberet superne frumento impleri, atque, cum superior pars turris in apicem definat, deberet superne cineribus, aut arena tegi; sicque probe claudi apertura.

Interim pro majori securitate posset non procul a fundo in muro relinqui aliqua levis apertura; quæ alias toto tempore probe clausa conservari deberet.

Ista apertura usum haberet particularem, nimirum sæpius experiundo frumento, an hoc integrum, sanumque persistat. Unde concludi poterit, quamdiu ibidem relinquendum, aut quando in usum vocandum sit. In quo casu bene notandum, ut defectus extracti frumenti per immisillos cineres quantocius refarciatur & apertura festinato, ac probe claudatur.

## XXXV.

Hic posset aliquis dubium movere, & opponere, dicendo, quod ego ex observationibus, cum minutissima frumenti quantitate institutis, velim talia deducere atque. periculo corruptionis immensam frumenti molem exponere, cujus jactura magno fane detrimento proprio esset Domino.

Ad hæc respondeo, quod si experimenta cum exigua frumenti quantitate capta ad vota succedant; dubitandum haud esse, quin etiam alia cum majore quantitate frumenti instituta, & probe observatis iisdem cautelis, eundem sortiantur effectum.

Si enim experimenta, quæ superius adduxi, vera sunt; præcipue vero, si in ruinis Herculani frumenta, aliaque utensilia, tot seculis integra, & incorrupta permanse-  
re; quis quæso, lumine naturali instructus,

&

& ab omni partium studio alienus, dubitabit, aut negabit, arte aliquid simile fieri posse; si videlicet eadem circumstantiæ, & illæ ipsæ causæ etiam in nostro casu pro possibili observentur.

Causæ vero, quæ prædicta corpora a corruptione tamdiu defendebant, non erant aliæ, quam quas superius XX. exposui nimirum absentia humiditatis, & aëris externi. Si igitur frumenta ab his vindicemus, habebimus, quod intendimus.

F I N I S.

